

SOTA INSOLAT NEN SAN LUCAS JA MAYPANGKEP NI KABEBIYAG TAN TORO NEN JESUCRISTO

¹ Iyay i isolat ko son si-kam, agi Teofilo: Es-hakel day engipeshas ni kabaalan shen mengisodat ni edagdaga nonta timpon emekibibiyag pay laeng si Apo Jesus son si-katejo,

² jet inonod sha ni olay sota intoro met laeng nonta apostol nen Jesus, tep si-karay sigod ja eki-odo-odop son si-kato, si-karay engasas ni inaspasing to, tan si-kara pay i inbetkag ton engitosho ni esel to.

³ Jet niman Teofilo, peshasen ko ngon isolat. Ninemnem ko ey mapteng emo nem si-kak pay i sakey ya mengisodat tep inashal kon pasiyeN emin sota edagdaga manipod nonta nanshogi-an to ingkatod ka-onoran. Isonga siningpet kon insolat iyay para son si-kam,

⁴ say amta-en mo pay i eshom ma podpodno, ja toloy nonta inashal mo la.

Sota anghil, inkowan toy kay-enak ali nen Juan

⁵ Nanshogi iyay ya emin nonta timpon inpan-toray nen Ari Hirodis shi Jodia. Nontan da, wara ngoy parin nanngaran ni Sakarias, ja naykait so nonta gropo ni pari ja kowan sha ey Abiyas. Say ngaran ni asewen Sakarias, si Elisabet, ja poli ngo met laeng ni pari.

⁶ Sajay iren san-asewá, mapteng i ogadira, ja shaka tongpalen emin i bilin nen Apo Shiyos.

⁷ Nem enshiy anak sha tep basig si Elisabet. Eba-kol ma si Elisabet tan edakay ngo ma si Sakarias.

⁸⁻⁹ Idi sakey ya akew, naysa-dat si Sakarias ja mansilbi son Apo Shiyos shi Timplo, tep say ogadi ni papashi ni Hodiya nontan da, emansasa-dat sota grupo ni pari ja mansilbi shi Timplo jet manbobonot ira no sipay sakey son si-kara ja onsekep shi Timplon memool ni kowan sha ey insinso. Jet say epi-not, si Sakarias.

¹⁰ Idi maramen emankepooli sota insinso, emanshawát sota ira totoo son Apo Shiyos shi bo-dayan ni Timplo.

¹¹ Si Sakarias i wáred ma naydaem ni Timplo, jet nontan, nanpa-sas i anghil nen Apo Shiyos son si-kato shi apit ni kanawan nonta damisaan ja kepankepooli nonta insinso.

¹² Idi inon-an nen Sakarias sota anghil, eg to tongolan i pesing to, ta timakot.

¹³ Nem kowan nonta anghil son si-kato ey, “Kareka ontakot Sakarias. Si Apo Shiyos, intengan toy shawat mo et si asewám ma Elisabet, on-anak ali ni daki. Jet say ingaran mo di son si-kato, Juan.

¹⁴ Man-imdeng tan medadsakan ka din pasiya, tan eshakil pay aliy man-imdeng ni kay-enak to.

¹⁵ Bigbigen ali nen Apo Shiyos si Juan ja eshayaw. Eg ali menginom ni adak, ono ngaranton memoteng. Ishalan ali ni Ispirito Santo nen Apo Shiyos ni olay manipod kay-enak to.

¹⁶ Eshakel aliy tood Israel ja pan-odi ton memati son Apo Shiyos.

¹⁷ Wara son si-kato i Ispirito Santo nen Apo Shiyos ja inges tos Elias ja para padto nonta bayag da, jet say kabedinan nen Elias, inges to ngo son si-kato. Si-kato nin i mepangdon mantosho shi Israel, asan kamotok sota naypadto nonta bayag da ja ibetkag ali nen Apo Shiyos ja mengisedakan. Si-kato diy mengi-odi ni semek ni san-a-ama ja eg man-inawatan. Si-kato diy memanshaan ni toon eg memati son Apo Shiyos, say nemnemen sha mowan i kosto, say mansekana i totoo ni imotok ali nen Apo.” Kowan nonta anghil.

¹⁸ Jet inbaga nen Sakarias ey, “Toway amta-an ko so ey mepesamak iyay? Edakayak mala met, tan eba-kol ngo ma si asewák.”

¹⁹ Kowan nonta anghil ey, “Si-kak si Gabriel ja anghil. Naka mansilbi ni olay son Apo Shiyos et inbetkag towak ali ja mengikowan ni pansigshan mo di.

²⁰ Nem si-kam, eg ka memati ni kowan ko. Nem angken eg ka memati, kenshat ta mepesamak met laeng ni koston timpo to. Isonga niman ma, eg ka maka-esel ingkatod mepesamak sota inkowan ko son si-kam.” Kowan nonta anghil.

²¹ Naysekeshan mala sota totood bo-dayan et kowan sha ey, “Ngantoy? Ebayag ga pasiya si Sakarias shi Timplo.”

²² Idi bimo-day ali si Sakarias, eg ma maka-esel et eg mebedin na mekitbal nodta totoo. Nakol ninemnem nonta totoo ey kenshat ta waray

inpa-sas nen Apo Shiyos son si-kato shi Timplo. Sininjas malay kepesing nen Sakarias ja mekit-bal.

²³ Idi epospos may timpo ja pansilbi nen Sakarias shi Timplo, imakad si Sakarias shi baley to.

²⁴ Idi enshiy bayag to, ewad-an si Elisabet ta asewa nen Sakarias et nannongew shi baley sha ni dimen bolan.

Nontan, kowan nen Elisabet ey,

²⁵ “Niman ta tinodongan towak nen Apo Shiyos, malokonak ma. Isonga enshi may naka kaybebaingi shi totoo.”

Sota kay-enak ali nen Jesus, inpa-amta ni anghil so nen Maria

²⁶ Idi mayka-nem ma bolan ni dokon nen Elisabet, inbetkag mowan nen Apo Shiyos i anghil to ja si Gabriel shi ilin Galilia ja kowan sha ey Nasarit.

²⁷ Shiman i kawad-an ni sakey ya balesang ja manngeshan ni Maria. Si Maria, enshiy to ined-eshol la daki et si-katoy naykarin esaw-en ni sakey ya dakin manngeshan ni Jose, ja poli nen David ja ari nonta bayag da.

²⁸ Si Gabriel, dimaw son Maria et to inkowan ey, “Pan-indeng ka Maria, ta say ebadeg ga semek nen Apo Shiyos, wara son si-kam.”

²⁹ Eg amta nen Maria i pesing to nonta intenengan to sota inkowan ni anghil, tan toka en-enapa nem ngarantoy olog nonta inkowan nonta anghil.

³⁰ Nem kowan nonta anghil ey, “Kareka man-shanag Maria, ta si Apo Shiyos, kinaasi-an toka.

³¹ Medokonan ka et daki aliy i-anak mo, ja pannung mo di ni Jesus.

³² Meshedjaw ali, tan mayngadnan ja Anak nen Apo Shiyos sa Kangeto-an. Jet si Apo Shiyos, pantoshay to ja inges toy inpantoray nen David ja apo to la.

³³ Si-kato di ni olay i mengitoshay ni kait ton poli nen Jacob ingkatod ingka.”

³⁴ Say insongbat nen Maria so nonta anghil, kowan to ey, “Toway pesing nitan? Balesangak met! Enshiy nak ined-eshol la daki!”

³⁵ Kowan nonta anghil ma ey, “Sota Ispirito Santo nen Apo Shiyos i maka-amta. Sota panakabalin nen Apo Shiyos, wára di son si-kam. Isonga sajay alin nga-nga, esanto-an ja enshiy to di panbesolan, jet maykowan ali ey Anak nen Apo Shiyos.

³⁶ Iman to pay, si Elisabet ja kasingsing mo ket iman i enem ma bolan na dokon to niman, ey eba-kol ma, kowan sha ey basig pay.

³⁷ Enshi eshan i edigat so nen Apo Shiyos; kabedinan ton emin.”

³⁸ Kowan ma nen Maria ey, “Naka pati-a i kowan nen Apo Shiyos. Angka et nem mepesamak aliy kowan mo.”

Sotan ey indekjas ma nonta anghil si Maria.

Dimaw si Maria shi Jodia ja to binisita si Elisabet

³⁹ Idi edabas i pigen akew, nansaganes Maria et dimaw shi karonshontogan ja sakop ni ilin Jodia,

⁴⁰ tep shiman i kawad-an nen Sakarias tan si Elisabet. Idi mimotok si Maria, imesel la shagos son Elisabet.

⁴¹⁻⁴² Idi intenengan nen Elisabet sota esel nen Maria, nay-inshas ngon kimeykey sota nga-nged ekes nen Elisabet. Inkedsang nen Elisabet i esel ton intorong ni Ispirito Santo nen Apo Shiyos, ja kowan to ey, “Eshakel i bii, nem si-kam i pinidi nen Apo Shiyos ja in-aknan to ni ebadeg ga kaasi. Jet kaasi-an to pay ali ta nga-ngen i-anak mo di.

⁴³ Apay sipa-ak et ngon en binisita di ni ina ni Apok!

⁴⁴ Idi intenengan koy esel mo, nay-inshas ngoy keykey niya dokon ko ni imdeng to.

⁴⁵ Siya, pinatim sota esel nen Apo Shiyos ja inpa-amta to son si-kam, ja mepesamak ali. Isonga binindisiyonan toka.”

⁴⁶ Kowan nen Maria ey, “Ebadeg i shayaw ko son Apo Shiyos,

⁴⁷ tan naka man-imdeng kabol son Apo Shiyos sa mengisedakan son si-kak.

⁴⁸ Tep eg towak in-olay ya too ton ebaba. Niman ma, angken sipa, ikowan to ey si-kak i kagesatan.

⁴⁹ Si Apo Shiyos ja Kangeto-an, kabedinan ton emin i piyan ton dag-en, et kinaasi-an towak.

⁵⁰ Manipod nonta pilmiron too ingkato niman, toka kaasi-i sota toon mengiredjaw son si-kato.

⁵¹ Si Apo Shiyos, kaskasshaaw i obden toka dagdag-a. Angken sota nga-ngaaw wa plano ni toon etangsit, toka bediwi.

⁵² Si-kato, toka pebeba i engaton emantoshay, nem toka ingatoy nankebaba.

⁵³ Toka i-akni ni mapteng nga kasapolan sota ira na-agang jet sota ira nankebknang, angken ma-ayshi-anan ira.

⁵⁴⁻⁵⁵ Eg to dibkan i kari to son Abraham tan so ni emin na poli to, ja apo tayo da met laeng. Kaasi-an toy too ton i-Israel ingkatod ingka, jet niman, tinodongan shakito.” Sajay i iyaman nen Maria.

⁵⁶ Si Maria, nan-iyam nin shi baley nen Elisabet ni tedon bolan, asan ka-oli shi baley to.

Nay-anak si Juan ja para bonjag

⁵⁷ Simabi may timpon i-anak nen Elisabet et imanak ni daki.

⁵⁸ Jet idi inamta-an nonta inaskang to tan partido to iyay ya ebadeg ga kaasi nen Apo Shiyos son si-kato, eki-imdeng ira son si-kato.

⁵⁹ Idi maykewalon akew nonta nga-nga, dingkara sota ogadi ni Hodiyo ja shaka pesing ni dakin koyat. Sajay sota kowan sha ey kogit. Istay kowan sha ey Sakarias ngoy ingaran sha nonta nga-nga say iboloy sha met laeng so nen tatang to.

⁶⁰ Nem kowan nen ineto ey, “Enshi, say paingeshan tayo, Juan.”

⁶¹ Kowan ngo nonta ira too ey, “Nem enshi met i partidom ma nanngaran ni Juan.”

⁶² Jet sininjasan shes Sakarias ja tatang nonta nga-nga, nem sipay piyan ton ingaran nonta nga-nga.

⁶³ Jet insinjas nen Sakarias ey aknan sha ni pansodatan to, say isolat toy ngaran na piyan to. Jet say insolat nen Sakarias, “Juan i ngaran

to.” Nasshaaw sota ira totoo nonta binasara sota insolat to.

⁶⁴ Nay-inshas ngo men maka-esel mowan si Sakarias et nan-iyaman son Apo Shiyos.

⁶⁵ Jet emin ira sota inaskang sha, wáray dinmoren na-ap-apil la na-amag. Jet naywáris iyay ya shamag shi emin na nanbaley shima shonshontog shi Jodia.

⁶⁶ Emin ira sota engitneng, kowan sha ey wáres Apo Shiyos so nonta nga-nga. Jet kowan sha ey, “Ngaranto emoy panbedinan ali niyay ya nga-nga?”

⁶⁷ Jet si Sakarias, intorong ni Ispirito Santo nen Apo Shiyos ja mengikowan ey,

⁶⁸ “Salamat son Apo Shiyos, ja Shiyos ni Israel! Tep eg tokito binaybay-an, asan si-katoy mengisedakan son si-katejon totoo to!

⁶⁹ Inbetkagan shakito ni makedsang nga mengisedakan ja mismon poli nen Ari David ja emepiyal la too nen Apo Shiyos nonta bayag da.

⁷⁰⁻⁷¹ Nonta bayag da, say inkari to, si-katoy mengibediw son si-katejo shi emin na toon kabakal tayon makakontra son si-katejo. Sajay i inkowan ira nonta esanto-an na para padto nonta bayag da.

⁷² Say inkari to pay so nodta ap-apo tayo nonta bayag da, kowan to ey todongan to ira ni olay et kenshat ta tongpalen to iyay ya kari ja enshiy kolang to.

⁷³ Say inkari to so nen Abraham ma apo tayo da,

⁷⁴ si-katoy mengibediw son si-katejo shi kabakal tayo, say mewédja-an kito ni olay ja

mansilbi son si-kato,

⁷⁵ ingkatod ketey tayo, ja enshiy to asen na pankodangan tayo ono kebedawan tayo.

⁷⁶ Si-kam ma anak ko, no onba-deg ka di, si-kam ali sota ibetkag nen Apo Shiyos sa Kangeto-an, ja mepangdon mengikowan nodta totoo ey mansekana ira ni imotok to.

⁷⁷ Say mo itoro so nonta totoon Apo Shiyos, ikowan mo ey maysedakan ira nem mepekawanan i basol sha,

⁷⁸⁻⁷⁹ tep si Apo Shiyos ja tayoka shedshedjawa, ebadeg i toka pengisekit son si-katejo. Say arig ni pengisedakan to ali, singa silwan to ali sota totoon imekok shi shalan ja edabi-an, ja istay patey i toshongen sha. Jet si-kato may mengi-tosho son si-katejo ni shalan ja mantoshong shi talna." Sajay i kowan nen Sakarias.

⁸⁰ Sota nga-ngen si Juan, bima-deg, tan en-
emneman. Idi ebadeg ma, nan-iyan ni olay si Juan shima dogad ja naybetaw shi kad-an ni too, ingkatod simabi sota akew wa pengitosho to nonta sigod ja inkowan nen Apo Shiyos ja itoro to nodta tood Israel.

2

Nay-anak si Jesus

¹ Nonta timpon inkay-anak nen Juan, nay-tompong ngon waray inbilin nen Ari Augusto ey mesepol la emin na tood dobong, manpedista ira.

² Sajay i pilmiron sinsos ja na-amag nonta timpon kagobinarol nen Kirino shi Siria.

³ Jet emin ira sota too, dimaw ira ja nanpalista, ja tinonton shay edapo-an ni apo sha.

⁴⁻⁵ Isonga si Jose, dima-jat ngo shi baley tod Nasarit ja ilin Galilia et dimaw shi Bitlihim ma ilin Jodia, ja kawad-an nen Ari David nonta bayag da. Shiman i dinawan nen Jose ja nanpalista-an tep poli nen Ari David. Nan-olop ira nen Maria, ja naykarin esaw-en to et naytompong ngon malokon nontan si Maria.

⁶ Jet nonta wára ira med Bitlihim, simabi sota timpo malen i-anak nen Maria.

⁷ Jet say in-anak to, daki, ja si-katoy besag. Dinampinan to et inparokol tod panganan ni animal. Sinodngan to iyay tep enshiy mebedin na ka-okipan sha nodta baley ya koston shiwesan.

⁸ Nontan na dabi, wára iray emanbantay ni kalniro shi bodosan ja nay-esop shi Bitlihim.

⁹ Jet nontan, nanpa-sas i sakey ya anghil nen Apo Shiyos son si-kara. Jet sota niyal ja edapo son Apo Shiyos, sinilwan to ira et etakot iren pasiya.

¹⁰ Nem kowan nonta anghil ey, “Karekayo ontakot! Dimawak alin mengikowan ni mapteng nga shamag son si-kayo, jet saja ikowan ko, pan-imdengan ni emin na totoo.

¹¹ Niman na dabi, nay-anak sota Apo tayon inkari nen Apo Shiyos nonta bayag da ja en ali mengisedakan son si-kayo. Say nay-anakan to, shi Bitlihim ja ili da nen Ari David.

¹² Say pengimatonan jo so, edampinan sota nga-nga, ja nayparokol shi panganan ni animal.” Kowan nonta anghil.

¹³ Idi naksheng nga inkowan to iyay, shimakel i anghil shi naykayang ja emengikankansiyon ni shayaw sha son Apo Shiyos, ja kowan sha ey,

¹⁴ “Si Apo Shiyos ja wared dangit i mayshed-jaw! Jet niman, iyed jay i mengi-kan ni talna shiya dobong so nonta ira toon kinosto-an to.”

¹⁵ Idi imoli ira sota anghil shi dangit, nantatabal ira sota emanpastol ni kalniro, ja kowan sha ey, “Ondaw kito ka ngarod shi Bitlihim, tayo asen sota nay-anak ka nga-nga ja inpa-amta nen Apo Shiyos son si-katejo.”

¹⁶ Kinano-an shen dimaw shi Bitlihim et simbira si Maria tan si Jose et inon-an sha sota nga-ngen inparokol shed panganan ni animal.

¹⁷ Idi inon-an nonta emanpastol ni kalniro sota nga-nga, inkowan sha son Maria nen Jose sota inkowan ni anghil maypangkep niyay ya nga-nga.

¹⁸ Jet emin ali ira sota engitneng ni inkowan nonta emanpastol ni kalniro, nasshaaw iren pasiya.

¹⁹ Nem si Maria, eg to dibkan iyay ya epalabas, no diket ninemnemnem to ni olay.

²⁰ Imoli ira sota emanpastol ni kalniro, ja ebadeg i iyaman sha so nen Apo Shiyos maypangkep nonta emin na intenengan sha, tan inon-an sha, tep etongpal sota inkowan ni anghil son si-kara.

Indaw sha si Jesus shi Timplo

²¹ Idi edabas i walon akew ni inkay-anak nen Jesus, dingkara sota ogadi ni Hodyos ja shaka pesing ni may-enak ka daki, ja kowan sha ey kogit. Jet inpanngaran sha ni Jesus, tep nonta

eg pay naydokon sota nga-nga, inkowan nonta anghil ey Jesus i ingaran sha so nonta nga-nga.

²² Nonta shimanon sota timpon penongpalan shi Jose nen Maria nonta dinteg nen Moises maypangkep ni biin ipan-anak to, ja kowan sha ey purification, indaw sha iyay ya nga-nga shi Jerusalem say maybidang ey i-awat shay biyag to son Apo Shiyos.

²³ Sajay i inpasing sha tep say naysolat shi dinteg nen Apo Shiyos, “Emin na anak ni Hodiyo ja pangodowan na daki, mesepol la maybidang nga para son Apo Shiyos.”

²⁴ Si Maria tan si Jose, ira engi-kan ni daton sha tep say kowan ni bilin nen Apo Shiyos, mesepol la mengi-kan ira ni daton shen sanparis ja kalopati.

²⁵ Jet nontan, waray tood man ja si Simeon i ngaran to ja nanbaley shi Jerusalem. Makedsang i pamati to son Apo Shiyos, tan eshayaw ey mapteng nga too. Jet toka sesseskera i ketongpal nonta kari nen Apo Shiyos ey waray ibetkag ton mengisedakan ni tood Israel. Jet say Ispirito Santo nen Apo Shiyos, wara son si-kato.

²⁶ Sota Ispirito Santo nen Apo Shiyos, si-katoy engi-kan ni namnama to ey eg nin metey ingkatod on-an to sota naypadto nonta bayag da ey ibetkag ali nen Apo Shiyos ja mengisedakan.

²⁷ Intorong ni Ispirito Santo si Simeon shi Timplo et nontan na akew, indaw ngo nen Maria tan si Jose sota anak sha shi Timplo say dag-en sha sota kowan ni bilin nen Apo Shiyos.

²⁸ Jet si Simeon, inakwal to sota nga-nga asan eman-iyaman so nen Apo Shiyos ja kowan to ey,

²⁹ “Niman Apo Shiyos, tinongpal moy karim et wára ma son si-kak i talna. Si-kak ja baga-en mo, palobosimak ja metey ma,

³⁰ tep inon-an niya showen matak ma i inkowan mon mengisedakan ali,

³¹ ja si-katoy insaganam ma para so ni emin na totoo et si-katoy pengamta-an sha ni pesing shen maysedakan.

³² Si-katoy may-eshig ga silew ja ondawag ni toon eg maka-amta son si-kam Apo Shiyos, tan si-katoy mengi-kan ni kayshedjawan ni toom ja Israel.” Sajay i iyaman nen Simeon.

³³ Sota ama tan ina nonta nga-nga, nasshaaw ira nonta inkowan nen Simeon ni maypangkep niyay ya nga-nga.

³⁴⁻³⁵ Jet kowan pay nen Simeon ey, “Si Apo Shiyos i onbindisiyon son si-kayo. Jet iyay i ikowan ko son si-kam ja ina niya nga-nga. Sajay ya nga-nga, shinotokan nen Apo Shiyos et si-katoy panshoki-an ni pandilinasin ira ni tood Israel. Eshakel i mengokes son si-kato, tan eshakel ngoy memati son si-kato ni pansigshan sha, tep idawdawag toy ngaaw wa nemnem ni eshakel la too. Maydesin ey wára son si-kato si Apo Shiyos, nem bedawen ni eshom. Jet si-kam ja ineto, sajay ya ibalaw sha di son si-kato, si-katoy kesekitan ni posom.”

³⁶⁻³⁸ Waray biin para padto ja eba-kol ja si Ana i ngaran to. Anak nen Panoil, ja poli nen Asir. Nontan met laeng nga oras, mimotok sota eba-kol nodta kawad-an sha et nan-iyaman so nen Apo Shiyos maypangkep nonta nga-nga, jet to inkowan i maypangkep nontan na nga-nga

so ira nonta kait ton emansessesked so nonta ibetkag ali nen Apo Shiyos ja mengisedakan ni tood Jerusalem. Saja eba-kol, piton tawen na ekibiyag son asewa to da nonta kamashikit to et niman, ebalo. Nantawen ni wálon polo tan epat. Wara ni olay shima Timplo; inakew tan dinedabin toka ibiyang i pangan to ni toka panshewat son Apo Shiyos.

³⁹ Idi naksheng nga tinongpal shen emin sota kowan ni bilin nen Apo Shiyos ey dag-en sha, imoli ira shi Galilia, shi baley shed Nasarit.

⁴⁰ Sota nga-nga, bima-deg, tan kimedsang. Enemneman ma, tep tinodongan nen Apo Shiyos.

Ekitongaw si Jesus so nonta ira mamaistoro shima Timplo

⁴¹ Tinaw-en ja sota ama tan ina nen Jesus, ireka ondaw shi Jerusalem ni timpon piyasta ni Hodiyo ja kowan sha ey Paskowa.

⁴² Nonta nantawen si Jesus ni sampolo tan showa, dimaw ira mowan shi Jerusalem ni timpon piyasta.

⁴³ Idi naksheng sota piyasta, dima-jat iren on-akad shi baley sha ma, nem eg amta nen Maria tan si Jose ey edekjas si Jesus shi Jerusalem.

⁴⁴ San-akew ja nan-akad ira ja eg sha dindinmo ey ayshi si Jesus. Kowan sha nem eki-odop nodta kagait sha, nem idi sha inena-enap nodta kad-an ni kagajem sha tan partido sha, ayshi gayam.

⁴⁵ Jet idi eg sha simpol, nay-oli ired Jerusalem et sha inenap.

⁴⁶ Idi maykatdon akew, simbira shi Timplo, ja ekitongaw so nonta ira mamaistoro ni Timplo. Toka itentenengiy kowan sha et nansalodsod ngo son si-kara.

⁴⁷ Jet emin ira sota engitneng ni daing ton onsongbat so nonta ira mamaistoro, nasshaaw iren pasiya.

⁴⁸ Si Maria tan si Jose, nasshaaw ngo ira ni in-asas sha so et kowan nen ineto ey, “Anak ko, apay nga dingkam iyay son si-kami? Si amam tan si-kak, eshanagan kamin pasiya ni ana-anap mi son si-kam.”

⁴⁹ Kowan nen Jesus son si-kara ey, “Dimaw kayo gayam ali ja jowak kepan-enapa? Eg jo aya amta ey mesepol la man-iyanak shi baley nen Amak?”

⁵⁰ Nem eg sha inewatan sota kowan to son si-kara.

⁵¹ Jet si Jesus, ekidaw son si-kara ja imakad shi Nasarit, ja toka pati-en emin i kowan sha son si-kato. Si ineto, emin iyay ya banag, toka nemnemnema shi poso to.

⁵² Si Jesus, bima-deg, makedsang, tan enem-neman tep si Apo Shiyos, wara son si-kato, jet eshakil i toon makapiyan son si-kato.

3

Si Juan ja para bonjag, inshogi toy obda to

¹⁻³ Idi kinsin tawen ja nantoray si Ari Tibirio shi Roma, waray inkowan nen Apo Shiyos ja bilin to so nen Juan ja anak nen Sakarias. Wara nontan si Juan shima dogad ja nay-arawid kadnan ni too. Jet winaswas ton emin i dogad

shima kilig nonta ebadeg ga pa-dok ja kowan sha ey Jordan, ja to intod-an iray totoo. Jet say kowan to, “Mesepol la manbebawi kayo, asan kayoka manpabonjag, say pekawanan nen Apo Shiyos i basol jo.”

Nontan ngon timpo, si Poncio Pilato i gobinarol shi Jodia, si Hirodis ngod Galilia, tan si Felipe ja agi nen Hirodis shi Itoria tan shi Trakoniti. Asan si Lisantias i toray shi Abilini. Say kangeto-an nontan ja pari, si Anas nen Kaipas.

⁴ Sota inpantoro nen Juan, si-katoy nantong-palan nonta padto nen Isaias nonta bayag da, ja kowan to ey wára aliy toon ikeljaw toy esel to shima dogad ja nay-arawí shi kad-an ni totoo, ja ikowan to ey, “Pansagana kayo ni para imotok ali nen Apo! Singpet joy shalan na pan-akshan to!

⁵ No nankinayang i shalan shi shonshontog, simpayo. No kolkolba ja shalan, mesepol ja maydelteg, tan sota ngaaw ngon shalan, mesepol la medimpiyo.

⁶ Jet emin na too, asen shay mengisedakan ja medepo ali son Apo Shiyos.”

⁷⁻⁸ Say kowan nen Juan so nonta ira toon dimaw son si-kato, ja kowan sha ey ira manpabonjag, kowan to ey, “Si-kayo, singa oleg i ogadiyo! Say kowan jo, mebedin na disi-an jon eg meshosa no manpabonjag kayo bengat? Enshi! Mesepol la ma-sas shi ogadiyo ey nanbebawi kayo pangkep nonta basol jo. Karejo panshingan sota kowan jo ey si-kayo ket poli shakejo nen Abraham. Enshi, eg on-anay! Si Apo Shiyos,

mebedinan ton osalen i bato ja palsowa-en na too jet kowan to ey poli nen Abraham.

⁹ Jet niman, wáray naysagana ja may-eshig ey maywa-tek shi damot ni kadasan ja eg ondames ni mapteng. Emin ira jay, mebetang et maypool shi apoy.” Sajay i kowan nen Juan so ni totoon dimaw son si-kato.

¹⁰ Jet sota ira totoo, nansalodsod ira ja kowan sha ey, “Ngaranto ngarod i pesing mi?”

¹¹ Simongbat si Juan ja kowan to ey, “No showay barom, i-kan moy sakey so nonta enshiy osal to. Kasta met no wáray sobdam ja mekan, i-aknim sota ira toon enshi-anan.”

¹² Angken sota ira para singil ni bowis, dimaw ira ngon manpabonjag, jet inbag-an sha ngo si Juan ja kowan sha ey, “Maistoro, ngaranto ngoy pesing mi?”

¹³ Simongbat mowan si Juan ja kowan to ey, “Niman, say singilen jon bowis ira ni totoo, sota koskoston kowan ni gobirno; karejo sodokan.”

¹⁴ Jet sota ira solsharo, kowan sha ngo ey, “Si-kami ngay? Ngaranto ngoy pesing mi?”

Si Juan, simongbat ja kowan to ey, “Sota sowilshoyo, si-katoy enosan jo. Ibi-jag joy joka pesing nga mengeda ni pilak ni too ja joka ira ta-ta-kota tan joka pebesoli ira angken enshiy basol sha.”

¹⁵ Sota ira totoo, idi intenengan shay kowan nen Juan, kowan shen shorog shi nemnem sha ey, “Sigosho sajay emo sota inkari nen Apo Shiyos nonta bayag da ja ibetkag to din mengisedakan.” Jet shaka sesseskeren pasiya nem ngaranto pay i ikowan to.

¹⁶ Nem say kowan nen Juan son si-kara, kowan to ey, “Nem si-kak, dimawak ali ja shanom i inpa-monjag ko son si-kayo. Nem wáray ondaw alin maysa-dat son si-kak ja ebadbadeg i panakabalin to nem say si-kak. Jet ekak pay maykeshi ja angken baga-en to koma ja mengkal ni sapatos to. Jet sotan aliy onbonjag son si-kayo ni Ispirito Santo nen Apo Shiyos, asan pay ya apoy.”

¹⁷ Jet si Juan, in-arigan to ira ja kowan to ey, “Sotan aliy may-eshig ey mengisi-jan ni bekas shi taap. Sota bekas, isingpet tod tado-an, nem sota taap, ipool tod apoy ya emanshedang ni olay ja eg ma-ma-shep.”

¹⁸ Sajay i inpasing nen Juan ni inpamidin to, tan na-na-jew pay i inpasing ton engikowan ni mapteng nga shamag so ira ni totoo.

¹⁹ Nem say inkowan to son Hirodis ja gobinarol shi Galilia, kowan to ey, “Ngaaw i inpiliw mo so nen Hirodiyas ja asewa nen agim. Tan wára pay i eshakil la ngaaw ja aramid mo.”

²⁰ Nem si Hirodis, endedamsis to sota bilin nen Juan son si-kato; mina-ma to et i kakedsel to, ja inbalod to pay si Juan.

²¹ Idi sakey ya akew, ja naksheng iren emin sota totoo ja nanpabonjag, nanpabonjag ngos Jesus so nen Juan. Idi naksheng, nanshawát si Jesus son Apo Shiyos, jet idi maramen eman-shewat, edo-katan i dangit.

²² Jet dimespag aliy Ispirito Santo nen Apo Shiyos son si-kato, ja na-sas ja singa inges toy itsora ni kalopati. Jet si Apo Shiyos, imesel alid dangit ja kowan to ey, “Si-kam i Anak ko et ensemek taka, tan si-kam i naka pan-imdengi.”

Sota ngaran ira nonta makapoli so nen Jesus

²³ Si Jesus, waray tedon tawen to nonta inshogi ton engitosho. Jet say pangkep ira ni karakdan, kowan sha ey anak nen Jose.

Iyay i ngaranganan iren makapoli so nen Jose. Say ama nen Jose, si Eli;

²⁴ say ama nen Eli, si Matat; say ama nen Matat, si Levi; say ama nen Levi, si Melki; say ama nen Melki, si Yanay; say ama nen Yanay, si Jose;

²⁵ say ama nen Jose, si Matatias; say ama nen Matatias, si Amos; say ama nen Amos, si Naom; say ama nen Naom, si Isli; say ama nen Isli, si Nagay;

²⁶ say ama nen Nagay, si Maat; say ama nen Maat, si Matatias; say ama nen Matatias, si Simi; say ama nen Simi, si Josik; say ama nen Josik, si Joda;

²⁷ say ama nen Joda, si Joanan; say ama nen Joanan, si Risa; say ama nen Risa, si Sorobabil; say ama nen Sorobabil, si Salatiil; say ama nen Salatiil, si Niri;

²⁸ say ama nen Niri, si Melki; say ama nen Melki, si Adi; say ama nen Adi, si Kosam; say ama nen Kosam, si Ilmodam; say ama nen Ilmodam, si Ir;

²⁹ say ama nen Ir, si Josue; say ama nen Josue, si Ilisir; say ama nen Ilisir, si Jorim; say ama nen Jorim, si Matat; say ama nen Matat, si Levi;

³⁰ say ama nen Levi, si Simeon; say ama nen Simeon, si Joda; say ama nen Joda, si Jose; say ama nen Jose, si Jonan; say ama nen Jonan, si Iliakim;

³¹ say ama nen Iliakim, si Milia; say ama nen Milia, si Mina; say ama nen Mina, si Matata; say ama nen Matata, si Natan; say ama nen Natan, si David;

³² say ama nen David, si Jesse; say ama nen Jesse, si Obid; say ama nen Obid, si Boos; say ama nen Boos, si Salmon; say ama nen Salmon, si Naason;

³³ say ama nen Naason, si Aminadab; say ama nen Aminadab, si Aram; say ama nen Aram, si Arni; say ama nen Arni, si Isrom; say ama nen Isrom, si Piris; say ama nen Piris, si Joda;

³⁴ say ama nen Joda, si Jacob; say ama nen Jacob, si Isaac; say ama nen Isaac, si Abraham; say ama nen Abraham, si Tari; say ama nen Tari, si Nakor;

³⁵ say ama nen Nakor, si Sirog; say ama nen Sirog, si Ragaw; say ama nen Ragaw, si Pilig; say ama nen Pilig, si Ibir; say ama nen Ibir, si Sala;

³⁶ say ama nen Sala, si Kainan; say ama nen Kainan, si Alpiksad; say ama nen Alpiksad, si Sim; say ama nen Sim, si Noe; say ama nen Noe, si Lamik;

³⁷ say ama nen Lamik, si Matosalin; say ama nen Matosalin, si Inok; say ama nen Inok, si Jarid; say ama nen Jarid, si Makaliil; say ama nen Makaliil, si Kainan;

³⁸ say ama nen Kainan, si Inos; say ama nen Inos, si Sit; say ama nen Sit, si Adan; say ama nen Adan, si Apo Shiyos.

4

Si Satanas, pineshas ton panbesol si Jesus

¹ Si Jesus, nonta inpanbonjag to, wára nodta ebadeg ga pa-dok ja kowan sha ey Jordan. Napno si Jesus ni Ispirito Santo nen Apo Shiyos et idi indekjas toy Jordan, intorong ni Ispirito Santo ja ondaw shima dogad ja arawid kawad-an ni too.

² Epat ta polon akew ja pineshas nen Satanas si Jesus nodtan na dogad ja dinaŵan to, ja piyan ton panbesol. Eg eng-engan nontan na timpo si Jesus, jet idi epospos ma sota epat ta polon akew, na-agang.

³ Jet kowan nen Satanas son si-kato ey, “No agpayson anak toka nen Apo Shiyos, ikowan mo niya bato ey manbedin ni tinapay.”

⁴ Nem si Jesus, simongbat ja kowan to ey, “Enshi, ta say naysolat nonta bayag da ja bilin nen Apo Shiyos, kowan to ey, ‘Aliŵen mekan ni abos i panbiyag ni too.’ ”

⁵ Jet si Satanas, indaw to si Jesus shi ekayang nga dogad et inpa-sas ton emin iray ilid ja dobong ni sankatikan na timpo.

⁶ Kowan nen Satanas son si-kato ey, “I-akan ko son si-kam ma emin iyay ja kokowa-en mo, jet si-kam may mengitoshay ja enshiy maka-inges son si-kam. Ta nay-awat iyay ya emin son si-kak, jet i-awat ko ngo ni piyan kon pengi-kanan.

⁷ Emin ira jay, i-akan ko son si-kam no si-kak i pantedimokoshan mo ja panshedjawan.”

⁸ Nem si Jesus simongbat ja kowan to ey, “Enshi, ta say kowan ni esel nen Apo Shiyos ja naysolat nonta bayag da, kowan to ey si-kato bengat i panshedjawan min totoo tan pansilbi-an mi.”

⁹ Jet si Satanas, indaw tos Jesus shi Jerusalem, jet to inpa-tok nodta Timplo, jet kowan to son Jesus ey, “No agpayson anak toka nen Apo Shiyos, pan-ekas ken medepod jay.

¹⁰ Ta say kowan met ni naysolat nonta bayag da, kowan to ey, ‘Ibilin nen Apo Shiyos so nonta anghil to ey ajowanan shaka.’ Isonga eg ka mesekitan.

¹¹ Tan say kowan pay nonta naysolat, ‘Egni-an shaka ni takday sha, say eg mesekitan i sedim ni bato.’ ”

¹² Nem si Jesus, simongbat ja kowan to ey, “Enshi, ta say kowan mowan ni naysolat nonta bayag da, kowan to ey eg mi pedpeshasen si Apo Shiyos ja pengasan mi nem i-agpayso to sota inkowan to.”

¹³ Idi naksheng ja pineshas nen Satanas ja inparas ton emin i kabaalan to, ja piyan ton panbesol si Jesus, indekjas to nin.

¹⁴ Jet si Jesus, nay-olid Galilia, ja wára ma son si-katoy panakabalin ni Ispirito Santo nen Apo Shiyos. Sota shamag pangkep son si-kato, naywáris shi emin na ilid man.

¹⁵ Jet si Jesus, nantoro shima sa-nopan ni Hodiyo et eshakil iray engiredjaw son si-kato.

Si Jesus, dinamsis ira nonta kaidiyan to

¹⁶ Dimaw si Jesus shi Nasarit, ja ilin bina-degan to. Ogadi ton emekisa-sa-nop so nonta ira kait ton Hodiyo shima baley ja sa-nopan sha no akew ja kepanngidin ni Hodiyo. Isonga idi shimanon sota akew ni ngilin, dimayat nodta sa-nopan ja ibasa toy sakey so nonta inpaisolat nen Apo Shiyos nonta bayag da.

¹⁷ Jet say in-awat shen ibasa to, sota naysolatan ni padto nen Isaias. Binitdag to et simbi to sota naysolatan ni padton kowan to ey,

¹⁸ “Sota Ispirito Santo nen Apo Shiyos, wára son si-kak. Shinotokan towak ja mengitoshon ni mapteng nga shamag so ni nankebiteg. Inbetkag towak alin mengipedawag ni kaybodosan ira ni ebalod, say man-esas iray nankekorab, tan inbetkag towak alin mengi-kan ni pannam-ayan ira ni toon kepedigata ni kait sha,

¹⁹ tan en mengipedawag nem pigan aliy timpon kaysedakan ni totoo nen Apo.”

²⁰ Idi naksheng nga inbasa nen Jesus iyay, kinopikop to sota papil la naysolatan to, jet in-oli to ja in-akan so nonta para tolong nodta sa-nopan ni Hodiyos. Timongaw ja mengitoshon et emin ira sota too, shaka iningning ni shaka pansesked ni ikowan to pay.

²¹ Jet kowan to son si-kara ey, “Sajay ya padton nen Isaias nonta bayag da ja inbasak son si-kayo, nayto-to-wá ma niman.” Kowan nen Jesus.

²² Jet sota toon engitneng, shaka kosto-is Jesus, nem nasshaaw iren emin nonta kalaing ton man-a-sel, ja kowan sha ey, “Aliwén sajay aya sota anak nen Jose?”

²³ Jet kowan nen Jesus ey, “Amtak ey endedam-sis jo iya naka dagdag-a, ja ikowan jo son si-kak sota arig ga kowan to ey, ‘Doktor, agasim koma nin shorog i bakdang mo.’ Asan ikowan jo pay son si-kak ey, ‘Dagam nin shiya ilim i kaskasshaaw wa milagro, no agpayso sota shinemag min inpasing mod Kapirnaom.’

²⁴ Nem iyay i ikowan ko son si-kayo. Sota toon mengikowan ni esel nen Apo Shiyos, enshiy shayaw tod ili ton mismo.

²⁵ Singa inges to nonta timpon Elias nonta bayag da, ja eg to inpan-oran ni tedon tawen tan enem ma bolan. Paladoy bitil shi emin na dogad shi Israel. Jet nontan, eshakil la agpayso i ebalo shiya Israel,

²⁶ nem eg dimaw si Elias so ni angken sakey koma son si-kara. Say dinawan to et ngo mowan, sota ebalo ja i-Siripta, ja nanbaley shi sakop ni Sidon.

²⁷ Asan sakey pay, eshakil iray ebaybayang nga emin i bakdang to ja wara shi Israel nonta timpon Ilisio ja para padto, nem angken sakey son si-kara, enshiy en na-agasan. Nem say na-agasan et ngo mowan, si Naaman bengat ja i-Siria." Kowan nen Jesus.

²⁸ Jet emin ira sota toon wara nodta baley ja sa-nopan ni Hodiyo nontan, ireka onbanonget ni inteneng sha so niyay.

²⁹ Jet ebiglen singkel sha et inkoyod shen inpa-kal nodta ili sha et indaw sha nodta toktok ni shontog ja nanbaljan sha, ja kowan sha ey sha i-ekas nodta shepdas.

³⁰ Nem nan-akad si Jesus shi kawa ira nonta eshakil la totoo et indekjas to ira.

Inpabtik nen Jesus i dimonyo ja wara nodta toon eman-engaw

³¹ Dimaw si Jesus shi Kapirnaom ja ili ni Galilia, jet toka itod-i ira ma totood man nem akew ja kepanngidin ni Hodiyo.

³² Emesshaaw sota totood man ni toka pengi-tosho tep agpayson wáray pateg ni toka ikowan.

³³ Jet nonta wáres Jesus nodta baley ja sa-nopan, wára ngoy sakey ya toon eman-engaw ja pingketan ni dimonyo. Jet inkedsang nontan i keljaw to, ja kowan to ey,

³⁴ “A! Ngantoy! Dimaw ka di ja en mene-shal son si-kami? Enshiy kaybiyangan mo son si-kami, Jesus ja i-Nasarit. Amtak nem sipa ka: si-kam sota shinotokan nen Apo Shiyos ja inbetkag to di!”

³⁵ Si Jesus, sinelkag to sota dimonyo, ja kowan to ey, “Eka-eket ka! Ilekjas mo ita too!”

Jet sota dimonyo, inbes-ig to sota too nodta naykawa ira nonta totoo jet indekjas to sota too. Nem pesed da, eg to sinekitan.

³⁶ Nasshaaw iren emin sota toon engasas, jet kowan sha ni sakey tan sakey son si-kara ey, “Epateg ga emin i banag ni toka ikowan! Kabaalan ton pemapteng i nemnem ni eman-engaw! No ikowan to ey onbetik i dimonyo son si-kara, ireka onbetik ka agpayso!”

³⁷ Jet sajay ya shamag pangkep so nen Jesus, naywáris shi emin na dogad ja nay-esop shiman.

Inpamapteng nen Jesus ira sota totoon emansekit

³⁸ Indekjas nen Jesus sota baley ja kesa-nopi ni Hodiyo et dimaw shi baley nen Simon Pedro. Sota inepo nen Simon ja bii, emansekit, ja epaladoy petang ni bakdang to. Jet inpa-amtara son Jesus ey emansekit.

³⁹ Si Jesus, dimaw, ja to inon-an nodta katiri to, jet inkowan to nonta sakit ey ma-kal et na-kal la agpayso. Jet bimangon na shagos sota bii et inkamakaman to ira.

⁴⁰ Idi mama-shem mala, emin ira sota wáray kajem to ja emansekit ni ekalkalasin sakit, indaw sha ira son Jesus. Insakpal nen Jesus i takday to so ni sakey tan sakey son si-kara et mimapteng iren emin.

⁴¹ Angken sota ira dimonyon pimeket shi totoo, bimetik ira, ja kaonkaneljaw, ja kowan sha ey, “Si-kam sota Anak nen Apo Shiyos!” Nem si Jesus, sinelkag to ira tep amtara ey si-kato sota inkari nen Apo Shiyos nonta bayag da ja inbetkag to di.

⁴² Idi palbangon ma, indekjas nen Jesus sotan na dogad jet dimaw shi naydasin na dogad ja enshiy totoo. Nem emin ira sota totoo, dimaw iren sha inenap et idi simpol sha, inparas shen inpeked.

⁴³ Nem kowan to son si-kara ey, “Mese-pol ja nak ikowan shi eshom ma dogad ngo sota mapteng nga shamag maypangkep ni pantoshayan nen Apo Shiyos, ta si-katoy obdak ja inbetkagan towak so nen Apo Shiyos.”

⁴⁴ Jet nantoro shima balebaley ja sa-nopan ni Hodiyo shi ka-ili-ili ni Jodia.

5

Kaskashaaw ja inpangadara ni eshakil la nigay

¹ Idi sakey ya akew, wára si Jesus nodta kilig ni baybay ni Ginasarit et sota ira totoo, insopan

shen pasiya, ja inedibongbongan sha. Shaka pan-itenengin pasiya sota toka pan-ikowan ja esel nen Apo Shiyos,

² jey on-an to i showen bangka shima kilig ni baybay ja naytangkag. Sajay ya bangka, indekjas ira nonta emannikay tep shaka pan-idaba sota embanaw wa balshew sha.

³ Si Jesus, en nandogan nodta bangka nen Simon et inkowan to son Simon ey itolshon to sota bangka say onbetaw ni otik shima kilig ni baybay. Timongaw si Jesus nodta bangka et tinod-an to ira sota eshakil la totoo.

⁴ Idi naksheng nga nan-esel si Jesus, inkowan to so nen Simon ey, “Igewam iya bangka shima debeng nga shanom et si-kam tan sama kait mo, i-kas jo ira ta balshew jo say waray mekna.”

⁵ Kowan nen Simon ey, “Apo, nan-obda kamin pasiya ni sandabi, nem enshin polos i mi kinna. Nem no si-katoy kowan mo, iparas kon i-ekas.”

⁶ Idi in-ekas sha sota embanaw wa balshew sha, nakna iray eshakil la nigay. Istay pay ya mebi-nik sota balshew.

⁷ Isonga tina-way sha sota kait sha ja wara nodta sakey ya bangka ja on-atang pay son si-kara. Dimaw ira di et pinnora sota showen bangka ni nigay, jet istay pay ya ondened ira.

⁸ Idi inon-an nen Simon Pedro iyay, nantolimokod shi sango-an nen Jesus, jet kowan to ey, “Ilekjas mowak Apo, ta si-kak, eshakil i basol kon too!”

⁹ Si Simon tan sota ira emin na kait to, nasshaaw ira nonta eshakil la ninikay sha.

¹⁰ Eshakel i kait nen Simon nontan et say showa son si-kara, si Santiago nen Juan, ja san-agin anak nen Sibidi, ja sigod ja ka-od-odop nen Pedro ni olay.

Kowan nen Jesus so nen Simon ey, “Kareka ontakot; manshoki ma niman, aliwa men nigay i obdam, no diket mengolnong ka ma ni too ja itod-an mo para son si-kak.”

¹¹ Idi inkowan nen Jesus iyay, inkoyod sha sota bangkara shima kilig ni baybay. Indekjas sha sota ira bangkara, tan angken pay sota emin na kokowa sha, jet nay-olop ira son Jesus ja nanbalin iren too to.

Inpamapteng nen Jesus i bakdang nonta toon ebayabayang

¹² Idi pinsak, wara si Jesus nodta sakey ya ili ja kawad-an ni toon ebayabayang i bakdang to. Idi inon-an tos Jesus, injokmos toy dopa tod bo-day ja simango son Jesus, ja kowan to ey, “Apo, no piyan mo, pamapteng mo iya bakdang ko, say eg sha-ak seskigen ni totoo.”

¹³ Jet si Jesus, inojad toy takday to et pinishat to sotan na too. Jet kowan nen Jesus son si-kato ey, “Siya, piyan kon onmapteng ka.”

Jet nay-inshas ngon na-omas sota bayang nonta too.

¹⁴ Jet si Jesus, binidin to sotan na too, ja kowan to ey, “Karam ikokowan iyay so ni eshom, no diket pandiritso ka et ja ondaw shima pari. Ipa-sas mo ita bakdang mo son si-kato, ja mimapteng ma. Jet pangidaton ka nonta kowan nen Moises shi dinteg ey maydeton son Apo

Shiyos, say amta-en ni karakdan ey si-kam, enshi may bayang mo.” Kowan nen Jesus son si-kato.

¹⁵ Nem sota shamag maypangkep so nen Jesus, asdeg ton naywaris pay shima angken arawin dogad jet sota ira eshakil la totoo, dimaw iren en nanteneng ni kowan to, tan sha inpa-ekas i sakit sha.

¹⁶ Nem indekjas to sota eshakil la totoo et dimaw shima dogad ja nay-arawid kawad-an ni totoo, ja en nansawat so nen Apo Shiyos.

Inpamapteng nen Jesus sota toon eg maka-akad

¹⁷ Idi sakey ya akew, emantoshon si Jesus, jet wara ira sota Parisiyo tan mamaistoro ni dinteg ni Hodiyo ja timanongaw. Edapo ired ma emin na ili ni Galilia, Jodia, tan shi Jerusalem. Sota panakabalin nen Apo Shiyos ja mengkal ni sakit, wara son Jesus.

¹⁸ Jet nontan, wara ngo diy totoo ja emangtal ni toon eg onkeykey i bakdang to, ja idaw sha son Jesus. Inparas shen isekep nodta baley ja kowan sha ey sha peshokol koma shi kad-an nen Jesus.

¹⁹ Nem eposek et enshiy pesing shen mengiskep. Say inpasing sha ma, inkalab sha nodta atep ni baley ja nanshekdan et binotbotan sha sota atep, asan shaka oy-oya sota toon shimokol shi amaka. Jet insepara nodta kawa ira ni totoo, ja kad-an nen Jesus.

²⁰ Idi inon-an nen Jesus i ebadeg ga pamatira, kowan to nonta toon inoy-oy sha ey, “Kajem ko, sota basol mo, epakawan.”

²¹ Sota ira mamaistoro ni dinteg ni Hodiyo, tan sota ira Parisiyo, ja wára nodtan, kowan shed nemnem sha ey, “Sipa iyay ya toon toka pa-so-is Apo Shiyos! Kowan to ey ememekawan ni basol, ey enshi met i eshom ma memekawan ni basol, nem eg si Apo Shiyos bengat!”

²² Nem si Jesus, amta toy wáred nemnem sha et kowan to son si-kara ey, “Apay nga joka sopngiled poso jo iyay ya kowan ko?”

²³ Say kowan jo, inba-ngat kon memekawan ni emin na basol niyay ya too ey ekak kabaalan? Nem iyay i dag-en kon pati-an jo so. Ikowan ko niyay ya too ey man-ekad,

²⁴ jet no man-ekad, amta-en jo ey si-kak sota in-padtora nonta bayag da ey Anak ni Too. Amta-en jo pay ey wáray kalintegan kod ja dabaw ni shaga ja memekawan ni basol ni too.” Jet si Jesus, inkowan to nonta toon eg man-ekad ey, “Ikowan ko son si-kam, alam ita amakam, jet akad ka.”

²⁵ Sota too, bimangon na shagos et inda to sota amaka ton toka shokoli, ja inon-an ira nonta eshakil la too. Jet nontan ma ey imakad sota toon inpamapteng nen Jesus ja eman-iyaman son Apo Shiyos.

²⁶ Emin ira sota totoo, nasshaaw ira tan naykel-ewan ira, nem inshayaw sha met laeng si Apo Shiyos, ja kowan sha ey, “Kaskasshaaw iyay ya inon-an tayo niman.”

Inodop nen Jesus si Levi jet nanbalin ni too to

²⁷ Idi naksheng iyay, si Jesus, bimo-day et inon-an to sota para singil ni bowis ja nanngaran

ni Levi, ja eman-obded opisina to. Kowan nen Jesus son si-kato ey, “Kala, kay-olop ka son si-kak et manbedin ka ni took.”

²⁸ Jet si Levi, indekjas ton emin et nay-olop son Jesus ja nanbalin ni too to.

²⁹ Si Levi, nanpiyasta ni ebadeg shi baley to para son Jesus et eshakil iray kait ton para singil ni bowis tan wára pay i eshom ma totoo ja inewis ton ekipengan nontan na piyasta to.

³⁰ Nem sota ira eshom ma Parisiyo, tan sota mamaistoro ni dinteg ni Hodiyo ja kait sha, inriri sha so nonta ira too nen Jesus ey, “Apay nga kayoka emekipengan tan emeki-inom so ira nima para singil ni bowis tan sama eshom ma toon enshiy kenshat sha, ja eshakil i basol sha?”

³¹⁻³² Nem idi intenengan nen Jesus iyay ya kowan sha, simongbat son si-kara, ja kowan to ey, “Ekak ali dimaw ja mengewis ni toon maronong, nem dimawak ali ja mengewis ira nonta toon eshakil i basol sha, say manbebawi koma ira. Mebedin na may-eshigak shi doktor. Eg bisita-en ni doktor i enshiy sakit to, no diket sota waray sakit to bengat i bisita-en to.”

Inbag-an shes Jesus pangkep nonta too ton eg mengibiyang ni pangan

³³ Kowan ira nonta totoo son Jesus ey, “Sota too nen Juan ja para bonjag, kanayon na shaka ibiyang i pangan nem manngidin ira, tan ireka manshewat pay, tan angken pay ira ja too ni Parisiyo, inges to ngoy shaka pesing. Nem apay nga sama ira toom ket ireka mengan tan eman-inom ja eg ira ngo manngidin?”

³⁴ Say songbat nen Jesus son si-kara, in-arig toy bakdang to shi dakin engasewa. Isonga kowan to ey, “Piyon jon ikowan ey mepidit sota ira bisita shi kasal ja eg ira mengan angken wara sota dakin engasewa? Enshi, kenshat ta mengan ira.

³⁵ Nem wara et mangoy timpon onmotok ali ja ma-enshi son si-kara sota dakin engasewa, jet si-katoy timpon ibiyang sha so ni pangan sha maypangkep ni daringit sha.”

³⁶ Si Jesus, inkowan to mowan i sakey ya arig son si-kara, ja kowan to ey, “Na-alas no pi-katen i badon baro ja isakab shi shaan na baro. Ta no sajay i pesing jo, mesepol la sheshalen jo sota badon baro, jet sota badon sakab, no isakab jo nodta shaan, eg may-enam.

³⁷ Tan na-alas no may-iyon i badon adak shi na-osal la inemag shen katat ja ijanan ni adak, ja kowan sha ey ‘wineskin’. No sotan i pesing jo, pepetjag nonta badon adak sota nay-iyon to et onkawas sota adak. Tan angken pay sota nay-iyon to, mepilshi.

³⁸ Mesepol ja no badon adak, bado ngoy kay-inan to.

³⁹ Nem sota ira toon naydowam ja enginom ni shaan na adak, eg sha nin piyan sota bado tep kowan sha ey, ‘Mapteng met sota shaan.’ ”

6

Nanriri sota ira Parisiyo ni maypangkep nonta dingka ni too nen Jesus

¹ Nonta akew ni ngilin ni Hodiyo, nanshalan si Jesus shi oma ja emola-an, jet sota ira too nen

Jesus, ematod ira nonta naymola jet kinotim shen kinan.

² Jet sota eshom iren Parisiyo, kowan sha son si-kara ey, “Apay nga joka dagdag-a itan ey kaiparit ni dinteg tayon Hodiyo i mengetod no akew ni ngilin?”

³ Si Jesus, simongbat ja kowan to ey, “Arig to ngo sota inpasing nen Ari David nonta bayag da ni inka-ekang to, tan sota ira too to. Apay eg jo aya amtay dingka to?”

⁴ Dimaw shima tolshen baley ya para son Apo Shiyos et inda to sota tinapay ya naydaton son Apo Shiyos, jet kinan to. Jet in-aknan to pay ira sota too to. Sajay i dingka to anta nga nayparit son si-kato tan sota ira kait to i pangan sha nontan na tinapay ya naydaton son Apo Shiyos. Ta sota pari bengat i palobos sa mengan nontan na tinapay.”

⁵ Tan kowan pay nen Jesus ey, “Si-kak ja kowan nonta para padto nonta bayag da ey Anak ni Too, si-kak i mengikowan no ngantoy mebedin na dag-en no akew ni ngilin.”

Inpamapteng nen Jesus sota toon eki-ngoy

⁶ Idi sakey mowan na akew ni ngilin, dimaw si Jesus shi sa-nopan ni Hodiyo ja en nantoro. Jet nontan, naytompong ja wara nodtan i toon eki-ngoy i kanawan na takday to.

⁷ Sota mamaistoro ni dinteg ni Hodiyo tan Parisiyo, shaka si-siimi no waray ekasan to nontan na akew, tep kowan sha ey balang nem waray dag-en to ja ikowanan sha so ey

nanbasolan to. Ta nayparit kono shi dinteg sha i pengekas no akew ni ngilin.

⁸ Nem si Jesus, amta toy wared nemnem sha, jet say kowan to nonta toon eki-ngoy i takday to, “Dayat ka et daw ka did ja sango.” Jet sota too, dimayat et dimaw nodtan.

⁹ Jet kowan nen Jesus so nonta ira emeniim son si-kato ey, “Nemnem jo kari iyay. Ngaaw aya i pandeka ni mapteng, ono pemiyaq ni too, no timpon ngilin? Enshi: say ngaaw ja kaiparit ni dinteg tayo, sota pandeka ni ngaaw tan pemono.”

¹⁰ Insi-ning to iren emin, asan to ikowan nonta toon eki-ngoy i takday to ey, “Oyad mo ita takday mo.”

Pinati to sota kowan nen Jesus et mimapteng mowan na agpayso sota takday to.

¹¹ Nem sota ira Parisiyo, ireka onbanonget et nantatabal ira nem ngantoy pesing sha son Jesus.

Pinidi nen Jesus sota sampolo tan showa ja apostol to

¹² Nontan na timpo, dimaw si Jesus shi shontog ja en nanshawit ni sandabi son Apo Shiyos.

¹³ Idi na-akew, sina-nop to ali ira sota too to et pinispis toy sampolo tan showa son si-kara. Jet inngadnan to ira ja sampolo tan showa ni apostol to.

¹⁴ Sajay iray ngaran sha: si Simon ja inngadnan ton Pedro, tan si agin Pedro ja si Andres; tan say kait sha pay ja apostol, si Santiago, Juan, Felipe, Bartolome,

¹⁵ Mateo, Tomas, Santiago ja anak nen Alpio, si Simon ja bitirano,

¹⁶ si Judas ja anak nen Santiago mowan i ngaran to, tan si Judas Iskariote ja mengileko ali son Jesus shi anongosto.

Si Jesus, eshakil i intod-an ton too

¹⁷ Si Jesus, shimalong ja nay-olop so nonta apostol to et simalsheng ira nodta eshekdanan. Jet wára ngo ira nodtan i eshakil la too to, tan eshakil pay iray totoon edapod ili ni Jodia, Jerusalem, tan shi kilig ni baybay ja siyodad ja kowan sha ey Tira tan Sidon.

¹⁸ Dimaw iren en nanteneng ni kowan nen Jesus tan sha pay inpa-ekas i sakit sha. Angken sota ira toon pingketan ni dimonyo, dimaw ngo iren nanpa-ekas jet mimapteng ma ira.

¹⁹ Emin ira sota too, piyan shen pishaten si Jesus, ta makedsang nontan i panakabalin ton mengkal ni sakit, jet mimapteng iren emin.

²⁰ Jet si Jesus, insi-ning to ira sota too ton eshakil et kowan to ey, "Si-kayon nankebiteg, bindisiyonan shakejo nen Apo Shiyos, ta mayda-kam kayod pantoshayan to!

²¹ Mebindisiyonan kayon nanka-agang niman, ta mepnek kayo di! Mebindisiyonan kayon emannengis niman ni daringit jo, ta mandadsak kayo di!

²² Mebindisiyonan kayo no okesen shakejo ono eg sha ikarin kait shakejo, ono bebaingan shakejo, ono ikowan sha ey ngaaw kayo tep too takejo.

²³ Pan-imdeng kayo no sajay i mepesamak son si-kayo, ta ebadeg i naytalo shi dangit ja kon-oren jo ali. May-inges kayo nodta ira para padto nen

Apo Shiyos nonta bayag da, ja pinedigat ngo ni too nontan da.

²⁴ “Nem kakaasi kayon pasiya ja toon say kawad-an ni dadsak jo ket etopog shima kokowayo. Nam-ay i joka panbiyag!

²⁵ Kayoka emepmepsel niman, nem wára diy timpon ma-ekang kayo! Kayoka mandaddadsak niman, nem wára diy timpon inangis joy daringit jo!

²⁶ “Kakaasi kayo di no shakejoka i-et-etek tan ishayaw ni karakdan. Tep sota karakdan, enshiy semek sha so nonta ira toon Apo Shiyos. Angken nonta bayag da, sota ira sinan para padto ja o-owap i kowan sha, si-kara et ngo mowan i in-etek ni karakdan, jey aliwén sota koston inbetkag nen Apo Shiyos.

²⁷ “Nem iyay i ikowan ko son si-kayon emen-gitneng son si-kak. Sota makakontra son si-kayo, semek jo mango tan dagejoy mapteng so ira nonta mengokes son si-kayo.

²⁸ No wáray mengi-ebig son si-kayo, ikowan jo ey, ‘Si Apo Shiyos komay ontolong son si-kam.’ Irewáti jo son Apo Shiyos ira sota ememedigat son si-kayo.

²⁹ No wáray menengpel ni tamil mo, itodok mo pay ya angken pinshowa-en tod piig. No wáray mengeda ni jakit mo, itodok mo pay ya angken al-en toy barom.

³⁰ No wáray manbeka son si-kam, i-kan mo son si-kara i piyan sha. Tan no wáray indaren kokowam, angken eg mo en odi-en.

³¹ Sota piyan jon pesing ni eshom son si-kayo, si-kato ngoy pesing jo son si-kara.

³² “No say ensemek jo bengat ket sota toon ensemek shakejo ngo, eg shakejo i-etek nen Apo Shiyos. Ta sotan met laeng i kepesing ira nonta enshiy pamatira son Apo Shiyos.

³³ No say dag-anan mo so bengat ni mapteng ket sota ira toon mapteng i shaka pesing son si-kayo ngo, eg shakejo i-etek nen Apo Shiyos. Ta angken sota ira enshiy pamatira son Apo Shiyos, mapteng i shaka pesing so ni kait sha.

³⁴ Tan no say pebodoran jo bengat ket sota joka namnama ey i-oli to, eg shakejo i-etek nen Apo Shiyos. Ta angken sota ira enshiy pamatira, ireka emanbibinodod, jet odi-en sha met laeng sota kabebilang to!

³⁵ No waray kowan to ey memodod son si-kayo, pabodori jo ira, angken eg to i-oli. Semek joy makakontra son si-kayo, tan mapteng koma mangoy pesing jo son si-kara. Ta no satan i pesing jo, joka pan-ipa-sas ey annak shakejo nen Apo Shiyos ja Kangeto-an. Ebadeg i kon-oren jon isobadit nen Apo Shiyos tep si Apo Shiyos, mapteng i toka pesing ni emin na too, angken sota eg man-iyaman son si-kato tan sota makedsel.

³⁶ Kaasi-i joy eshom ja inges toy kepesing nen Apo Shiyos!

³⁷ “Karejo nemnemen i nankamali-an ni eshom ja si-katoy pengikowanan jo ma ey ngaaw ira, say eg ngo ikowan nen Apo Shiyos ey ngaaw kayo.

³⁸ I-akniyo iray eshom et si Apo Shiyos i mengi-kan ngo son si-kayo. Sota karakel ni joka i-akan, si-kato ngoy karakel ni i-akan nen Apo

Shiyos son si-kayo. Nem i-aknan tokejo ni sobda, ja angken iteded jo tan itelneg jo, onja-bis pay ali shi sango jo.”

³⁹ Si Jesus, in-arigan to ira, ja kowan to ey, “Say toon ekorab, mebedin ayen mengibalnay ni kait ton korab? Eg ira aya ma-kas sa showa shi pel-og?”

⁴⁰ Waray nandasinan nonta maistoro nem say sota man-ashal, jet sota man-ashal, toka onoray kaitoro ni maistoro. Jet no meksheng may ashal to, man-inges ira ma nonta maistoro.”

⁴¹ In-arigan to pay ira ja kowan to ey, “Apay nga sota ootik ka naybosi shi mata ni kait mo i moka iningning, ey si-kam ma mismo ket eg mo nemnemen ey ebadeg i naypadkal shi matam?”

⁴² Na-alas ja mo ikowan so ni kait mo ey a-kalen mo sota naybosi shi mateto, ey si-kam ket ebadeg i naypadkal shi matam ma shorog. Ngaaw ita moka pesing ja moka idibak i ngaaw wa nemnem mo! Ekal mo nin sota mismon naypadkal shi matam say kosto may pan-esas mo, et say asen mo men pasiya sota a-kalen mon naybosi shi mata ni kait mo.

⁴³ “Sota molen ngaaw, eg ondames ni mapteng, nem say mapteng nga mola, mapteng ngoy dames to. Jet sota ngaaw wa mola, ngaaw ngoy dames to.

⁴⁴ Emin na mola, ma-amta-an i kalasi to no ondames. Sota kowan sha ey higos, say dames to ngo, higos; aliwen medepod sebit. Tan eg meboshas i kowan sha ey obas shi kompormi.

⁴⁵ Sota mapteng nga too, mapteng ngoy wared poso to jet si-kato ngoy toka dagdag-a. Nem say

toon ngaaw, ngaaw ngoy wáred poso to et ngaaw ngoy aramid to. Ta sota wáred nemnem ni too ni olay, si-kato ngoy onbo-day shi bongot to ja esel.

⁴⁶ “Apay nga kayoka mengewag ey apo jowak, nem sota naka ikowan ket eg jo met tongpalen?”

⁴⁷ Emin ira sota ondaw alin piyan ton manbedin ni took, no itenengan toy esel ko, tan pati-en to,

⁴⁸ may-eshig shi toon engitowen ni baley tod naypilmin bato. Kinaotan toy naydeshek et intowen toy tokod to nodtan na naypilmin bato. Idi nandayos ali ni makedsang, nanshalan nodta baley, nem eg to tinowang, tep na-det i naytowan nonta tokod to.

⁴⁹ Nem sota toon intenengan toy kowan ko, nem eg to pati-en, may-eshig shi toon engitowen ni baley tod bo-day ja enshiy naytowanen ni tokod ton na-det ta bato. Idi nandayos ali, nanshalan nodta baley i shanom jet shinepos ton shagos jet kolpin epilshi sota baley.”

7

Inpamapteng nen Jesus sota emansekit ja baga-en ni solsharo

¹ Idi naksheng nga inkowan nen Jesus iyay ya emin so nonta ira too, dimaw shi Kapirnaom.

² Jet nodtan, waray baga-en ni kapitan ni solsharo ni Roma, ja ngannganin metey ni sakit to. Sajay ya baga-en, ensemek nonta apo to.

³ Isonga idi shinemag nonta kapitan i may-pangkep son Jesus, engibetkag ni pangolo ira ni Hodiyo ja mengodop son Jesus, ja en mengekas nonta baga-en ton emansekit.

⁴⁻⁵ Dimaw ira son Jesus ja sha inkowan ey, “Sajay ya kapitan, ensemek tokitejon Hodiynos. Nankasto noman ja nanpa-emag shorog ni baley ya sa-nopan mi. Isonga pangaasim koma apo, mesepol ja todongan mo ngo.”

⁶ Jet si Jesus, ekidaw son si-kara, jet idi nay-esop mes Jesus nodta baley, engibetkag sota kapitan ni kagajem ton en mengi-aspol ni kowan to. Kowan ira nonta inbetkag to ey, “Apo, angken eg ka ontoloy kono shi baley to, ta eg kono maykeshi ja ondaw ka shi baley to,

⁷ tan embaing konon manpeshang son si-kam. Angken on-anay kono sota esel la ikowan mo et onmapteng ma ima baga-en to.

⁸ Amta to ta paras to ey angken esel bengat, kaon-anay. Ta si-kato waray apo to, jet wara ngoy solsharo ja intorayan to. No ikowan to nonta sakey ey ondaw, pati-en to, jet no tewalen to sota sakey, ondaw ali. Kasta met sota baga-en to, no ikowan to son si-kato ey, ‘Obdam iyay’, dag-en to.” Kowan ira nonta inbetkag ni kapitan.

⁹ Idi intenengan nen Jesus iyay ya kowan nonta kapitan ey sota esel nen Jesus i on-anay, nasshaaw wa pasiya si Jesus. Nanposipos et kowan to so nonta eshakil la toon imonod son si-kato ey, “Istay sota Hodiynos koma i makedsang i pamatira son Apo Shiyos, nem enshi et ngo mowan i nak inon-an son si-kara ja maka-inges ni pamati niyay ya aliwen Hodiynos!”

¹⁰ Sota ira inbetkag nonta kapitan, nay-oli ired baley to et simbira sota baga-en ja pimesed ma.

Sota etey ya anak ni ebalon bii, inpanbiyag mowan nen Jesus

¹¹ Idi maykadwen akew, dimaw si Jesus shi siyodad ja kowan sha ey Nain. Sota eshakil la toon imonod son si-kato, tan sota ira too to, nay-olop ira son si-kato.

¹² Idi nay-esop ma ira nodta siyodad, wara iray toon edapo nodtan na siyodad ja en mengiponpon ni etey. Sota dakin etey, si-kato bengat i anak nonta biin eballo. Wara sota bii ja nay-olop, tan eshakil pay iray toon eki-odop son si-kato.

¹³ Idi inon-an nen Apo Jesus sota bii, nayse-mekan et kowan to so nonta bii ey, "Kareka onnangis."

¹⁴ Dimaw et to pinishat sota inosal shen in-pamantag nonta etey, jet sota toon emantag, simalsheng ira. Jet kowan nen Jesus ey, "Si-kam balodaki, bangon ka!"

¹⁵ Jet sota etey ja too, ebiyag mowan! Bimangon et imesel, jet say kowan nen Jesus so nonta ineto, "Olop mo iya anak mo."

¹⁶ Emin ira sota engasas, nasshaaw ira, tan in-shayaw shes Apo Shiyos ja kowan sha ey, "Niman wara may engaton para padto ja naydaok son si-katejo!" Tan kowan sha pay ey, "Si Apo Shiyos, dimaw alin mengisedakan ni too to!"

¹⁷ Sajay ya shamag ja maypangkep son Jesus, naywaris shi emin na ili ni Jodia tan shima dogad ja nay-esop shiman.

Si Juan, engibetkag ni en mengiro-pet so nen Jesus

¹⁸ Sota too nen Juan, shinemag sha ngo sota emin na inpasing nen Jesus et inkowan sha son Juan.

¹⁹ Jet tinewal nen Juan i showa son si-kara et inbetkag ton en mengibeka son Jesus nem si-kato sota inkari nen Apo Shiyos nonta bayag da ey ibetkag to di ja mengisedakan, ono waray apil la seskeshen sha.

²⁰ Isonga idi dimaw ira son Jesus, kowan sha ey, “Si Juan ja para bonjag, inbetkag shakami ja en mengibeka nem si-kam sota inkari nen Apo Shiyos nonta bayag da ey ibetkag to di ja mengisedakan. Si-kam, ono waray apil alin seskeshen mi?”

²¹ Nontan na oras, si Jesus eshakel iray in-pamapteng ton emanpansekit, inpan-asas to iray nankekorab, tan angken sota toon pingketan ira ni dimonyo, inpamapteng to ira.

²² Isonga say songbat nen Jesus so nonta ira toon inbetkag nen Juan, kowan to ey, “Kay-oli kayo jet ikowan jo so nen Juan sota inon-an jo tan intenengan jo ni kawasha jod jay. Ikowan jo ey sota ira nankekorab nan-asas ira, sota ira nankepilay nan-akad ira, sota nankebayang i bakdang sha mimapteng ira, sota ira nan-ketoleng nanteneng, sota eshom ma nanketey nanopawil ira, tan sota ira nankebiteg naytoro son si-kara i mapteng nga shamag maypangkep son Apo Shiyos.

²³ Si Apo Shiyos i onbindisiyon so nonta enshiy showashowa to son si-kak.” Kowan nen Jesus so nonta inbetkag nen Juan.

²⁴⁻²⁶ Idi nay-oli ira da sota inbetkag nen Juan, inkowan ma nen Jesus so nonta ira totoo i maypangkep so nen Juan, ja kowan to ey, “Nonta dimaw kayo so nen Juan shima dogad ja kad-an ton nay-araŵi shi ili, amtayo ey si-kato ket para padto nen Apo Shiyos. Isonga dimaw kayod man ja en mengesas ni toon para padto nen Apo Shiyos, aliŵen say kayo mengesas ni toon ekapoy ja singa bolong ni edet ja enam-ay ya iwagas ni shagem. Aliŵa ngon say dinaŵan jod man ket say kayo mengesas ni toon nanbaro ni mapteng, ta say ka-asan ira niyay ket shi siyodad ja engkakembaleg i baley sha, ja nam-ay i biyag sha. Dimaw kayon en mengesas ni para padto et siya, inon-an joy toon engatngato pay nem say sota eshom ma para padto nen Apo Shiyos.

²⁷ Ta si Juan sota kaytoshongan nonta esel nen Apo Shiyos ja naysolat nonta bayag da, ja kowan to ey, ‘Waray ibetkag ko ja mepangdo ey say si-kam, jet to isagana ira sota totoo.’ Sajay i padto nonta bayag ja timorong son Juan.

²⁸ Ikowan ko et son si-kayo: Podno ey si Juan, enshiy to kay-ingesan so ni emin na toon nay-anak, angken sipa. Nem say sakey ya toon kabeba-an shi pantoshayan nen Apo Shiyos, si-katoy engatngato nem say si Juan.”

²⁹ Inkowan pay nen Jesus ey, “Sota ira para singil ni bowis, tan sota ira eshom ma too, intenengan shay kowan nen Juan et si-karay emati ni kowan nen Apo Shiyos, jet binonjagan ira nen Juan.

³⁰ Nem sota ira Parisiyo tan mamaistoro ni dinteg tayon Hodiyo, dinamsis shay kepan-ikowan

nen Juan ja planon Apo Shiyos maypangkep son si-kara, jet ensikshal iren manpabonjag.

³¹⁻³² “Ara kayon too niman! Sota pemedaw bengat i amtayo. Ikowan koy joka kay-eshigi. Singa a-anak kayon wared ma malkaro, ja ensikshal la meki-asil. Kowan ira nonta eshom ma a-anak ja ka-asil jo ey, ‘Nanmosiko kami para son si-kayo, nem eg kayo met edadsakan! Insa-dat min nimangis, nem eg kayo met ekinengis!’

³³ Nonta timpon inpangitoro nen Juan ja para bonjag, nagshengan i toka kena, eg menginom ni adak, jet kowan jo ey eman-engaw.

³⁴ Jet si-kak niman na indaw ko di, enganak ni inges toy joka kena, tan enginomak, nem binedaw jowak met laeng, ja kowan jo ey, ‘Asas jo kari iman na too: makibel, ma-inom ni adak, tan say kajem to pay, sota ira para singil ni bowis, tan angken pay sota ira eshom ma toon enshiy kenshat sha, ja eshakil i basol sha.’ Sotan i kowan jo maypangkep son si-kak,

³⁵ nem sota ira emati son Juan, tan emati son si-kak, si-karay ka-asan to ey say plano nen Apo Shiyos, podnon mapteng ni olay.” Kowan nen Jesus.

Si Jesus, engan shi baley nonta Parisiyo

³⁶ Sota sakey ya Parisiyo, inewis tos Jesus ja en mekipengan shi baley to et si Jesus, dimaw et naydikob son si-kara.

³⁷ Wara ngoy bii nodtan na dogad ja eshakil i basol to. Shinemag to ey si Jesus, wara nodta baley ni Parisiyo et dimaw ja engita-jon ni botiljen napno ni emanseng-ew ja dana.

³⁸ En nantalimokod shi kad-an nen Jesus ja nannanginangis. Sota sayeto, dimbeng toy sedi nen Jesus et sota bowek to, si-katoy inponas to nodta sedi nen Jesus, tan inongo-an to pay sota sedi to, asan toka iro-jag sota dana nodta sedi to.

³⁹ Sota Parisiyo ja engawis son Jesus, inon-an to iyay et kowan to shorog shi nemnem to ey, “No podnon inbetkag nen Apo Shiyos iyay ya too, istay amta to koma iyay ya biin emirat son si-kato, tan istay amta to komay ogadi ton ngaaw.”

⁴⁰ Si Jesus, kowan to son si-kato ey, “Simon, waray ikowan ko son si-kam.”

Kowan nonta Parisiyo ey, “Ngantoy ikowan mo apo?”

⁴¹ Jet inkowan nen Jesus i sakey ya arig, ja kowan to ey, “Waray shownen too ja engotang nodta baknang. Sota sakey, dimen dasos i inotang to, jet sota sakey, dimen polo ngoy inotang to.

⁴² Idi enshin polos i ibayad shen showa nodta baknang, kinaasi-an nonta baknang ira. Simon, ikowan mo son si-kak nem sipa son si-karay nandasin i semek to so nonta baknang?”

⁴³ Kowan nonta Parisiyo ni songbat to ey, “Say kowan ko, sota ebadeg i otang ton epakawan, si-kato ngoy nandasin i semek to.”

Kowan nen Jesus ey, “Kostoy songbat mo.”

⁴⁴ Insi-ning nen Jesus sota bii et kowan to son Simon ey, “Moka asa iyay ya bii? Iyayak niman shiya baley mo, nem enshiy mo in-akan na shanom ja pengoshas ko ni sedik, nem si-kato,

inodsan toy sedik ni sayeto, tan pinonasan to pay i sedik ni bowek to.

⁴⁵ Si-kam, enshiy koston rispito son si-kak, nem si-kato, inpa-sas toy rispito to ni injo-kot to so ni ongo ni sedik — manshoki ni inmotok to ingkato niman.

⁴⁶ Eg mo dinena-an i toktok ko ni angken na edaken dana koma, nem si-kato, insho-jag tod sedik i emanseng-ew ja danen palit.

⁴⁷ Ta sota eshakil la basol to, binigbig to ey epakaʻanan; isonga sajay i inpasing to. Si-katoy ka-asan to ey ebadeg i semek to son si-kak. Nem sota toon kowan to ey ootik i basol ton epakaʻanan, ootik ngoy semek to.”

⁴⁸ Jet kowan nen Jesus so nonta bii ey, “Sota ira basol mo, epakaʻanan.”

⁴⁹ Idi intenengan nonta eshom ma ekilikob son si-kato, kowan shen shorog shi bakdang sha ey, “Sipa iyay ya toon nayda-kad i toka ikowan? Angken basol, pekaʻanan to!”

⁵⁰ Nem kowan nen Jesus so nonta bii ey, “Sota pamatim son si-kak i naysalakanan mo. Daw ka ja ʻwara may talna son si-kam.”

8

Tinodongan nonta bibii si Jesus

¹ Enshiy bayag to, en nanpasiyal si Jesus shi emin na ili tan shima ira baryo, ja en nantoro ni mapteng nga shamag maypangkep ni pantoshayan nen Apo Shiyos. Sota sampolo tan showen too to, ekidaw ira son si-kato.

² Tan ekidaw pay ira sota istay kawad-an ni dimonyo, ja bibiin mimapteng, tan angken pay sota eshom ma bibiin na-kal i sakit sha. Jet sajay i ngaran ira nonta bibii: si Maria Magdalena ja bintikan ni piton dimonyo,

³ si Juana ja asewa nen Shosa ja emengiman-shal shi baley nen Ari Hirodis, tan si Susana. Tan eshakil pay ira sota eshom ma bibiin timolong son Jesus tan sota ira too to ni kasapolan sha, ja engi-kan ni wára son si-kara.

In-arig nen Jesus sota kalasin bo-day ja nay-sepa-an ni botil

⁴ Idi na-olnong son Jesus iray eshakil la totoo, ja edapod emin na ili ni Jodia, inkowan nen Jesus iyay ya arig son si-kara, ja kowan to ey,

⁵ “Waray too ja dimaw wa en nanbangkag shi oma. Idi toka pan-iwaris sota botil, sota eshom, nayponta shi shalan, jet inkatin ni too, tan kinan ira ni titit.

⁶ Sota eshom ma botil, nayponta ired kabato-an et idi timemel sota botil, nakkit tep emag-anan sota bo-day.

⁷ Sota eshom ngon botil, nayponta ira shima simija ni sebit, jet idi bimengis iren showa, na-abak sota temel ni mola et eg timoloy.

⁸ Sota eshom ngon botil, nayponta ira shima mapteng nga bo-day. Timemel asan bima-deg, jet sajay ira, nandames ni sandedasos.” Tan kowan pay nen Jesus ey, “Niman i waray waya jon mengitneng niyay ya naka pan-ikowan, isonga singpet jon itenengan.”

⁹ Sota ira too nen Jesus, inbag-an sha no ngarantoy olog niyay ya arig ja inkowan to.

¹⁰ Si Jesus, simongbat son si-kara, ja kowan to ey, “Si-kayo nin i naypalobos ja on-awat so ni maypangkep nonta pantoshayan nen Apo Shiyos, nem sota ira eshom, arig bengat i pengitoshok son si-kara, say no angken isi-ning sha, eg sha imatonan, jet angken itenengan sha, eg sha amtay olog to.

¹¹ “Say olog nonta arig ja inkowan ko la ey toon engiweshis ni botil shi oma, sajay. Sota botil, may-eshig ey esel nen Apo Shiyos.

¹² Sota nayponta-an ni botil ja shalan, si-katoy kay-eshigan nonta ira toon engitneng ni esel nen Apo Shiyos, nem ondaw ali si Satanas ja to dingdingen sota esel ja intenengan sha, say eg sha pati-en, tan say eg ira maysedakan.

¹³ Jet sota nayponta-an ni botil la kabato-an, si-katoy kay-eshigan nonta ira toon mengitneng ni esel nen Apo Shiyos. No itenengan sha, wára shagos i imdeng shen mengewat, nem eg may-a-det shi nemnem sha. Memati ni sankatikan, nem ibi-jag shen shagos no onmotok i shaka kedigdikati.

¹⁴ Sota nayponta-an ni botil ja similja ni sebit, si-katoy kay-eshigan nonta ira toon mengitneng ni esel nen Apo Shiyos, nem say shaka nemnemema, sota pesing shen manbiyag, sota pandadsakan sha, tan sota ekanas sa biyag ni baknang. Jet anongosto ma ey ma-abak. Isonga enshiy ka-asan ma ni shaka pemati.

¹⁵ Sota nayponta-an ni botil ja mapteng nga bo-day, si-katoy kay-eshigan nonta ira toon men-

gitneng ni esel nen Apo Shiyos. Pati-en sha tep mapteng i wáred nemnem sha. Pa-jan na medigdikat, enosan sha et wáray panpa-no-an ni pamatira.”

In-arig nen Jesus sota kingki ja eg koma mesa-keban

¹⁶ Si Jesus, in-arigan to ira, ja kowan to ey, “Kaspangarigan ey sota kingki ja inparedang jo, simpri eg mesa-keban, ono may-a-mot shi doong ni katiri, no diket ipa-tok jo shi ekayang, say sota ira toon onsekep ali, asen shay seskepan sha.

¹⁷ Sota nay-emot niman ja eg ma-on-an, ma-on-an ali nem ekay, tan sota eg ma-amta-an niman, ma-amta-an ali nem ekay.

¹⁸ Singpet jon itenengan, tep sota toon mengitneng tan memati, metod-an pay. Nem sota toon endedamsis to, ja eg memati, angken sota ootik ja kowan to ey amta to, ma-enshi pay.” Kowan nen Jesus.

Naysabi si ina nen Jesus tan sota ira a-aki to

¹⁹ Sota ina nen Jesus tan sota ira a-aki to, dimaw ira son si-kato, nem eg mebedin na a-sopan sha ta eshakil iray totoo.

²⁰ Isonga wáray engikowan son Jesus ey, “Si inam tan sota ira a-akim, iman ired bo-dayan ja emansessesked son si-kam.”

²¹ Nem kowan nen Jesus son si-karen emin ey, “Say naka ikarin inak tan a-akik, sota ira emengitneng tan ememati ni esel nen Apo Shiyos.”

Inpasalsheng nen Jesus i makedsang nga shagem man makedsang nga shadoyon

²² Idi sakey ya akew, si Jesus, en nandogan shi bangka, pati sota ira too to, jet kowan to son si-kara ey, “Ondaw kitejo shima piig niya baybay.”

Jet dima-jat ira.

²³ Idi maramen ireka emanbediw, si Jesus, en na-ogip. Idi na-ogip, ebiglen kimedsang i shagem nodta baybay et eshogi-an ja emankepno sota bangka ni shanom. Jet dilikaro may biyag sha.

²⁴ Dimaw ira son Jesus, sha binengon jet kowan sha ey, “Apo! Apo! Shanshani kito men metey!”

Si Jesus, bimangon et inkowan to so nonta shagem tan makedsang nga shadoyon ni baybay ey onsalsheng et simalsheng nga agpayso, tan timalna ma.

²⁵ Jet kowan to so ira nonta too to ey, “Apay nga kolang i pamatiyo?”

Nem nasshaaw ira, tan entakot ira, jet kowan sha ni sakey tan sakey son si-kara ey, “Sipa emo iyay ya too? Toka pesalsheng iray shagem tan shadoyon ni baybay et shaka pati-a!”

Inpabtik nen Jesus sota ira dimonyo nodta toon eman-engaw ja i-Girgasa

²⁶ Intoloy shen bimaliw et mimotok ira shi dogad ja sakop ni Girgasa. Say Girgasa tan Galilia, nanmamangan shay baybay.

²⁷⁻²⁹ Shima Girgasa, waray toon eman-engaw ja pingketan ni eshaket la dimonyo. Sajay ya too, shaka bedora ni kolkolong, tan kebantayi ni too. Nem kanayon ja kesebi-a ni dimonyo et si-kato ngoy timpon toka iketdang so ni kolkolong, jet kaidaw ni dimonyo shi shontog. Eg man-iyon

shi baley, nem eg shima kamposanto i toka pan-yanin ebayag, ja nandabos.

Idi simekbit si Jesus shi kilig ni baybay, inaspol nontan na toon eman-engaw. Idi inon-an tos Jesus, pimekis et en nanshomog shi sango-an nen Jesus. Si Jesus inkowan to so nonta dimonyo ey idekjas sha sota too et sota too, inkedsang toy keljaw to, ja kowan to ey, “Jesus! Anak nen Apo Shiyos sa Kangeto-an! Ngantoy pesing mo ma son si-kak? Pangaasim, karamak shosa-en!”

³⁰ Si Jesus, inbag-an to, ja kowan to ey, “Sipay ngaran mo?”

Kowan nonta too ey, “Say ngaran ko, si Dinibo.” Tep dinibo i dimonyon pimeket son si-kato.

³¹⁻³² Nontan met laeng, wára iray eshakil la keshel la naybolos nodtan na shontog. Jet sota ira dimonyo, ireka mekikaasi son Jesus ey eg to ira pedaw shima dogad ja shosa-an ira ni dimonyo, nem say piyan sha koma, onsekep ira nodta keshel la naybolos. Jet inpalobos nen Jesus.

³³ Jet sota ira dimonyo, bimetik ira nodta too et pimeket ira nodta eshakil la keshel. Jet sota ira keshel, namtik iren nan-ekas shima shepdas et dimened ira shi baybay.

³⁴ Sota ira toon istay emanbantay ira niyay ya keshel, inon-an shay epasemak et kinano-an shen inshamag shi siyodad tan shima eshom ma kait sha.

³⁵ Sota ira toon engitneng niyay ya shamag, dimaw ira, sha inon-an sota epasemak. Jet simbires Jesus, tan sota toon bintikan ira ni dimonyo, ja mapteng may nemnem to. Timongaw

ja nay-askang son Jesus ja nanbaro ma. Sajay iren dimaw ja en engasas so niyay, timakot iren emin.

³⁶ Jet sota ira para bantay ni keshel ja engasas ni inpan-etan ni dimonyo, inkowan shay inpas-ing nen Jesus ja inpabtik so ni dimonyo.

³⁷ Jet emin ira sota i-Girgasa, kowan sha son Jesus ey no mebedin koma, idekjas to ira, ta epaladoy takot sha. Isonga si Jesus, nandogan shi bangka ja onda-jat ma.

³⁸ Nem sota toon bintikan ira ni dimonyo, inbag-an tos Jesus nem mebedin na mekidaw son si-kato nodta bangka.

Nem si Jesus, inbetkag to, ja kowan to ey,

³⁹ “Akad ka, mo ikowan i mapteng nga inpas-ing nen Apo Shiyos son si-kam.”

Jet sota toon mimapteng, imakad ja nanshalan nodta ira balebaley et to insodsod so ni totoo i kaskasshaaw wa dingka nen Jesus son si-kato.

Emati ira sota showen too son Jesus et ki-naasi-an to ira

⁴⁰ Idi mimotok si Jesus nodta piig ni baybay, sota ira eshakil la totoo, ireka man-imdeng ni inmotok to tep shaka ngo eshan sesseskera.

⁴¹ Jet nontan, wára ngoy mimotok alin too ja si Jairo i ngaran to, ja pangolo ni baley ya sa-nopan ni Hodiyos. Nantalimokod shi sango-an nen Jesus, ja kowan to ey, “No mebedin koma, kay-olop ka son si-kak shi baley ko,

⁴² ta sota sesakey ya anak kon bii, emanpat-patey.” (Sajay ya anak ton bii, sampolo tan showa i tawen to.)

Nonta eman-ekad si Jesus ja ondaw shi baley nonta pangolo, eshakil iray totoo ja engigéwa son si-kato ni shaka pan-ekad.

⁴³ Nodta eshakil la toon imonod son Jesus, wára ngoy sakey ya biin naydaok ja nanshala ni sampolo tan showen tawen. Kinastos ton emin i kokowa to shi doktor, nem enshiy makabaal ja engagas niyay ya sakit to.

⁴⁴ Ekisikil la imonod son Jesus et pinishat toy kajaran ni baro nen Jesus. Jet nay-inshas ngon simalsheng sota ebayag ga toka pansheda.

⁴⁵ Si Jesus, kowan to ey, “Sipay emirat son si-kak?”

Nem emin ira sota too, kowan sha ey, “Aliwén si-kak.”

Jet si Pedro, kowan to ey, “Apo, eshakil met ita toon shakaka pantikshona?”

⁴⁶ Nem kowan nen Jesus ey, “Wara met i dinmok shiyay ja sakey ya toon na-agasan ja emirat son si-kak.”

⁴⁷ Sota bii, idi inamta-an to ey amta gayam nen Jesus, dimaw son Jesus ja emanbebayedbed ja en nantalimokod shi sango-an to. Jet inkowan to shi sango-an nonta ira eshakil la totoo nem ngantoy kabol la pinishatan to son Jesus, tan inkowan to ey na-agasan shagos nonta inspirat to so.

⁴⁸ Jet kowan ma nen Jesus son si-kato ey, “Anak ko, say minaptengan mo, sota pamatim son si-kak. Daw ka ja wára may talna son si-kam.”

⁴⁹ Nonta marama ja pan-ikowan nen Jesus iyay, wára diy inbetkag shen edapo nodta baley nonta pangolo ja emansekit i anak to, jet kowan

to son si-kato ey, “Kosto. Angken eg mo odopen ita maistoro. Enshi met laeng i silbi ni idaw to tep etey sota anak mo.”

⁵⁰ Nem si Jesus, intenengan to et kowan to son Jairo ey, “Kareka manshanag; pamati ka ni abos et onpesed sota anak mo.”

⁵¹ Idi onmotok ira nodta baley nonta pangolo, say inpalobos ton mekiskep son si-kato bengat, si Pedro, si Juan, si Santiago, tan sota ama tan ina nonta nga-nga.

⁵² Emin ira sota wára nodta bo-dayan, ireka onnanangis ni daringit sha nonta nga-nga. Nem kowan nen Jesus son si-kara ey, “Karekayo onnangis: eg etey itan na nga-nga, na-ogip bengat.”

⁵³ Nem sota ira totoo, inbi-wisan sha si Jesus tep amtara ey etey da sota nga-nga.

⁵⁴ Idi simekep si Jesus, inegni-an toy takday nonta nga-nga et inkedsang toy esel to, ja kowan to ey, “Bangon ka anak!”

⁵⁵ Nay-olliy jasjas mowan nonta nga-nga et bimangon na shagos. Jet inkowan nen Jesus son si-kara ey, “I-akniyo ni kenen to.”

⁵⁶ Sota ama tan ina nonta nga-nga, nasshaaw ira. Jet kowan nen Jesus son si-kara ey, “Karejo ikokowan shi eshom iyay ya edaga niman.”

9

Inbetkag nen Jesus sota sampolo tan showen apostol to shi eshom ma ili

¹⁻² Si Jesus, sina-nop to ira sota shinotokan ton sawal ni showen apostol to et inkowan to ey ondaw ira ja sha ikowan i maypangkep ni

pantoshayan nen Apo Shiyos, tan pemapteng sha pay i sakit ira ni totoo. Jet kowan to pay son si-kara ey, "Ipiyal ko son si-kayo ey angken sama ira dimonyo ja pimeket shi totoo, mebedin na pebtik jo. Tan sota ira wáray sakit to, mebedin ngon pemapteng jo ira.

³ Angken enshiy jo ita-jon na kompormin mesepol jo shima dawán jo. Eg mesepol la mengita-jon kayo ni sowan, bayong, mekan, pilak, ono baron pansa-datan.

⁴ No sipay mengewís son si-kayo, si-katoy pan-inan jo ingkatod eg jo pay laeng idekjas sotan na dogad.

⁵ Nem no ondaw kayo nodta dogad ja eg shakejo ewáten ira nonta too, sota depok ja naypeket shi sediyó, pokpok jo nin asan joka ilekjas sotan na ili. Ta si-katoy pengamta-an sha so ey enshi may biyang jo son si-kara." Kowan nen Jesus so ni apostol to.

⁶ Jet sota ira too to, inekad shay eshakil la dogad ja sha intoro i esel nen Jesus, tan inpamapteng sha iray toon emanpansekit.

Eg tongolan nen Ari Hirodis no sipa si Jesus

⁷ Si Hirodis ja engitoshay ni Galilia, idi shinemag to sota maypangkep ni emin na dingdingka nen Jesus, eg to tetongolan nem sipay koston katoo nen Jesus. Ta say kowan ni eshom, si-katos Juan ja para bonjag ja nanbiyag mowan.

⁸ Say kowan ni eshom, si-katos Elias ja para padto nonta bayag da ja dimaw ali mowan. Tan sota ira eshom pay, say kowan sha, si-katoy

sakey so nonta ira para padto nonta bayag da ja nanbiyag mowan.

⁹ Nem kowan nen Hirodis ey, “Pinotolan koy toktok met nen Juan. Sipa ngata iyay ya toon es-hakel i naka itenengin maypangkep son si-kato?” Jet piyan ton pasiya ja asen si Jesus.

Pinekan nen Jesus sota dimen dibon totoo ja imonod son si-kato

¹⁰ Sota ira apostol nen Jesus ja inbetkag to, imoli ira di jet inkowan sha son Jesus i emin na dingdingkara nodta dinedawan sha. Jet inodop to iren abos sha ja ondaw shi siyodad ja kowan sha ey Bitsaida.

¹¹ Nem idi inamta-an nonta eshakel la too i tinoshong nen Jesus, inonod sha, jet si Jesus inewat to ira. Jet inkowan to son si-kara i maypangkep ni pantoshayan nen Apo Shiyos, tan inpamapteng to sota ira emanpansekit.

¹² Idi enaswil malay akew, sota apostol ton sampolo tan showa, dimaw ira di son si-kato et kowan sha ey, “Apo, pansisi-jan mo ira jay ya totoo say ira di koma mengenap ni kenen sha tan ka-okipan sha shima balebaley ja nay-askang shiyay, tep arawi met iyay ya dogad shi kebalebaley.”

¹³ Nem kowan nen Jesus son si-kara ey, “I-akniyo et ira ni kenen sha.”

Jet kowan sha ey, “Eshakel met ira. Piyan mon kami menongkal ni kenen sha? Saja wara bengat shiyay, dimen boknol la tinapay tan showen piskaw.”

¹⁴ Tep wára nodtan i ondaw wa dimen dibon daleki, tan wára pay i bibii.

Kowan nen Jesus ey, “Patongaw jo ira ja totoo ja sandi-men poloy sakey ya gropo.”

¹⁵ Jet sota too to, inpatongaw sha ira sota eshakil la totoo.

¹⁶ Jet si Jesus, inda to sota tinapay tan sota showen piskaw, intangkak tod naykayang jet nan-iyaman son Apo Shiyos. Idi naksheng nga nan-iyaman, shinowashowa to asan toka i-kan so nonta ira too to, ja si-karay mengiweshis so nonta ira eshakil la totoo.

¹⁷ Sota ira totoo, engan ira et napsel iren emin. Idi naksheng ira, inolnong ira nonta too nen Jesus sota ebay-an ja eg kinan ira nonta totoo jet say na-olnong, sampolo tan showen basket.

Inbolikas nen Pedro ey si Jesus i inbetkag ali nen Apo Shiyos

¹⁸ Nonta sakey ya akew, dimaw sota too nen Jesus son si-kato nonta toka panshewat son Apo Shiyos, ni abos to. Jet inbag-an to ira, ja kowan to ey, “Ngarantoy kaikowan ira ni totoo ni maypangkep son si-kak? Eg sha aya tabtabalen nem sipa-ak?”

¹⁹ Jet sota ira too to, simongbat ira ja kowan sha ey, “Eg met nan-i-inges i shaka ikowan. Say kowan ni eshom, si-kam kono si Juan ja para bonjag ja etey da, nem sota ira eshom, kowan sha ey si-kam si Elias ono sakey so nonta ira eshom ma para padto nonta bayag da ja nanbiyag mowan ali shi patey.”

²⁰ Jet si Jesus, inbag-an to ngo ira sota too to, ja kowan to ey, “Jet si-kayo ngay? Ngaranto ngoy kowan jo ni maypangkep son si-kak?”

Simongbat si Pedro ja kowan to ey, “Si-kam sota inpadtora nonta bayag da ey ibetkag ali nen Apo Shiyos ja mengisedakan so ni totoo.”

²¹ Jet si Jesus, binidin to iren pasiya ey eg sha ikokowan ni angken sipa i maypangkep nonta inkowan nen Pedro.

²² Tan inkowan to pay ey, “Si-kak sota kowan ni padto nonta bayag da ey Anak ni Too. Nem mesepol la manda-kamak ni eshakil la digat, ta sota ira pangolo ni Hodiyo, tan sota apo ni papashi, tan mamaistoro ni dinteg, bedawen sha-ak et anongosto ma ey bono-en sha-ak. Nem no maykatdon akew, man-ongalak met laeng.”

²³ Jet say kowan to son si-karen emin, “No sipay makapiyan ja on-onod son si-kak ja took ni olay, mesepol la si-kak bengat i nemnemnemen to, ja ibiyang ton emin i kompormi. Tan mesepol la enosan to pay ya angken maybebaing ono mebono ja inges to sota toon emasan ni koros ja kaydansa-an to met laeng. Tan mesepol pay ya si-kak i pansilbi-an to ni olay.

²⁴ Sota toon entapi to i biyag to ja kowan to ey ensikshal la metey maypangkep son si-kak, si-kato et ngo mowan i mepokaw i biyag to. Nem sota toon eg to kawanan i bakdang to ni maypangkep son si-kak ja angken metey ni toka pansilbi, si-kato et ngo mowan i i-aknan nen Apo Shiyos ni biyag ja enshiy to engintegan.

²⁵ No kaspangarigan ey kinokowa ni sakey ya too i emin na wared ja dobong, enshiy silbi

nontan na kinokowa to, no eg to kon-oren sota biyag ja enshiy to engintegan.

²⁶ No sota toon embaing nga mengikowan ey si-kato ket took, ono embaing nga mengikowan ni esel ko, ibaing ko ngo sotan na too nem ondawak alin mantoshay. Agpayson si-kak sota kowan nonta para padto nonta bayag da ey Anak ni Too, jet sotan alin idaw ko, say kasesaad ko, inges ko met laeng i kasesaad nen Apo Shiyos. Tan may-odop ali sota ira anghil to son si-kak.

²⁷ Jet agpayson waray eshom son si-kayod jay ja eg metey ingkatod asen sha sota pantoshayan nen Apo Shiyos.” Kowan nen Jesus.

Nanbaliw ni emenenili i bakdang nen Jesus nodta shontog

²⁸ Waray makadomingko ja edabas da ni inkowanan to so niyay, jet si Jesus, inodop tos Pedro, Juan, tan si Santiago, jet dimaw iren timiyed shi shontog ja en manshewat son Apo Shiyos.

²⁹ Idi maramen emanshewat si Jesus, nanbaliw i itsora ni dopa to. Angken pay sota baro to, nanbalin ni empotin pasiya ja emenenili.

³⁰ Jet ebigen waray showen too ja emekitbal son si-kato, ja si Moises nen Elias.

³¹ Emanniyal i shamangan sha et say tinabtabal sha nen Jesus, sota maypangkep ni ikesheng to so ni obda nen Apo Shiyos ni ketey tod Jerusalem.

³² Si Pedro tan sota ira kait to, en-amis i ogip sha, nem ebangon ira et inon-an shay inniyal nen Jesus, tan sota showen too ja toka pantabtabala.

³³ Idi emanda-jat da si Moises nen Elias ja idekjas sha si Jesus, si Pedro, kowan to son Jesus ey, “Apo, mapteng i kawasha tayod jay. Kosto gayam nem mengemag kami ni tedon kampod jay: sota sakey para son si-kam, sota sakey para so nen Moises, tan sota sakey para so nen Elias.” Nem si Pedro, eg to amtay toka pan-a-sela.

³⁴ Nonta marama pay laeng ja eman-a-sel si Pedro, dimespag aliy kolpot jet dinikopan to ira. Jet si Pedro tan sota kait to, timakot ira ta dinikopan ira nonta kolpot.

³⁵ Jet waray esel ja edapo nodta kolpot ja kowan to ey, “Sajay i Anak ko. Si-katoy shino-tokan kon mengisedakan so ni totoo. Isonga patiyon emin i ikowan to.”

³⁶ Idi enshi la sota esel, si Jesus met ni abos i wara.

Jet sota ira too to, enshin polos nin nontan na timpo i sha inkokowan so ni angken sipen too ni maypangkep nonta inon-an sha nodta shontog.

Inpamapteng nen Jesus sota nga-ngen pingketan ni dimonyo

³⁷ Nonta inkawa-wa to, shimalong iren edapod shontog. Jet eshakil iray totoon nay-aspol son Jesus.

³⁸ Jet waray sakey ya toon naydaok nodta eshakil la totoo ja inkedsang toy esel to, ja kowan to ey, “Apo! Kaasi-im iya anak ko, tep saksakey to bengat ja anak ko!

³⁹ Waray dimonyon kaonsabi son si-kato et no onsabi, toka pekelkeljaw, tan toka pankenkenteg,

jet eman-o-osab i bongot to. Emebedjag asan toka ilekjas; toka pedigata nin na pasiya.

⁴⁰ Inkowan ko nonta ira toom ey pebtik sha sota dimonyo, nem eg sha met binaalan.”

⁴¹ Simongbat si Jesus ja kowan to ey, “Enshiy pamatiyo eshan, ap-apil kayon too! Ebayagak met shiyay ja eman-enos son si-kayo, nem eg jo pay laeng pati-en i panakabalin nen Apo Shiyos! Ilaw mo did jay sota anak mo!”

⁴² Idi eman-ekad sota nga-nga ja to sebi-en si Jesus, sota dimonyo, inbes-ig tod bo-day, tan inpankenkenteg to. Si Jesus, inkowan to so nonta dimonyo ey, “Betik ked ta nga-nga!” Jet bimetik nga agpayso. Jet mimapteng sota nga-nga. Kowan nen Jesus so nonta ama nonta nga-nga ey, “Iya, i-ekad mo iya anak mo.”

⁴³ Emin ira sota too, nasshaaw ira ja kowan sha ey, “Sajay i ka-asan ni panakabalin nen Apo Shiyos!”

Inkowan mowan nen Jesus i mepesamak ali met laeng son si-kato

Maramen sajay i pan-ikowan ira nonta totoo pangkep nonta dingka nen Jesus ey ikowan to ngo so nonta too to ey,

⁴⁴ “Karejo dibdibkan koma iya ikowan ko son si-kayo, ta aliwen kanayon iyay ya pengiredjaw sha. Si-kak sota kowan ni para padto nonta bayag da ey Anak ni Too, nem may-ewatak so nonta ira toon makakontra son si-kak.”

⁴⁵ Nem nay-emot son si-karay piyan ton ikowan, jet eg sha inewatan. Piyan shen ibaga

nem ngarantoy olog to, nem embaing iren mengibeka.

Sota mengibeba ni bakdang to, si-kato et ngo mowan i mayngeto

⁴⁶ Nansosongbat ira sota too to nem sipa son si-karay mandesin koma ni shayaw.

⁴⁷ Si Jesus, amta toy wared nemnem sha et say inpasing to, ena-wal ni nga-nga ja inpaledjat tod abay to.

⁴⁸ Jet kowan to so nonta ira too to ey, “No sipa ken too ja mapteng i pesing mo so niyay ya nga-nga maypangkep ni semek mo son si-kak, si-kak met laeng i tinoshong nonta inpasing mo. Jet no si-kak i pesingan mo so ni mapteng, say toshongen nonta dingkam, si Amak ja engibetkag son si-kak ali. Sota mengibeba ni bakdang to shorog, si-katoy mandesin koma ni shayaw son si-kayon emin.” Kowan nen Jesus.

“Sota aliwen makakontra son si-kayo, si-katoy kait jo”

⁴⁹ Kowan nen Juan ey, “Apo, waray inon-an min too ja emengosal ni ngaran mo say onbetik iray dimonyo ja pimeket shi totoo. Jet inpasalsheng mi tep eg naykait son si-kamin toom.”

⁵⁰ Nem kowan nen Jesus ey, “Karejo iparit. No sipa sota eg makakontra son si-kayo, kait jo.”

Sota ira i-Samaria, eg sha inewat si Jesus

⁵¹ Idi nay-esop ma sota timpon i-oli nen Jesus shi dangit, ninemnemnem to ey kenshat ta ondaw shi Jerusalem.

⁵² Isonga engibetkag ni toon mepangdo ja ondaw shi sakey ya ili ni Samaria say ira mengisekana ni mesepol to, tep manshedan nodtan.

⁵³ Nem sota ira too nodtan, ensikshal ira, ja kowan sha ey, “Enshi, eg ali ondaw shiyay tep ondaw met shi Jerusalem.”

⁵⁴ Idi inamta-an nonta too nen Jesus ja si Santiago nen Juan iyay, kowan sha son Jesus ey, “Apo, piyan mon angken pa-oshan mi ali ni apoy ja medepod dangit say mepoolan ira ja eg mengewat son si-kam?”

⁵⁵ Nem si Jesus, nanposipos et sinelkag to ira.

⁵⁶ Jet dimaw ira shi eshom ma baryo.

Sota ira toon kowan sha ey may-odop ira son Jesus ni olay

⁵⁷ Idi ireka man-ekad, waray toon kowan to son Jesus ey, “Angken toway dawán mo, mekidawak son si-kam.”

⁵⁸ Jet si Jesus, simongbat ja kowan to son si-kato ey, “Pannemnem ka nin, ta saja obdak, edigat. Onito pay sota atap pa animal, tan titit, ta waray koston shaka pan-iyani. Nem si-kak enshiy koston baley ko ja pansalshengan ko.”

⁵⁹ Kowan mowan nen Jesus so nonta sakey ya too ey, “Kay-olop ka son si-kak ni olay.”

Nem kowan to ey, “Kanin Apo, ta nak nin isingpet si amak.”

⁶⁰ Si Jesus, simongbat ja kowan to ey, “Olay ngo ira sota toon eg sha amtes Apo Shiyos ja mengisingpet nonta etey. Maybidang ey etey ira, jet anam shen mengibka ni etey ya too. Nem

si-kam, daw ka et, mo ikowan i maypangkep ni pantoshayan nen Apo Shiyos.”

⁶¹ Kowan ngo nonta sakey ya too ey, “May-odopak son si-kam Apo, nem ondawak nin, nak sodsoran i pamiljak.”

⁶² Kowan nen Jesus son si-kato ey, “No sota toon engirokin mengesharo, nem kewingi ni olay shi engiroki-an to, aliwén mapteng nga para arasho. Inges to sota toon istay nay-olop son si-kak, nem emesiwat ni kompormi, enshiy silbi to shi pantoshayan nen Apo Shiyos.”

10

Inbetkag nen Jesus sota piton polo tan showa ja too to

¹ Idi naksheng iyay, si Apo Jesus, shinotokan toy piton polo tan showa so nonta ira too to, jet inbetkag to iren sanshedwa ja en mengitosho shima emin na dogad ja kowan to ey dawán to met laeng.

² Jet say kowan to son si-kara, “Eshakel iray toon may-eshig ey ma-epit nem kolang iray man-obda. Si Apo Shiyos i mengibetkag ni toon mengepit, isonga si-kato ngoy pengshawan jo say mengibetkag ali ni on-atang son si-kayo.

³ Daw kayo ma, nem tanshaaniyo ta ibetkag takejo ja singa kalniron naydaok shima atap pa aso.

⁴ Angken eg kayo mengita-jon ni pilak, ono bayong, ono sapatos. Pandiritso kayod dawán jo; karekayo mesiwat ni tabtabal shi shalan nem waray aspolen jo.

⁵ No onmotok kayo nodta balebaley, say pilm-iron pesing jo, ikowan jo ey, 'Bindisiyonan koma nen Apo Shiyos i nanbaley shiyay ya baley.'

⁶ Jet no maronong sotan na toon nanbaley nodtan, ja anam ton mebindisiyonan, ontoloy sota inkowan jon bindisiyon nen Apo Shiyos son si-kato.

⁷ Topog joy baley ya pan-inan jo, karekayo man-a-atan. Jet sota wáren isango sha son si-kayo ja kenen jo, si-katoy singa dagboyo. Ta sota man-obda, nebeng ton may-aknan ni kompormin mesepol to.

⁸ No ondaw kayo nodta ili et ewáten shakejod man, kan jo sota wáren isango sha son si-kayo.

⁹ Pamapteng joy emansekit ta totoo nodtan na dogad, jet say ikowan jo so nonta ira totoo, 'Sota pantoshayan nen Apo Shiyos, dimaw ali ma ja nay-esop son si-kayo.'

¹⁰ Nem no sota dogad ja motoken jo ket, eg shakejo ewáten, daw kayod ma kabalkan na kalsara say on-an shakejo et ikowan jo ey,

¹¹ 'Ayshi may biyang mi son si-kayo! Angken saja depok ja naypeket shi sedi mi, pokpoken mi. Nem karejo dibdibkan ey sota pantoshayan nen Apo Shiyos ket dimaw alin nay-esop son si-kayo ja istay onsabi son si-kayo.' "

¹² Jet intobtob nen Jesus ey, "Iyay pay i ikowan ko. No onmotok ali sota akew ja pengigsheng nen Apo Shiyos no sipay maysedakan, say podnon mepesamak so nonta too nodtan na dogad, mas embel-at i keshosara nem say sota tood Sodoma." Inkowan nen Jesus iyay ya emin so nonta ira too ton inbetkag to.

¹³ Wara pay i inkowan nen Jesus ja kowan to ey, “Kakaasi kayo di ja toon i-Korasin, tan si-kayon tood Bitsaida. Eshakel i dingkak ka milagro shi ili jo jet inon-an jo, nem eg kayo nan-bebawi maypangkep ni basol jo. No sajay komen milagro ja inpa-sas ko son si-kayo ket inon-an ni tood Tira, tan tood Sidon, angken aliwen too ira nen Apo Shiyos, sigoradon nanbebawi ira maypangkep ni basol sha nonta mismon inon-an sha sota milagro, tan wara pay i ka-on-anan to ey ireka mandeshingit maypangkep ni basol sha.

¹⁴ Nem ikowan ko son si-kayo, no onsabi ali sota timpon pengigsheng nen Apo Shiyos no sipay maysedakan, embel-at i keshosayo nem say sota tood Tira tan tood Sidon.

¹⁵ Tan si-kayo ngon tood Kapirnaom, kowan jo ey ikayang jon shorog i bakdang jo ingkatod dangit, nem ayshi, eg mebedin! Maybeba kayod impiyarano.”

¹⁶ Jet kowan nen Jesus so nonta ira ibetkag to ey, “No sipay mengitneng son si-kayo, si-kak i maybidang ey intenengan to. Tan no sipay ondamsis son si-kayo, si-kak i maybidang ey dinamsis to, tan no sipay ondamsis son si-kak, maybidang ey dinamsis tos Amak ja engibetkag ali son si-kak.”

Imoli ali ira sota piton polo tan showa ja too ton inbetkag to

¹⁷ Idi nay-oli ira di, sota piton polo tan showen inbetkag nen Jesus, ireka man-indeng nga pasiya, ja kowan sha son Jesus ey, “Apo, angken sota ira dimonyo, shakamika pati-a no osalen miy ngaran mo.”

18 Si Jesus, kowan to son si-kara ey, “Owen, amtak ey si Satanas, sankakemjat i toka ka-ebak ja singa bagidat alid naykayang.

19 Si-kak i engibetkag son si-kayo et angken manshedan kayod dilikaron dogad, enshiy mepe-samak son si-kayo. Mebedin jon ebaken i kabakal jon si Satanas, jet eg kayo ma-an-ano.

20 Nem aliwén sota inpanagshag jo bengat ni dimonyo i pan-imdengan jo. Nem say pan-imdengan jo komen pasiya, sota inkaydista ni ngaran jod dangit.”

21 Jet nontan met laeng nga oras, sota Ispirito Santo nen Apo Shiyos, inpan-imdeng to si Jesus. Isonga kowan to son Apo Shiyos ey, “Ama, apo ni dangit tan saja dobong, man-iyamanak son si-kam, tep say inpa-amta-an mo so ni maypangkep ni pantoshayan mo ket sota ira toon mapiyan na metod-an. Nem sota ira toon kowan shed nemnem sha ey waray ambara, eg mo ipalobos sa amta-an sha sota maypangkep ni pantoshayan mo. Owen Ama, edaga iyay tep si-katoy piyan mon medeka.” Sajay i iyaman nen Jesus son Apo Shiyos.

22 Jet inkowan to pay ey, “Si-kak bengat i inpiyalan so nen Amak ni emin. Si-kak bengat i maka-amta ni emin na maypangkep son si-kato, tan si-kato ngo bengat i maka-amta son si-kak ka Anak to. Isonga sota piyan kon pengitosho-an ni maypangkep ni pantoshayan nen Apo Shiyos, si-katoy itoro-an ko so.”

23 Si Jesus, sinengo to sota ira too to et kowan to son si-kara ni abos sha ey, “Ekasat kayo, ta inon-an jo ira jay ya naka dagdag-a.

²⁴ Agpayso iya ikowan ko son si-kayo. Eshakel ira sota para padto nen Apo Shiyos tan a-ashi nonta bayag da ja piyan shen on-an koma iyay ya inon-an jo niman na timpo, tan piyan shen itenengan koma iyay ya intenengan jo, nem eg sha sina-kop.”

In-arig nen Jesus sota i-Samaria ja amta ton mengaasi

²⁵ Waray sakey ya maistoro ni dinteg ni Hodiyo; dimaw son Jesus sa kowan to ey peshasen to no kas-anoy katekal nen Jesus. Kowan to son Jesus ey, “Maistoro, ngantoy kowan mo ja dag-en ko say ewaten koy biyag ja enshiy to engintegan?”

²⁶ Simongbat si Jesus ja kowan to ey, “Ngaran-toy naysolat nodta bilin nen Apo Shiyos nonta bayag da? Jet nganto mangoy moka pengodog?”

²⁷ Sota maistoron ememeshas son Jesus, simongbat ja kowan to ey, “Say kowan to, ‘Semek mos Apo Shiyos ja si-katoy pengitoshongan mo ni emin na wára son si-kam — emin na wáred posom, emin na kedsang mo, tan emin na nemnem mo.’ Tan kowan to pay ey, ‘Semek moy kait mon too ja inges toy moka penmek so ni bakdang mo.’ ”

²⁸ Kowan nen Jesus ey, “Kostoy songbat mo. Jet no onoren mo iyay, ja dag-en mo, ewaten mo sotan na biyag ja insalodsod mo.”

²⁹ Nem sota maistoro ni dinteg ni Hodiyo, emandeson. Isonga kowan to son Jesus ey, “Jet sipa ngarod i kowan mo ey kait kon sesmeken ko?”

³⁰ Sinongbatan nen Jesus ni arig, ja kowan to ey, “Waray sakey ya too; emanshedong ja edapod Jerusalem ja ondaw shi Jiriko. Nem sota ira tolisan, tinodisan sha et indaray angken baro to. Pinegpeg-as sha et indekjas shen nalpeng.

³¹ Sotan ma ey naytompong ngon wáray pari ni Hodiyoos ja emanshedong nodtan na kalsara. Idi inon-an to sota toon naypolay, dinigdig to ja nanshalan shi naykilig.

³² Idi naksheng iyay, wára mowan i Hodiyoos sa para tolong met laeng ni pari ja nanshalan nodtan, nem inges to met laeng i inpasing to. Idi inon-an to sota toon tinodisan sha, nanshalan nodta naykilig.

³³ Nem idi nanshalan aliy sakey ya toon i-Samaria nodtan, ja aliwén kait nonta Hodiyoos sa tinodisan sha, inon-an to et naysmekan nodta too.

³⁴ Dimaw, to simbi et to inekasan sota ira sogat to ni danen edaokan ni adak, asan toka bedbeshi. Jet inpankabajo to nodta kabajo to et indaw to nodta baley ya shiwésan et inajowanan tod man.

³⁵ Idi ewá-wá, inbo-day toy pilak to et in-akan to nodta emanbantay nonta baley ya shiwésan, ja kowan to ey, ‘Ajowanim iyay ya too et no on-oli-ak ali, manshedanak alid jay et bayshan taka no pigay kasto-en mon para son si-kato.’ ”

³⁶ Jet si Jesus, inbaga to so nonta maistoro ni dinteg ey, “Jet saja tedon too ja nanshalan nodta kad-an ni toon etolisan, sipa son si-kara i kowan mo ey kait to?”

³⁷ Sota maistoro ni dinteg ja nansalodsod, simongbat ja kowan to ey, “Simpri sota engaasi

son si-kato.”

Jet si Jesus, kowan to ey, “Owen et sajay ngoy pesing mo so ni eshom.”

En binisita nen Jesus si Maria nen Marta

³⁸ Idi eman-ekad si Jesus tan sota ira too to, simbiray dogad ja kawad-an ni biin manngeshan ni Marta, jet inewis to si Jesus shi baley to.

³⁹ Si Marta, waray agi ton si Maria i ngaran to. Sajay ya agi to, timongaw wa emantetneng ni kepan-itoro nen Jesus.

⁴⁰ Nem si Marta, ngaaw i dekna to ta sakey ton emengisekana ni kenen sha. Dimaw son Jesus et kowan to ey, “Apo, baybay-an mo aya ita agik ka indekjas towak ka sakey kon emanposposipos sa man-obda? Ikowan mo son si-kato ey ondaw ali et todongan towak.”

⁴¹ Nem si Apo Jesus, kowan to ey, “Marta, Marta, ngantoy? Kaka emanshanag ni moka pan-inolin eman-obda?”

⁴² Sakey bengat i kasapolan jet si Maria, amta toy mesepol et pinidi toy mapteng nga eg mebedin na ma-kal son si-kato.”

11

Intoro nen Jesus i pesing nga manshewat son Apo Shiyos

¹ Nonta sakey ya akew, emanshewat si Jesus so nen Apo Shiyos et idi naksheng, kowan nonta sakey ya too to son si-kato ey, “Apo, itod-iyokami ni pesing min manshewat son Apo Shiyos, ja inges toy inpangitoro nen Juan so ira ni too to.”

² Jet si Jesus, inkowan to son si-kara ey, “No manshewat kayo son Apo Shiyos, sajay komay ikowan jo: ‘Ama, si-kam koma i mayshedjaw ni olay. Sota pantoshayan mo, pasebim koma ali.

³ I-kan mo koma sota kenen mi ni inakew.

⁴ Si-kam i memekawan son si-kami ni nanbasolan mi, tep mika ngo pekawani sota ira nanbasol son si-kami. Karam itolok koma ja manbesol kami, no diket si-kam i mengiredan son si-kami say eg kami manbesol.’ ”

⁵ Si Jesus, in-arigan to ira say eg ira koma on-ekdas ja manshewat son Apo Shiyos; kowan to ey, “No kaspangarigan ey ondaw ka shi baley ni kajem mo ni kawa ni dabi ja ikowan mo son si-kato ey, ‘Kajem, pabodorimak ka ni tedon boknol la tinapay,

⁶ ta waray kajem kon mimotok shi baley ko et enshiy nak ipakan son si-kato.’

⁷ Nem sotan na kajem mon wara nodta naydaem ni baley to, onsongbat ja kowan to ey, ‘Karamak distolbo-en! Nanbagat kami mala, tan saja ira annak ko tan si-kak, shimokol kami ma. Ekak mebedin men onbangon ja mengi-kan ni mesepol mo.’

⁸ Jet ngaranto ma? Angken na en-asneng nga onbangon ja mengi-kan ni kasapolan mo tep sankajem kayo, kenshat ta mepidit ta onbangon no memasig ka ni baga. Jet i-akan toy mesepol mo.

⁹ Inges niyay i pesing nga manshewat son Apo Shiyos. No kanayon na manbeka kayo son si-kato, i-akan toy kekshawen jo. No eg kayo on-ekdas sa manshewat son si-kato, ewaten joy

mesepol jo. Panogtog kayo nin et idokatan tokejo.

¹⁰ Ta emin ira sota manbeka, ono manshewat son Apo Shiyos, si-karay mengewat ni mesepol sha. Tan emin ngo iray menogtog, si-karay maydokatan.

¹¹ Arig toy san-ama. Wara ayay inon-an jon nga-nga ja no manbeka so nen ameto ni piskaw ket oleg i i-akan nen ameto?

¹² Ono kaspangarigan ey sota anak to ket manbeka ni ikdog, apay kamajan ayay i-akan to? Enshi, no diket say i-akan to so nonta anak to, sota mapteng nga ibaga ni anak to.

¹³ Si-kayo, angken ngaaw i aramid jo, amtayo met ja mengi-kan ni mapteng nga ibaga ni anak jo. No satan i wára son si-kayo, mas pay ya amta nen Apo Shiyos ja Amejod dangit ja mengi-kan ni mapteng nga banag so nonta emengshaw son si-kato ni kasapolan to. I-akan toy Ispirito Santo to so ira nonta manbeka son si-kato.”

Inpan-esel nen Jesus sota dakin eg maka-esel

¹⁴ Waray sakey ya toon eg maka-esel jet say kabol la eg to a-selan, waray dimonyo ja pimeket son si-kato. Si Jesus, inpabtik to sota dimonyo nodtan na too jet sota too, nan-esel ma. Jet sota ira eshakil la too, nasshaaw iren pasiya.

¹⁵ Nem sota ira eshom, endedamsis sha, ja kowan sha ey, “O-owap to kari ey wáres Apo Shiyos son si-kato. Say toka osala ja pebtik so ni dimonyon pimeket shi totoo ket sota apo met laeng ni dimonyo ja si Bilsibol.”

¹⁶ Sota ira eshom, piyan shen peshasen si Jesus, isonga inkowan sha ey mandeka ni milagro ja asanan sha so kono no podnon inbetkag ali nen Apo Shiyos.

¹⁷ Nem si Jesus, amta toy wáred nemnem sha, isonga kowan to son si-kara ey, “Dokodoko tan na inkowan jo. Apay nga inkowan jo ey sota apo ni dimonyo i naka osala? Eg towak todongan na pebtik so ni kait to met laeng, ta amta to ey sajay, arig toy ilin nanshowa. No manshowa shorog i sakey ya ili asan ireka mankobat, kenshat ta mepilshi sotan na ili. Kasta met sota pamilja ja manshowa, mansisi-jan ira sota totoo.

¹⁸ Eg mebedin na si Satanas, pebtik to met laeng i kait to, tep amta to ey no dag-en to iyay, eg onbayag i pansaad to. Kowan jo ey naka pebtik iray dimonyo tep si Bilsibol i emenodtodong son si-kak?

¹⁹ No kasta, kowan jo ey si-kato ngarod i ka-osala ni too jo ni shaka pengipebtik ngo ni dimonyo? No sotan i kowan jo, angken sota too jo, bedawen sha ita kowan jo ey sota apo ni dimonyo i ema-osal ni pebtik so ni kait ton dimonyo.

²⁰ Nankamali kayo. Si Apo Shiyos i kaontolong son si-kak ja pebtik so ira ni dimonyo. Jet sotan i amta-an jo so ey say pantoshayan nen Apo Shiyos, wára ma son si-kayo.

²¹ “Say arig ni naka pesing so ni dimonyo, sajay. No sota toon wáray almas to ja matekal la mekigobat, enshiy en mengibot ni kokowa to no bantayan to ni olay sota baley to.

²² Nem no ebaken ni sakey ya toon mas matekal ey say sota wáray almas to, al-en nonta mas matekal la emin da sota almas ton toka panshindi et ibingbingay toy kokowa nonta na-abak.

²³ “Sota toon eg on-onod son si-kak, wára ira son Satanas, ja sha-akka kontra-a. Jet sota eg ontolong son si-kak ja mengolnong ni too, singa shaka pansisi-jan ira sota totoo.

²⁴ “Kaspangarigan ey sota toon istay imonod son si-kak nem eg to intoloy, mema-ma et ngo mowan i kasesaad to. Sajay, may-eshig nodta toon bintikan ni dimonyo. No sota dimonyo ket onbetik shi too, eman-eka-ekad shima kamag-an ja eman-ena-enap ni pansalshengan to, nem enshiy to sepolen. Isonga nemnemnemen to ey on-oli mowan shima toon istay kawad-an to.

²⁵ Jet no may-odi, sebi-en ton mimapteng ma jet ikowan to ey, ‘Siya, edinisan ma iya baley ko.’

²⁶ Say pesing to, ondaw ja en mengodop ali ni piton kait to ja nankekedsel nem say si-kato, jet onsekep iren man-iyen nodtan na too. Jet sotan na too, mema-may kasesaad to ey say nonta pilmiro.”

²⁷ Idi naksheng nga inkowan nen Jesus iyay, wáray biin inkedsang toy esel to ja naydaok so ira nonta eshakil la too, ja kowan to son Jesus ey, “Si Apo Shiyos i emindisiyon so nonta biin engi-nak son si-kam!”

²⁸ Nem kowan nen Jesus ey, “Ebadbadeg i bindisiyon pay nen Apo Shiyos so nonta ira mengitneng ni esel to tan memati ni kowan to!”

Pan-ibaga ira nonta eshom ma too ey mandeka si Jesus ni milagro

²⁹ Kanayon na manka-shomi sota ira too ja mantetneng son Jesus. Jet nontan, inkowan to ey, “Ngaaw iray aramid ni too ma niman! Say shaka pan-ibaga, sota milagro, ta kowan sha ey si-katoy asanan sha so no agpayson si Apo Shiyos i engibetkag son si-kak. Nem enshiy milagro ja en maypa-sas son si-kara niman! Say pengamta-an jo ey inbetkag towak nen Apo Shiyos, no onsabi son si-kak sota inges toy epasemak so nen Jonas nonta bayag da.

³⁰ Tep si Jonas, nonta inmotok tod Niniba, si-katoy mismon engamta-an sha nontan na timpo ey si Apo Shiyos i engibetkag son si-kato. Inges towak ja kowan sha ey Anak ni Too, waray pengamta-an ni too nem ekay ey si-kak i inbetkag nen Apo Shiyos.

³¹ “No timpo alin pengigsheng nen Apo Shiyos no sipay maysedakan, ondayat sota arin bii ja edapod ma pesaw, jet ikowan to ey kenshat ta meshosa kayo. Tep si-kato, edapod arawin dogad ni indaw ton to itenengan i kalaing nen Ari Solomon ni toka pantosho. Jet niman, asas jo ta wared jay i engatngato ey say si Ari Solomon, jet eg jo pinati.

³² Say sakey pay, sota totood Niniba ja in-tod-an nen Jonas. Ondayat ira di no timpon pengigsheng nen Apo Shiyos no sipay maysedakan jet ikowan sha ey kenshat ta meshosa kayo. Tep si-kara, nanbebawi ira nonta inteneng shay esel nen Apo Shiyos ja inkowan nen Jonas son si-kara. Jet niman, asas jo ta iyay

shiyay niman i engatngato nem say si Jonas, jet eg jo mowan pinati.

³³ “No bilang ey wáray kingki ja inparedang mo shi naydaem ni baley, simpri eg mesa-keban, no diket maypa-tok shi ekayang, say sota ira toon onsekep ali, asen shay seskepan sha.

³⁴ “Sota matam, si-katoy may-eshig ey silew ni bakdang. Jet no mapteng i toka pengesas ni eshom, sota bakdang mo, may-eshig ey napno ni dawag. Nem no sota matam ket ngaaw i toka pengesas ni eshom, may-eshig ey emin na parti ni bakdang mo ket wáred embolinet.

³⁵ Isonga pantanshaan ka, ta no ma-enshiy istay dawag ni nemnem mo, may-eshig ey embolinet ngon emin i kawad-an mo.

³⁶ Isonga no napno i emin na parti ni bakdang mo ni dawag, ja enshiy parti ton embolinet, napno ka ngo ni kinamapteng, ja singa inges toy silew ja sinilwán toka.”

Inkowan nen Jesus sota basol ira nonta Parisiyo man sota basol ni kait sha

³⁷ Idi naksheng si Jesus ja nan-esel, sota Parisiyo, inewís tos Jesus ja en mekipengan shi baley to, jet dimaw si Jesus ja en ekilikob son si-kato.

³⁸ Sota Parisiyo, nasshaaw nonta dinmo ton eg nanbolo nin si Jesus ni inpangan to.

³⁹ Kowan nen Apo Jesus son si-kato ey, “Si-kayon Parisiyo, say itsora ni ogadiyo, singa sota tasa ono malokong ja showal to bengat i eki-wanan, nem sota dikong to, edogit ta pasiya. Sotan i kay-eshigan jo tep say joka ipa-sas shi

karakdan, singa maronong kayo, nem say joka dagdag-a, sota pengamkamkam ni kompormi tan sota eshom ma ngaaw.

⁴⁰ Enshiy am-amtayo! Si Apo Shiyos, piyan ton mapteng koma i wared poso jo, ja inges toy mapteng nga joka pesing shi sango-an ni totoo.

⁴¹ No shi ebiteg komay joka pengi-kani ni wara son si-kayo, mapteng may emin na wared poso jo.

⁴² “Kaasi kayo di, si-kayon Parisiyo! Ta joka tongtongpala sota bilin na ootik i pateg to, nem joka et ngo mowan ibiyang sota bilin na epateg ga pasiya! Kaspangarigan, joka idaton so nen Apo Shiyos ja singa bingay to sota maykesampolo nodta emin na apit jo, angken pay sota molejo ja para seng-ew ni sira. Nem joka diwayi sota koston pesing shi kait jon too tan sota penmek jo son Apo Shiyos. Sajay ya joka pesing nga mengi-kan ni singa bingay nen Apo Shiyos, mapteng; nem mesepol la eg jo diwayan iya wa-wa-shen piyan nen Apo Shiyos.

⁴³ “Kaasi kayo di, si-kayon Parisiyo! Ta pipiyan jon ontongaw shima naysaganen tongawan say mebigbig kayo, tan pipiyan jo pay ya rispito-en shakejo ni totoo, ja semsemano-an shakejo shima malkaro ja karakdan ni too.

⁴⁴ Kaasi kayo din pasiya! Ta may-eshig kayon singa naybeka-an ni too ja enshiy malka to, ja eg idasin ni toon man-ekad.”

⁴⁵ Sota sakey ya maistoro ni dinteg ni Hodiyo, kowan to son Jesus ey, “Maistoro, idi inkowan mo iyay, singa inda-kam mokamin maistoro ni dinteg et ebebaingan kami ngo!”

⁴⁶ Simongbat si Jesus ja kowan to ey, “Angken si-kayo ngon mamaistoro ni dinteg, kaasi kayo di! Ta joka ida-kariy too ni embel-at ta bilin jon eg sha iposi. May-eshig ey joka ira bel-ati ni kalka ja eg sha iposi, nem si-kayon mismo ket eg jo pay peshasen na angken sakey ya kalomot joy mandi-bit.

⁴⁷ “Kaasi kayo di! Ta si-kayo i nandaga ni monyominto ira nonta para padto nen Apo Shiyos nonta bayag da ja binbinno ni ap-apo jo la nontan da.

⁴⁸ Sata ira monyominto ja inemag jo, si-katoy ka-asan to ey joka aporbali sota inpamono nonta ira apo jo la so nonta ira para padto nen Apo Shiyos nonta bayag da. Sota ap-apo jo i emono et si-kayo ngoy engamag ni monyomintora.

⁴⁹ Nay-eshom kayo nodta aramid da nonta ap-apo jo, isonga agpayso noman sota kowan nen Apo Shiyos ey, ‘Mengibetkagak da ngo son si-kara ni totoon para padto tan sota eshom ma totoo ja mengikowan ni esel ko. Nem bono-en sha sota ira eshom, tan pedigaten shay eshom.’ Sajay i inkowan nen Apo Shiyos tep amta to ey tima-nil kayo ja en-oges joy toka ibetkag ali son si-kayo.

⁵⁰ Isonga si-kayon too niman na timpo, meshosa kayo di ja ikaro jo sota inpamono ni ap-apo jo so nonta ira inbetkag nen Apo Shiyos, manshoki nonta inkapalsowa niya dobong ingkato niman.

⁵¹ Say pilmiron ebono nontan da bayag, si Abel, jet say ka-onoran, si Sakarias, ja binono ni too nonta bayag da shima naydaem ni Timplo,

ja nay-esop shima kowan sha ey altar. Owen, ikowan ko ey emin iyay, si-kayon too niman i mengikesho.

⁵² “Kaasi kayo di, si-kayon mamaistoro ni dinteg! Ta si-kayo i kabol la eg so amta-an ni totoo ni maypangkep so nen Apo Shiyos. Si-kayon shorog, eg jo koston amta-an, jet si-kayo i timiped so ira nonta toon makapiyan na mengamta.” Kowan nen Jesus.

⁵³⁻⁵⁴ Idi naksheng nga inkowan to iyay, bimo-day si Jesus nodtan na baley. Nem sota mamaistoro ni dinteg ni Hodiyo tan sota ira Parisiyo, empait shen pasiya sota inkowan to; isonga manshoki nontan, pineshas shen pasiya i kabaalan shen menaol son si-kato. Say inpasing sha, eshakil i inbagabaga sha son si-kato ni maypangkep ni ka-iri-irin, ta kowan sha ey balang nem waray pankamali-an ton isongbat, ja pebesolan sha son si-kato.

12

Si Apo Shiyos bengat i mesepol la metekotan, nem ebadeg ngoy semek to

¹ Nontan, shimakel la pasiyyay totoon emay-odo-odop son Jesus, ja shaka pay pan-ikatin i sedi ni eshom. Jet nontan, waray inkowan nen Jesus, nem wa-wa-shen sota too to i toka pan-ikowani so; kowan to ey, “Tanshaaniyo iray Parisiyo, tep singa mapteng ira nem o-owap gayam i kamapteng sha. Baka ma-edinan kayo ni ngaaw wa ogadira, ja singa inges toy para debag ni tinapay ja toka edinay kaydaokan to.

² Kowan sha emo ey enshiy maka-amta ni ogadira, nem kenshat ta ma-amta-an. Emin na ngaaw wa aramid ni too ja shaka i-emot, ma-amta-an ngoreshan.

³ Emin na esel la sikrito, ma-amta-an shi karakdan, tan emin na esel la maytetobo shi naydekeb ba kowadto, maykeljaw ngod karakdan.

⁴ Kagajem ko, iyay i kowan ko son si-kayo. Karekayo ontakot so nonta ira makakontra son si-katejo, tep bakdang bengat i kabaalan shen bono-en.

⁵ Nem say mesepol la metekotan koma, si Apo Shiyos, ta wáray kabedinan ton mengipedaw son si-kayo shi impiyarno nem meksheng kayon metey. Owen, mesepol la si-katoy tekotan jo!

⁶ “Nem wára ngoy ebadeg ga semek nen Apo Shiyos. Nemnem jo kari sota titit. Enshiy banol ni titit, nem eg to ira ibiyang. No wáray menongkal ni titit, angken showen sintimos i dima, nem angken sakey so nonta ira titit, enshiy en dinibkan nen Apo Shiyos.

⁷ Angken pay sota bowek ni toktok jo, amta nen Apo Shiyos i kabebilang to. Isonga karekayo ontakot tep nandasin i semek to son si-kayo nem say sota eshakil la titit.

⁸ “Iyay pay i ikowan ko son si-kayo. Sota toon mengikowan so ni too ey wára son si-kak, si-kak ja kowan sha ey Anak ni Too, ikowan ko ngo shi sango-an ira ni anghil nen Apo Shiyos shi dangit ey sotan na too ket took ka emepiyal.

⁹ Nem sota toon mengikowan so ni too ey eg towak amta, ibiyang ko ngo shi sango-an ira nonta anghil nen Apo Shiyos shi dangit.

10 “Angken sipen too ja ngaaw i toka ikokowan maypangkep nonta kowan sha ey Anak ni Too, mebedin na mepekawanan. Nem sota ngaaw i toka ikokowan maypangkep nonta Ispirito Santo nen Apo Shiyos, eg mebedin na mepekawanan.

11 “No idaw shakejon mebistigal shi sango-an ni toray ni Hodiyo, ono shima engaton toray, karekayo meshanagan no ngarantoy isongbat jo ono ngarantoy ikowan jo son si-kara,

12 ta sota isongbat jo, ipa-amta met laeng ni Ispirito Santo nen Apo Shiyos son si-kayo nontan na oras ja shakejosoka pan-ibag-i.” Kowan nen Jesus.

Intoro nen Jesus ey sota pengamkam ni asdeg ton kokowa, enshiy silbi to

13 Waray toon naydaok nodtan na eshakil la totoo ja kowan to ey, “Maistoro, ikowan mo son agik ey panbingay mi sota tawid ja minus-an to.”

14 Nem si Jesus, kowan to ey, “Kajem ko, aliwen si-kak i mengigsheng nita tawid jon kowan mo ey panbingay jon san-agi.”

15 Jet intoloy ton waray inkowan to so nonta totoon eshakil ey, “Pantanshaan kayo ta baka waray pengamkam jo ni kompormi, ono apal jo ni kokowa ni eshom, ono ma-isew kayo. Say biyag ni too, aliwen shi kokowa toy toka pandepo-i, no diket si Apo Shiyos i nanngel, angken ngantoy kabaknang to.”

16 Jet si Jesus, in-arigan to ira ja kowan to ey, “Waray baknang ja asdeg toy toka epita nodta bo-day to.

¹⁷ Say kowan to shorog ni bakdang to, 'Enshiy pengitdo-an ko nima eshakil la apit ko. Ngantoy pesing ko aya?'

¹⁸ Nannemnemnem, jet say kowan to shorog shi bakdang to, 'Sajay gayam i dag-en ko. Bagbagen ko ima sigod ja naka pengitdo-i et mengemagak ni ebadbadeg, jet si-katoy pengitdo-an ko ni emin na apit ko, tan sama eshom pay ya kokowak.

¹⁹ Jet say wára med nemnem ko, ekak ma man-shanag tep wáren emin i mesepol ko ni pigen tawen. Angken ekak ma man-obda! Menganak tan inginomak bengat. Dadsak may dagdag-en ko!'

²⁰ Nem say kowan nen Apo Shiyos so nontan na baknang, kowan to ey, 'Dokodoko tan na nemnem mo! Niman na dabi, odi-en koy biyag mo! Jet eg mo kenasen ita emin na kokowam ma inolnong mo!' "

²¹ Kowan pay nen Jesus ey, "Say pengidmang nen Apo Shiyos so ni toon baknangan to bengat i toka nemnemnema, ebadeg i nankolongan to. Say mepesamak ali son si-kato, inges to sota epasemak so nonta baknang shiyay den istoriya."

Si Apo Shiyos i mengajowan son si-katejo

²² Si Jesus, kowan to so nonta too to ey, "Isonga say kowan ko son si-kayo, aliwén kayo meshanagan ni panbiyag jo: no ngarantoy kenen jo ono ibaro jo.

²³ Ta say biyag tan bakdang, epateg nem say mekan tan baro. Si Apo Shiyos i engi-kan ni

biyag tan bakdang et si-kato ngoy mengi-kan ni kasapolan to.

²⁴ Idmang jo kari ira ja kawang ono owak: eg ira manmoda ono mengepit; enshiy shaka pengitdo-i ja sarosal sha. Nem si Apo Shiyos i ememekan son si-kara! Jet arawin nandasin i semek to son si-kayo nem say sota ira titit.

²⁵ Sota joka panshananag, eg to met peshokey i biyag jo ni angken ootik bengat.

²⁶ No sota shanag jo ket eg to posi-en iyay ya ootik ka banag, apay nga sota panbiyagan joy joka panshanagi pay laeng?

²⁷ Asas jo kari ira sota sabsabong shima shon-tog; nemnem jo kari no toway toka pesing nga manbiyag. Eg met man-obda ono mengebel ni baro, nem iyay i ikowan ko son si-kayo. Angken si Ari Solomon ja kabaknangan nonta bayag da, emin sota osal ton nankemapteng, eg sha pay ingesen i kamapteng ira nima sabsabong.

²⁸ Sota sabsabong, maganoy ka-enshi to: emansebong niman et no mewá-wá, maypool shi apoy. Nem si Apo Shiyos ket eg to i-oway. Sinto pay kayo mangon too to ja to i-oway! Isonga eg tokejo baybay-an. Si-kayo, ootik eshan i pamatiyo, isonga kayoka meshanagin pasiya.

²⁹ Tan aliwen sota kenen jo tan inomen joy jo nemnememen. Karekayo manshanag,

³⁰ tep si Amejon wared naykayang, amta toy emin na mesepol jo. Sota ira toon enshiy pamatira son Apo Shiyos, anam shen manshanag ni panbiyagan sha, aliwen si-kayo.

³¹ Nem say epateg komen nemnememen jo, sota

pantoshayan nen Apo Shiyos. No sajay i pesing jo, emin na banag ja kasapolan jo, i-eshom nen Apo Shiyos ja i-akan son si-kayo.

³² “Si-kayon took ja naka banbantayi, karekayo ontakot. Angken ootik kayo, si Amejon wared naykayang, eman-imdeng nga pasiya ja si-kayoy mayda-kam shi pantoshayan to.

³³ Ilekoyoy kokowayo et sota pandeko-an jo, i-kan jo so nonta totoon makasapol. Sotan i koston pesing nga mengolnong ni kokowa shi dangit ja eg mepilshi. Shiman, enshiy mengibot so, tan angken sota baro, enshiy bigis sa onsharal so.

³⁴ Shi dangit komay wa-wa-shen pengolnongan jo ni kokowayo, ta sota kawad-an ni kokowayo, si-katoy wared nemnem jo ni olay.

Kowan nen Jesus ey mesepol la esagana ni olay ira sota too to

³⁵⁻³⁶ “Mesepol la esagana kayo ni olay ja enshiy ontiped ni pansilbiyo son si-kak. Mesepol la ingesen joy kepansesked ni baga-en shiyay ya istoriya. Waray toon dimaw ja eki-atindar ni kasal et sota ira baga-en to, kanayon na ireka mansessesked ali ni imotok to. Wara ni olay i silew sha, say no menogtog si apo sha, idokatan shen shagos.

³⁷⁻³⁸ Ta no onmotok ali, ja angken kawa ni dabi ono palbangon, sota ira baga-en ton sebi-en ton eg na-ogip, bindisiyonan nonta apo sha. Man-imdeng ira tep sota apo sha, petongaw to ira jet si-kato et ngo mowan i mengi-kan ni kenen sha.

³⁹⁻⁴⁰ Jet angken si-kayo, pansagana kayo, ta say imotok ko ali, kompormin oras ja inges toy kaidaw ali nonta mengibot shi baley. No sota makabaley ket amta to koma no ngaranton oras ni edabi i idaw ali nonta mengibot, kenshat ta mansekana, eg to itolok ka onsekep sota mengibot shi baley to. Jet angken si-kayo, mesepol la esagana kayo ni olay.” Kowan nen Jesus.

⁴¹ Jet kowan nen Pedro ey, “Apo, si-kamin toom i inkowanan mo so niyay ya arig, ono angken pay sota karakdan?”

⁴² Si Apo Jesus, simongbat ja kowan to ey, “Sota baga-en ja emepiyal, ja amta toy toka dagdag-a, si-katoy piyalen nonta apo ton mengimanshal ni kokowa to, tan si-katoy mepiyal la mengi-kan ni dasjon ira nonta kait ton baga-en no timpo to.

⁴³ Jet no sotan na baga-en ket maramen eman-obda ey onmotok ali sota apo to, mapteng i konkona ton i-akan nonta apo to.

⁴⁴ Agpayso iya ikowan ko son si-kayo. Sotan na baga-en, no sebi-en nen apo ton eman-obda, si-katoy piyalen nen apo to ja en mengimanshal nonta emin na kokowa to.

⁴⁵ Nem sota sakey ya baga-en, ja kowan to ey, ‘Angkena tep si apok, metaktak alin onmotok’, kakaasi sotan. Ishogi ton sepsepdaten ira sota kait ton baga-en, ja daleki man tan bibii, tan mesiwat ni dadsak ton pengan tan penguinom ingkatod keboteng to.

⁴⁶ Kakaasi sotan na baga-en tep sota apo to, on-oli ali jet ondibag tep eg to amta sotan na i-oli ali nonta apo to. Jet sotan na baga-en, pekishosa to so nonta ira kait ton baga-en ja eg mepiyal.

⁴⁷ “Sota baga-en ja amta toy piyan nonta apo ton dag-en to, nem eg to pati-en, embel-at i shosa to.

⁴⁸ Nem sota baga-en ja eg to amtay piyan nonta apo ton dag-en to, jet wáray dag-en ton panbesolan to, engka-jas i shosa to. Iyay i nem-nemen jo koma. Sota toon wá-wá-shay nay-akan son si-kato, asdeg toy namnama-en ni apo ton obda-en to. Tan sota toon ebadbadeg i may-ewát son si-kato, ebadbadeg ngoy songbatan to.

⁴⁹ “Dimawak alin mengidaw ni singa apoy shiya dobong et sapay koma ta wára ma niman.

⁵⁰ Waray bonjag alin mepesamak son si-kak et enshiy talnak ingkatod meksheng.

⁵¹ Aliwén jo ipangkep ey dimawak alin mengi-kan ni olnos shiya dobong. Aliwén sota maypangkep ni olnos i dinawán ko di, no diket say panbenagan ali ni indaw ko di, eg man-i-inawatan i totoo.

⁵² Manshoki niman, eg man-i-inawatan i angken toon sanpamilja. No kaspangarigan wáray nanpamilja ni dima, manshowa jet sota tedo, kabakal toy showa, tan sota showa, kabakal toy tedo.

⁵³ Angken sota a-ama, kabakal sha aliy annak sha. Kasta met iray i-ina tan annak shen bibii, manbekal ira. Angken sota bibiin san-inepo, manbekal ngo ira.”

“Apay nga eg jo ewatan i kay-odogan nonta emin na emepespesamak niman na timpo?”

⁵⁴ Kowan nen Jesus so nonta ira eshakil la totoo ey, “No asen jo aliy kolpot ja medepod baybay, amtayo ey kenshat alin on-oran.

⁵⁵ Jet no dekná-en jon emankedapo aliy shagem shi dogad ja kaptangan, amtayo ey kenshat ta onpetang ma diy timpo. Jet siya, kaonpetang i timpo.

⁵⁶ Joka ewatíy timpo alin onsabi no asen joy emankepasemak shi naykayang ono shiya dobong, nem apay nga eg jo ewátan ey emin sota emepespesamak niman na timpon kawashak son si-kayo, asdeg to met i kay-odogan to! Ma-o-owap kayon too!

⁵⁷ “Apay nga eg jo idasin i koston pansigshan jo?

⁵⁸ Niman na wáray wáya jo pay laeng, panbe-bawi kayo ni eg jowak so pinati-an. Ta say arig ni kasesaad jo, inges toy toon emankaikoyod shi oskaro maypangkep ni otang to. Isonga dagam i kabaalan mon mekikajem ma shagos son si-kato no maramen tokaka pan-i-ilaw shima oskaro, say eg toka i-awat nodta kowadja ja mengibedod son si-kam.

⁵⁹ Ta say kowan ko son si-kam, no wára ka ma shima badoran, eg ka onbo-day ingkatod bayshan moy oltimon sintimos ja inotang mo.”

13

Inkowan nen Jesus ey mesepol la ibebawi shay basol sha

¹ Nontan na timpo, wáray mimotok alin totoo et inkowan sha son Jesus ey, “Wara kono iray i-Galilia ja binono nen Gobinarol Pilato nonta maramen ireka emengi-kan ni daton sha son Apo Shiyos shi Timplo.”

² Si Jesus, simongbat ja kowan to ey, “No kasta, say kowan jo emo, ‘Isonga binonora ira ta ebadeg i basol sha nem say sota eshom ma tood Galilia; inkaro sha emo.’

³ Nem say ikowan ko son si-kayo, enshi. Jet angken si-kayo, no eg jo ibebawiy basol jo, metey kayon emin ja inges toy inkatey sha.

⁴ Asan say sakey pay, ngantoy kowan jo nonta sampolo tan wálon edisgrasiya shi Siloam ja etedteshan ja etey? Kowan jo mowan ey si-katoy ka-asan to ey ebadeg i basol sha nem say sota eshom ma tood Jerusalem?

⁵ Enshi. Jet say ikowan ko son si-kayo, no eg jo ibebawiy basol jo, metey kayon emin ja inges sha.” Kowan nen Jesus.

⁶ Jet si Jesus, inkowan toy arig son si-kara, ja kowan to ey, “Waray inmola ni too ja kowan sha ey higos. Idi bima-deg sota mola, dimaw iyay ya too, to inon-an nem wáray dames to. Nem enshin polos i dames to.

⁷ Isonga say kowan to nonta toon toka panbantay ni bo-day to, ‘Idmang mo kari. Tedon tawen na kanayonak alid jay ya mengesas nem wáray dames niyay ya mola, nem enshin polos ni olay, angken sakey. Batang mo et; pekewas to et iya bo-day ja naimola-an to.’

⁸ Nem say kowan nonta toon emanbantay, kowan to ey, ‘Bay-im nin apo, ni angken makatawen bengat. Iparas kon sedaro-an tan ebono-an.

⁹ Balang nem ondames alin sakey ya tawen. Nem no enshi, angken pebetang mo.’ ”

Inpamapteng nen Jesus sota bii ni timpon ngilin ni Hodiyo

¹⁰ Idi sakey ya akew wa ngilin ni Hodiyo, emantosho si Jesus shi baley ya sa-nopan ni Hodiyo.

¹¹ Jet wára nodtan i biin pingketan ni dimonyo. Sotan na dimonyo, inpansakit to sota bii ni sampolo tan wálon tawen. Napkoy beneg to jet eg mebedin na on-ekwas.

¹² Idi inon-an nen Jesus iyay ya bii, tinewal to ja kowan to ey, “Niman, ma-kal ma sota sakit mo.”

¹³ Inkepap toy takday to so nonta bii et nay-inshas ngon mimapteng i bakdang to, jet imekwas ma. Jet ebadeg i iyaman nonta bii son Apo Shiyos.

¹⁴ Nem sota pangolo nodtan na sa-nopan, bimonget tep inpamapteng nen Jesus sota bii nontan na akew ja timpon ngilin. Jet say inkowan to so nonta ira totoo, kowan to ey, “Enem ma akew i koston timpo ja pan-obdayo, jet si-kato ngo diy idaw jon en manpa-ekas, aliwén niman na timpon akew ni ngilin!” Kowan nonta pangolo.

¹⁵ Nem si Jesus, simongbat ja kowan to ey, “Si-kayon ma-o-owap! Aliwén emin kayo ket joka ibolos i nowang jo ono kabajoyo no akew ni ngilin, say en man-inom?”

¹⁶ Say kowan jo, ngaawak tep inbolos ko iya biin poli nen Abraham ja singa binedod nen Satanas ni sampolo tan wálon tawen. Say kowan ko, mesepol la ma-ekasan, angken akew ni ngilin.” Kowan nen Jesus.

17 Jet emin sota toon makakontra son si-kato, ebebaingan ira nonta esel ja inkowan nen Jesus, nem sota eshom ma totoo, ireka man-indeng nonta inon-an shen kaskasshaaw ja dingka to.

In-arig nen Jesus sota botil ni mola tan sota para debag ni tinapay

18 Intoloy nen Jesus ey, “Itnengiyo iya ikowan kon pengi-ingesan ni pantoshayan nen Apo Shiyos.

19 Say pantoshayan nen Apo Shiyos, may-eshig nodta botil ni sakey ya kalasin mola, ja ootilik. Sajay ya botil, inda ni too et in-esek tod bo-day to. Idi bima-deg sota mola, nanbalin ni ebadeg ga kadasan, jet sota ira titit, nan-obong ira shima pangpanga to.”

20 Asan kowan pay nen Jesus ey, “Iyay pay i i-arigan ko so ni pantoshayan nen Apo Shiyos.

21 May-eshig nodta para debag ni tinapay ja inda ni bii, ja to indaok nodta eshakil la arina ingkatod inedinan ton emin.”

In-arig nen Jesus sota edipit ta sakepan

22 Si Jesus, nantoro shi emin na dogad ja shindan to nonta dimaw shi Jerusalem.

23 Nodta sakey ya dogad, waray toon nansalod-sod son Jesus ja kowan to ey, “Apo, ootik ngatay maysedakan?”

Simongbat si Jesus ja kowan to ey,

24 “Dagejoy kabaalan jon pasiya say si-kayoy sakey. Ta say sakepan ja ondaw shi kaysedakan, may-eshig ey edipit. Ikowan ko son si-kayo, eshakil i totoon mengipeshas ja onsekep no onsabi sotan alin akew, nem eg mebedin.

²⁵ Ta no meksheng nga idekeb nonta makakokowa, angken pigay togtog jo, kenshat ta wára kayo med showal. Angken kowan jo ey, 'Apo, ilokati jokami!', eg ma mebedin. No diket say isongbat to, 'Eg takejo am-amta. Taway edapo-an jo?'

²⁶ Jet ikowan jo ngo ni songbat jo ey, 'Ekipengan kami met tan eki-inom kami son si-kam! Nantoro ka pay met shi ili mi!'

²⁷ Nem say isongbat to son si-kayo, 'Ekak met amtay edapo-an jo! Ki-nan kayod jay! Ta si-kayo, ngaaw i aramid jo nontan.'

²⁸ No timpo alin pantoshay nen Apo Shiyos, asen jos Abraham, Isaac, si Jacob, tan sota ira emin na para padto nen Apo Shiyos nonta bayag da, ja wára ira nodtan, nem si-kayo, maydesin kayod showal. Jet shiman, nangis bengat i dagdag-en jo, tan panngedetngat joy sangi jo ni daringit jo.

²⁹ Eshakel aliy medepod emin na sakop niya dobong, ja angken aliwén Hodiyos, jet si-karay ontongaw wa mekilikob shima pantoshayan ali nen Apo Shiyos.

³⁰ Jet sota eshom ma toon kowan sha ey si-karay mepangdon onsekep, si-kara et ngo mowan i man-onod, jey sota eshom ja nan-onod niman, si-kara et ngo mowan i mepangdo." Kowan nen Jesus.

³¹ Nontan met laeng nga oras, wára iray Parisiyo ja dimaw son Jesus jet sha inkowan ey, "Betik ka niman shiyay, daw ked eshom ma dogad. Ta si Ari Hirodis, piyan ton bono-en toka."

³² Nem simongbat si Jesus ja kowan to ey, “Jo ikowan so nita sinan arin masikap ey ekak idekjas nin iyay ya dogad to. Niman tan kabasan, naka panpebtik iray dimonyo shi totoo, tan naka panpemapteng sota totoon emanpansekit. No bowas to, meksheng may obdak shiyay.

³³ Nem siya, angken wára-ak shiya sinekohan to ingkatod bowas to, itoloy ko met laeng ja ondaw shi Jerusalem. Tan sakey pay, eg mebedin na mebono-ak shiyay. Tep say kebono-i ni toon inbetkag ali nen Apo Shiyos, shi Jerusalem, jet na-alas no waray mebono shi apil la dogad!”

³⁴ Jet si Jesus, idi ninemnem toy kakedsel ni tood Jerusalem, dinekna toy toka pengisekit son si-kara, jet kowan to ey, “Si-kayon tood Jerusalem! Manshoki nonta bayag da ingkato niman, joka bono-a ni olay ja kespigan ni bato iray inbetkag nen Apo Shiyos son si-kayo, pati sota ira para padto. Ara, piga mangoy pesing ko son si-kayo! Eminshakel la piyan kon i-okong takejon i-Jerusalem ja inges to sota kepengi-okong ni manok ira ni kipkip to. Nem en-asneng kayo!

³⁵ Niman ma, olay to kayo ngo, tep enshis Apo Shiyos shi Timployo ja mengibediw son si-kayo. Jet ikowan ko ey si-kayon i-Jerusalem, waray timpon imotok ko son si-kayo ja asen jowak et ikowan jo ey, ‘Bindisiyonan koma nen Apo Shiyos iya toon inbetkag to di!’ ”

14

Ekipengan si Jesus shi baley nonta Parisiyo

¹ Nonta sakey ya akew ja timpon ngilin ni Hodiyo, dimaw si Jesus ja en mekipunan shi baley nonta sakey ya pangolo ni Parisiyo. Jet sota ira makakontra son Jesus, shaka si-siimi no ngarantoy dag-en to.

² Jet naytompong nontan ja waray dimaw son Jesus ja toon dimarag iray sedi to tan takday to.

³ Si Jesus, inbag-an to sota ira mamaistoro ni dinteg ni Hodiyo tan sota ira Parisiyo ja wara nodtan, ja kowan to ey, “Ngantoy kowan jo? Kaiparit aya ni dinteg tayon Hodiyo i pemapteng so ni toon emansekit ni akew ja timpon ngilin, ono enshi?”

⁴ Nem enshiy shaka isongbat. Jet si Jesus, kimpap to sota too et na-kal sota darag ni sedi to tan takday to. Jet kowan ma nen Jesus son si-kato ey, “Siya, daw ka.”

⁵ Jet kowan nen Jesus so nonta emeni-siim son si-kato ey, “No kaspangarigan sota sakey son si-kayo ket ma-kas i anak to ono baketo shi pel-og ey naytompong nga akew ni ngilin nontan, eg jo aya kano-an ja en al-en nontan met laeng nga akew?”

⁶ Nem nasdengan ira, ja enshiy sha isongbat ni maypangkep niya inkowan to.

⁷ Inon-an nen Jesus ey sota ira eshom ma bisita, ireka manpidi ni mapteng nga dogad ja tongawan. Isonga inkowan to iyay ya arig son si-karen emin, ja kowan to ey,

⁸ “No waray mengewis son si-kam shi kasal, kareka ontongaw shima kamaptengan, ta eg mo amta no waray eshom ma toon epateg pay ey si-kam ja na-awis nodtan na kasal.

⁹ No iba-ngat moy tongaw nodta kamaptengan, baka ondaw ali sota engawis son si-kayon showa et ikowan to son si-kam ey, 'Dayat ka, aliwén si-kam i ontongaw shiyay; saja opisiyal.' Jet nakol ni si-kam i mebebaingan ja en ontongaw nodta kawad-an ni nankebabén too.

¹⁰ Say mapteng nga pesing mo no ma-éwis ka, tongaw ka shima kawad-an ni nankebabén too, say no asen toka nonta engawis son si-kam, ondaw ali ja to ikowan son si-kam ey, 'Kajem, kaled ja kad-an ni nankengaton too.' Jet sajay i kayshedjawan mo shi sango-an ira nonta emin na eshom ma bisita.

¹¹ Sota mengingeto shorog ni bakdang to, maybeba et ngo mowan. Jet sota mengibeba ni bakdang to, si-katoy mayngeto."

¹² Jet kowan nen Jesus so nonta Parisiyo ja engawis son si-kato ey, "No nemnemen mon memekan ni eshakil la totoo, aliwén sota kagem mo komay éwisen mo, ono sota a-akim, ono partidom, ono sota ira bebaknang ja inaskang mo, ta mebedin na i-inges sha ngoy inpasing mo, ja éwisen shaka ngo, jet mesobalitan sota mapteng nga inpasing mo son si-kara.

¹³ No kaspangarigan ey manpiyasta ka, say éwisen mo komen en mekikan, sota ira nankebiteg, nankepilay, nankeki-ngoy i takday sha, tan sota nankekorab. No satan i pesing mo,

¹⁴ kosto may imdeng mo. Tep sajay ira, eg sha kabaalan na onsobadit son si-kam ni inges nonta inpasing mo, isonga si Apo Shiyos i onsobadit son si-kam no timpo alin panbiyag mowan nonta ira totoon emati nonta bilin nen Apo Shiyos nontan

den wára ired biyag pay laeng.”

¹⁵ Waray sakey so ira nonta naydikob son Jesus; inteneng to sota inkowan nen Jesus sa “panbiyag mowan” et kowan to son Jesus ey, “Magesat ira di sota wáren mekilikob nem timpon pantoshayan nen Apo Shiyos.”

¹⁶ Say songbat nen Jesus so nontan na too, inpalaw to shi sajay ya istoriya, ja kowan to ey, “Waray toon nanpiyasta ni ebadeg et engawis ni eshakil la totoo.

¹⁷ Nonta shanshani sota piyasta, engibetkag ni baga-en ton en mengikowan ira nonta na-awis sa bisita ey naysaganen emin, isonga angken ondaw da ira.

¹⁸ Nem emin ira sota na-awis, nanpangbal ira. Sota pilmiro, kowan to nodta inbetkag ni manpiyasta ey, ‘Waray tinongkal kon payew. Mesepol la ondawak, nak asen. Pangpangaasim, pasinsiya-imak.’

¹⁹ Kowan ngo nonta sakey ey, ‘Enongkalak ni dimen paris sa bomalon nowang. Mesepol la ondawak, nak bisna-en. Pangpangaasim, pasinsiya-imak.’

²⁰ Jet sota sakey, kowan to ngo ey, ‘Ikaypangasawak, isonga ekak maka-edaw.’

²¹ Sota baga-en, nay-oli et inkowan ton emin sota dason nonta ira istay to odopen so nonta apo to. Jet sota apo to, bimonget et kowan to ey, ‘Kano-im, daw ka shima kalkalsara ni siyodad ja kesa-nopi ni totoo, jet angken sota ira nankebiteg, nankeki-ngoy i takday sha, nankekorab, tan nankepilay, olop mo di ira.’

²² Simongbat sota baga-en ja kowan to ey, 'Apo, tinongpal ko sota inkowan mo, nem ewaya pay laeng, angken eshakil pay aliy ondaw.'

²³ Jet kowan nonta apo to ey, 'No kasta, daw ka shima dogad ja eg sinekohan ni siyodad, jet angken sota totoon asen mod shalan, pilit mon ewisen ira say ondaw ali ira et mepno iya baley ko.

²⁴ Nem sota ira et ngo mowan na na-awis sa sigod, angken sakey son si-kara, enshiy mayda-kam ja mekikan.' "

Kowan nen Jesus ey mannemnem nin ira asan ireka onod son si-kato

²⁵ Nontan, eshakil la pasiya i totoon emay-odo-odop son Jesus shi shalan. Nanposipos si Jesus et kowan to son si-kara ey,

²⁶ "Sota toon ondaw ali ja kowan to ey manbedin ni took, mesepol la si-kak i wa-wa-shen patkan to, ja aliwen si ameto, ineto, asewa to, annak to, a-aki to, ono sota bakdang to shorog. No sota eshom i wa-wa-shen patkan to, eg maykeshin took.

²⁷ Jet sota toon eg to enosan i kaybebaing to ono kebitay to maypangkep son si-kak, eg mebedin na manbedin ni took.

²⁸ Mesepol la nemnemen to nin i pandikat to ali maypangkep son si-kak, asan ka-onod. Arig toy pannemnem ni toon mandeka ni baley. Simpri ontongaw nin jet kowinta-en to nem pigay kasto-en to, say amta-en to nem on-anay sota pilak to ingkatod meksheng sota baley.

²⁹ Ta no iba-ngat toy towen ey enshiy on-anay ya kasto-en to, eg mebedin na meksheng sota

baley. Kekshengan ni itowen to so ira ni tokod, eg to ma itoloy. Jet emin ira sota mengesas, damsisen sha,

³⁰ ja kowan sha ey, 'Sajay ya too, inshogi ton mengitakshel ni baley to, nem eg to posi-en na kekshengen.'

³¹ Arig to mowan sota sakey ya ari ja sampolon diboy solsharo to. No sota kabakal ton ari, showen polon diboy solsharo to, simpri ontongaw nin ja kowinta-en to no on-anay i kedsang ni too ton onsango.

³² Jet no kowinta-en to ey eg mebedin na ebaken to sota sakey ya ari, mengibetkag ni mepangdo ja en mekitongtong, sakbay ya eg nayshogi nin i kobat.

³³ Sajay i arig ni toon kowan to ey manbedin ni took. No waray banag ja wa-wa-sha son si-kato, ja aliwen si-kak i toka patki et ngo mowan, eg maykeshin took.

³⁴ "Isonga iyay i ibanshaan ko son si-kayo. Say asin, mapteng. Nem no ma-enshi i pait ni asin, ja entamnay ma, eg maymowan.

³⁵ Enshiy to ka-osalan: ngaaw wa para bo-day tan eg maydaok shi abono. Kenshat ta may-ibong. Niman i waray waya jon mengitneng niya banshaan ko. Isonga singpet jon itenengan."

15

In-arigan nen Jesus ira ni showen arig pay say balang nem manbebawi ira ni basol sha

¹ Idi sakey ya timpo, eshakil iray dimaw alin para singil ni bowis, tan sota eshom iren inbiyang ni karakdan tep kowan sha ey managbasol; dimaw ira son Jesus ja en nanteneng ni kowan to.

² Jet sota ira Parisiyo tan mamaistoro ni dinteg ni Hodiyo, inkotot sha si Jesus, ja kowan sha ey, “Sajay ya too, inawat to ira sota totoon eshakil i basol sha, tan ekipengan pay son si-kara!”

³ Jet si Jesus, in-arigan to ira, ja kowan to ey,

⁴ “Kaspangarigan ey waray nankalniro son si-kayo ni sandasos, nem ma-etiw i sakey, ngantoy pesing jo? Eg jo aya idekjas nin sota siyam ma polo tan siyam ja kalniro nodta pastolan et jo enapen sota sakey ya kalniron na-atiw, ingkatod sepolen jo?”

⁵ Jet no sepolen jo, sakbaten jon i-akad et man-imdeng kayo ma.

⁶ Jet no i-akad jod baley jo, ta-walen jo ira sota kagajem jo tan inaskang jo, ja kowan jo ey, ‘Mandaladsak kito, ta simpol ko sota kalnirok ka na-atiw!’

⁷ Say kowan ko son si-kayo, inges niyay i pandadsak nonta anghil shi dangit no manbebawi i sakey ya toon eshakil i basol to, nem say sota siyam ma polo tan siyam ja maronong, ja eg mesepol la manbebawi.

⁸ “Kaspangarigan mowan ey waray bii ja waray sampolon palata to jet ma-etiw i sakey, ngantoy pesing to? Eg to aya enapen ja silwan shima emin na shogo? Si-si-an to pay i baley to, jet singpeten toy anap ingkatod sepolen to.

⁹ Jet no simplol to, ta-wálen to iray kagajem to tan inas-askang to et ikowan to ey, 'Mandaladsak kito, ta simplol ko sota palatak ja na-atiw!'

¹⁰ Inges niyay i pandadsak nonta ira anghil nen Apo Shiyos no manbebawi i sakey ya toon eshakil i basol to."

In-arigan ira nen Jesus ni arig ja sota ama, kinaasi-an to sota anak ton naynemneman

¹¹ Si Jesus, intoloy to, ja kowan to ey, "Waray sakey ya too ja waray showen dakin potot to.

¹² Sota orishiyán, kowan to so nen amesha ey, 'Tatang, al-en ko sota tawid kon ibingay mo son si-kak.' Jet sota amesha, timolok, jet inpanbingay to sota tawid so nonta ira showen potot to.

¹³ Idi edabas i pigen akew, sota orishiyán, indako to sota tawid to et dimaw shi arawín ili. Nem sota pilak to, kinasto to ni kaloko-an.

¹⁴ Binolbol ton emin sota oltimon pilak to, ey onsabi i bitil nodtan na ili ja dinawan to.

¹⁵ Jet sinodngan ton en eki-iyán shi sakey ya too nodtan na ili et inbetkag shen para pakan ni keshel.

¹⁶ Singa piyan to ngon mekikan ira nodta keshel, ta enshiy emengi-kan son si-kato ni kenen to.

¹⁷ Jet idi anongosto ma, naynemneman sotan na balodaki jet kowan ton shorog shi bakdang to ey, 'Si amak, eshakil i toka pandagbo-in too et sobday shaka pankena. Nganto emoy naka ka-eg-ekangid jay!

¹⁸ Agpos et ngo ey on-oli-ak shi kadnan nen amak et nak manpasinsiya son si-kato. Ikowan ko ey nanbasolak son Apo Shiyos tan son si-kato.

19 Ikowan ko ey ekak maykeshin anak to; no diket angken ibilang towak ka sakey ya baga-en to.' Kowan tod nemnem to.

20 Jet siya, dima-jat et on-akad ma ja on-oli son ameto. Nem idi nonta arawí pay laeng nodta baley sha, inimatonan nen ameton shagos et naysemekan. Kinano-an ton to inaspol et to inakdop et inongo-an to pay.

21 Kowan nonta anak to ey, 'Tatang, nanba-solak son Apo Shiyos tan son si-kam. Ekak ma maykeshin anak mowak.'

22 Nem say inpasing nonta ameto, kowan to so nonta baga-en to ey, 'Kano-iyo, alejo di sota kamaptengan na baro et paibeshoyo! Singsingi jo pay, tan sapatosi jo!

23 Daw kayo, jo di shonshon sota kilaw wa baken inpatebayo et paltiyo! Piyasta-en tayoy inmotok ni anak ko!

24 Sajay ya anak ko, kowan ko nem etey, nem iyay gayam ma sibibiyag. Istay ya nan-atiw, nem iyay ya nay-oli di!' Kowan nen ameto. Jet nayshogi may piyasta.

25 "Nontan na oras, wára sota pangodowan shi payew. Jet idi imesop med baley sha ni in-akad to, inteneng toy mosiko tan toon emandaladsak nodta naydaem ni baley.

26 Jet tinewal to sota sakey ya baga-en sha, ja kowan to ey, 'Nganto ayay emankepasemak shi naydaem?'

27 Kowan nonta baga-en ey, 'Mimotok ali sota agim! Jet si tatang jo, inpalti-an to ni mateben baken kilaw, tep imoli alin sibibiyag.'

28 Nem epaladoy bonget nonta pangodowan jet

en-asneng nga onsekep. Sota amesha, bimo-day ali ja to inadok sota pangodowan ja onsekep ngon mekiladsak.

²⁹ Nem sinongbatan to et si ameto, ja kowan to ey, 'On-im kari mango! Pigen tawen na nan-ob-obda-ak ja singa baga-en mo! Enshi pay i taka sinopngilan! Jet ngarantoy in-akan mo son si-kak? Angken komen kekanshing, say wára koma ngoy pandadadsakan mi ni kagajem ko, nem enshi met!

³⁰ Nem satan na potot mo, inomas toy kameng mo shi dinedokon aramid, asan may-oli di, jet niman, inpalti-an mo mango ni mateben kilaw!'

³¹ Jet kowan nonta amesha ey, 'Anak ko, wára ka son si-kak ni olay shiya baley jet emin na wára son si-kak, singa kowinta ey kokowam.

³² Mesepol la dag-en tayo iyay; pandadsak ka et, tep si agim, kowan ko nem etey, nem wára gayam ja sibibiyag. Istay nan-atiw, nem imoli di.' "

16

Inkowan nen Jesus i pesing nga mengasto ni pilak shi mapteng nga banag

¹ Wara pay i inkowan nen Jesus, ja kowan to so nonta ira too to ey, "Waray toon baknang; engala ni sakey ya mengimanshal ni obda to, nem idi sakey ya akew, shinemag ton toka pangawngawa sota kokowa nonta baknang.

² Inpa-odop to sota toon emengimanshal et inbag-an to, ja kowan to ey, 'Iyay i shamag ko pangkep son si-kam. I-odim alin emin sota

inpiyal ko son si-kam; a-kalen taka med jay tep eg ka mepiyal.' Kowan nonta baknang.

³ Idi intenengan nonta toon emengimanshal, bimo-day et kowan to so ni bakdang to ey, 'Shanshanin a-kalen towak nonta apok shiya obdak. Ngaranto emoy pesing ko nem bilang ey ma-kalak, ta ekak met onposin man-obda shi bo-day, tan embaingak ja mankekekshaw?

⁴ Ay, wára gayam i ninemnem kon pesing ko! No metongpal, eshaket ira sota kagajem ko et no ma-kalak shiya obdak, odopen sha-ak shi baley sha.'

⁵ Say inpasing to, inpa-odop to ira sota toon wáray otang sha so nen apo to et kowan to so nonta pilmiro ey, 'Pigay otang mo son apok?'

⁶ Kowan to ey, 'Say otang ko son apom, sandasos sa dineten daneb.' Kowan nonta emengimanshal ey, 'Iyay i disibom. Nem tongaw ken shagos et sa-datim ni dimen polo sota sandasos ja otang mo.'

⁷ Kowan to so nonta maykadwá ey, 'Si-kam ngay, pigay otang mo?' Kowan to ngo ey, 'Sandasos ja kaban na bekas.' Kowan nonta emengimanshal ey, 'Iyay i disibom et sa-datim ni wálon polon kaban.'

⁸ Sota emengimanshal la ma-owap, in-etek nonta apo to ni katekal to.

"Sajay iren tood dobong ja eg emati son Apo Shiyos, edaing iren mengemag ni pamosposan nem say sota ira emati.

⁹ Osal joy wáren kokowayo ja ontolong ira niya toon maligdigat niman na timpo et no ma-bosan

kayo, si Apo Shiyos i onsobadit son si-kayo shi dangit.

¹⁰ Sota toon emepiyal shi ootik ka banag, mepiyal ngo shi ebadeg ga banag. Sota man-olbod shi ootik ka banag, ekarkaron man-olbod ngo shi ebadeg ga banag.

¹¹ No eg kayo mepiyal la mengosal ni kokowa shiya dobong, eg ngo ipiyal nen Apo Shiyos son si-kayo i podnon kokowa to ja eg mepokaw.

¹² No eg jo amten mengisingpet ni kokowa ni eshom ja naypiyal son si-kayo, eg jo nam-nama-en ey wáray ewáten jon sobadit jod dangit ja medepo son Apo Shiyos.

¹³ “Say too, eg mebedin na showay pansilbi-an to. No ensemek to sota sakey, okesen to sota maykadwá; no ishayaw to sota sakey, bedawen to sota maykadwá. Isonga eg kayo mebedin na mansilbi son Apo Shiyos no pilak i wá-wá-sha son si-kayo.” Kowan nen Jesus.

¹⁴ Sota Parisiyo, epateg i pilak son si-kara; isonga idi intenengan sha iyay ya inkowan nen Jesus, inbi-wisan sha.

¹⁵ Inkowan nen Jesus son si-kara ey, “Si-kayoy emengikokowan ey mapteng kayo et say i-etek shakayo ni totoo. Nem si Apo Shiyos, amta toy wáred nemnem jo, jet sota toon mengiredjaw ni bakdang to shorog, en-oges nen Apo Shiyos ja ishemshemang.

¹⁶ “Sota bilin na insolat nen Moises, tan sota insolat ni para padto nonta bayag da, makedsang ingkato nonta timpo nen Juan ja para bonjag, jet niman men kawashak, say emaytosho, sota

maypangkep ni pantoshayan nen Apo Shiyos, jet eshaket i masi-met ta on-awat so.

¹⁷ Nem enshiy mepokaw wa bilin nen Moises. No wára pay laeng iya dangit tan dobong, eg mepokaw i angken sakey ya naysolat ta bilin nonta bayag da.

¹⁸ “Say sakey ya bilin nen Moises ja eg mebedin na mebediwan, kowan to ey say dakin mengisi-jan ni asewa to, ja meki-esawa mowan, bimasol ja inges to sota emii. Inges to ngo met laeng, no sipa ngoy mengesawa nonta biin insi-jan sha, bimasol ja inges to sota emii.

¹⁹ “Waray toon baknang; ebanol i baro to, tan en-amis i sira to ni inakew.

²⁰ Wara ngoy toon ebiteg ja ebayabayang i bakdang to ja nanngaran ni Lazaro. Emantetongaw ni olay iya ebiteg nodta sakepan nonta baknang, ja mengshaw.

²¹ Piyen to komen angken sota mogay mango koma ja ma-kas shi damisaan nonta baknang, si-katoy kenen to. Jet sota ira aso, shaka jepojepoti sota bayang to.

²² Enshiy ebayag, etey iya ebiteg et indaw ira nonta anghil shi dangit ja kawad-an nen Abraham. Etey ngo iyay ya baknang et inbekara.

²³ Dimaw shima kalikatan ja kowan sha ey Hadis. Idi ontangkak, inon-an tos Abraham shi arawin dogad, jet wára ngo si Lazaro.

²⁴ Jet kimeljaw, ja kowan to ey, ‘Ama Abraham! Kaasi-imak, ibetkag mo di si Lazaro. I-eneng to diy angken sakey ya kalomot tod shanom, ta emag-anan i shilak ka pasiya! Naka mandikat ta pasiya shiya apoy!’

²⁵ Nem kowan nen Abraham ey, 'Anak ko, nemnem mo kari iyay. Nonta wára ked biyag, wára son si-kam ma emin nontan i mesepol mo et kinenkenas mo. Nem si Lazaro nontan, enshin polos i mebedin to, jet kakaasin pasiya. Nem niman ngo, iyay shiya mapteng nga dogad ja emannam-ay, jet si-kam ngoy emandikat.

²⁶ Tan sakey pay, iyay i naydeshek tan embanaw wa ejaokan; isonga eg mebedin na onbaliw kayo did jay, tan angken si-kami ngo, eg mebedin na ondaw kamid tan.' Kowan nen Abraham.

²⁷ Jet kowan nonta baknang ey, 'Ama Abraham, kekshawen ko ngarod son si-kam ey ibetkag mo ga si Lazaro shi baley nen amak.

²⁸ Ta wáray agik ka dima et to ira banshaanan, say eg sha ngo peshasan iya digat shiya kawad-an ko niman.'

²⁹ Nem kowan nen Abraham ey, 'Sota a-akim, wára sota bilin nen Moises ja emankaitoro son si-kara, tan wára ira sota esel ni para padto. Sotan i onbanshaan son si-kara.'

³⁰ Kowan mowan nonta baknang ey, 'Eg on-anay, Ama Abraham! Nem no wáray manpewil la etey et ondaw son si-kara, mepnek ma ira ja manbebawi.'

³¹ Nem kowan mowan nen Abraham ey, 'No eg sha pati-en sota bilin nen Moises, tan sota ira esel ni para padto, angken wáray manpewil la etey, eg sha met laeng pati-en.' "

17

Basol i pengewis ni eshom ja manbesol

¹ Kowan nen Jesus so nonta too to ey, “Waren kenshat i onsabin panbesolan ni too, nem kakaasi sota toon mengi-kan ni panbesolan ni kait to.

² Say pansigshan nontan na too ket, ma-ono-an koma ni ebadeg ga bato et en mayteb-ok shima baybay. Pansigshan to ta engka-jas sotan na keshosa to nem say sota penosa nen Apo Shiyos son si-kato ja pengikesho to nontan na basol to, no istay engi-kan koma ni nanbasolan ira niya nankebaben emati son si-kak.

³ Isonga tanshaaniyon shorog i bakdang jo.

Mesepol la pekawanan ira sota nanbasol son si-katejo

“No sota kait mo ket, nanbasol son si-kam, bilin mo jet no itenengan toka ja manbebawi, pasinsiya-im.

⁴ Ket no manbesol son si-kam ni meminpito ni san-akew et sinshon manbesol son si-kam, ondaw alin en manpasinsiya ni meminpito, ja kowan to ey manbebawi ni ngaaw wa dingka to, mesepol la pasinsiya-an mo.” Kowan nen Jesus.

Epateg i pamati son Apo Shiyos

⁵ Idi sakey ya akew, kowan nonta ira apostol to ey, “Paba-deg moy pamati mi.”

⁶ Simongbat si Apo Jesus ja kowan to ey, “No say kaba-deg ni pamatiyo ket may-eshig shi botil la ootilek, mebedin na ibetkag jo sota ebadeg ga kiyew ey, ‘Kagabot ka et kaymola ken shorog shima baybay!’, jet may-agpayso ja pati-en toy kowan jo.

Sota mapteng nga nemnem nonta emansilbi so nen Apo

⁷ “Kaspangarigan ey wáray baga-en ja in-pangesharo ni apo to, ono inpanbantay to ni kalniro, ja imakad alin edapod obda to, aliwén ogadi tayo ey si-katoy mepangdon mengán nem say apo to.

⁸ Nem say ikowan jo son si-kato, ‘Ikamakami-mak ni kenen ko tan inomen ko asan ka ngo mangan.’

⁹ Jet sota baga-en, eg mesepol la pan-iyamanan mo i obden kinsheng to, ta si-katoy obda to.

¹⁰ Inges to ngo son si-kayo. No kinsheng jon emin i kowan nen Apo Shiyos ey dag-en jo, eg jo koma nemnemen ey wáray otang nen Apo Shiyos son si-kayo, no diket say ikowan jo koma, ‘Baga-en mokami bengat, Apo Shiyos. Saja dingka mi bengat, sota inkowan mo, enshiy eshom.’ ”

Inpamapteng nen Jesus sota ira sampolon ebayabayang

¹¹ Idi emandaw si Jesus shi Jerusalem, nanshalan shi nankinaw-an ni Samaria tan Galilia.

¹² Nodtan na minotok ton dogad, wáray sampolon too ja ebayabayang i bakdang sha. Sha inaspol si Jesus, nem naybetaw ira.

¹³ Isonga kimeljaw ira ja kowan sha ey, “Jesus! Apo! Kaasi jokami!”

¹⁴ Inon-an nen Jesus ira et kowan to ey, “Daw kayo, jo pa-sas i bakdang jo so nonta pari.”

Jet nonta wára pay laeng ired shalan ja ireka emandaw shi kad-an ni pari, na-omas ma sota bayang sha.

15 Jet sota sakey son si-kara, idi inon-an ton mimapteng ma, nay-oli din epaladoy dadsak to son Apo Shiyos.

16 Dimaw ja en nantalimokod shi sango-an nen Jesus ni iyaman to. Sajay ya too ket, i-Samaria.

17 Si Jesus, kowan to ey, “Aliwá ayen sampolo kayon mimapteng? Towa da ira sota siyam?”

18 Apay eg mebedin ngo aya ja on-oli ira di ja en man-iyaman son Apo Shiyos? Saja aliwá et ngo mowan na kait tayon Hodiyo, si-kato bengat i nay-oli di.”

19 Jet say kowan nen Jesus son si-kato, “Dayat ka et angken ondaw ka. Sota pamatim, si-katoy minaptengan mo.”

Sota itsora ni imotok mowan ali nen Jesucristo

20 Sota ira Parisiyo, inbag-an shes Jesus nem pigan aliy panshoki ni pantoshayan nen Apo Shiyos. Nem say insongbat nen Jesus son si-kara, kowan to ey, “Aliwén en ondaw alin wáray amta-an jo so.

21 Enshiy en mengikowan ey ‘Asas mo! Iyay shiyay i pantoshayan nen Apo Shiyos!’ Tan enshiy en mengikowan ey ‘Imed man!’ Ta wára son si-kayo niman.”

22 Kowan nen Jesus so nonta ira too to ey, “Waray timpon onsabi ali ja pandikat jo, jet piyan jon asen i angken san-akew wa pantoshay ko di. Nem eg mebedin.

23 Wara iray toon mengikowan son si-kayo ey, ‘Wares Cristo! Jo on-id man!’ Ono ikowan sha ey, ‘Iyed jay!’ Nem karejo patpati-en.

²⁴ Ta say itsora ni idaw ali mowan nonta kowan ni para padto ey Anak ni Too, ja mantoshay, inges toy bagidat ja silwán ton shagos i emin na naykayang.

²⁵ Nem say pilmiro, mesepol la mandikatak nin ja pasiya, ta sota toon sina-kop kod ja dobong niman, eg sha-ak pati-en; ikowan sha et ey enshiy kenkenshat ko.

²⁶ “Say arig ni timpon idaw mowan ali nonta naypadton Anak ni Too, inges toy timpo nen Noe. Ta sota aramid ni totoo nontan den timpo to, inges to met laeng i aramid ali ni totoo ni idaw ko mowan ali, jet inges to mowan i idibag ni totoo.

²⁷ Ta nonta aneng pay laeng sota dayos, enshiy shaka panshanagi ni inakew: ireka mengan, ireka menginom, ireka man-a-asawa — ingkato nonta simabi sota timpon simekep si Noe nodta barko to. Jet idi simabi ma sota dayos, etey iren emin.

²⁸ Arig to pay sota totoo Sodoma nonta timpo nen Lot. Esiwat ira nontan da ni pangan sha tan inom sha; esiwat ira ni tongkal sha tan dako sha; esiwat ira ni mola tan amag ni baley.

²⁹ Nem nontan na akew ja indekjas nen Lot i Sodoma, imoran alid naykayang ni apoy tan asopri jet binono ton emin ira sota totoo man.

³⁰ Inges niyay met laeng aliy imotok nonta Anak ni Too ja palibdibag.

³¹ “No onsabi sotan alin akew, sota toon naytompong nga man-adibay shi bo-dayan, eg to koma nemnemen sota kokowa ton wáred naydaem ni baley; eg koma onsekep ja en mengeda ni kompormin wára nodta naydaem

ni baley to. Kasta met sota wáred payew, eg to koma nemnemen ja on-oli nin shi baley to.

³² Nemnem jo kari sota epasemak so nonta asewa nen Lot nonta wíningi to bengat sota ili ton Sodoma ja shaka pan-idekjas.

³³ Sota toon entapi toy biyag to ja kowan to ey ensikshal la metey, si-kato et ngo mowan i mepokaw i biyag to. Nem sota toon itolok toy bakdang ton metey, odi-en to met laeng sotan na biyag to ingkatod ingka.

³⁴ “Ikowan ko iyay son si-kayo. No sotan alin akew, odopen koy eshom ma too, nem sota eshom, bay-an ko. Jet no kaspangarigan ey kalebi-an, ket sota showen too i naytompong nga nan-arol shi sakey ya katiri, sota sakey, may-odop son si-kak, nem sota sakey, mebay-an.

³⁵ Angken ngon sota showen biin maytompong nga emengiding, sota sakey, may-odop son si-kak, nem sota sakey, mebay-an.

³⁶ Sota showa ngon daki ja maytompong nga wáred payew, sota sakey, may-odop son si-kak, nem sota sakey, mebay-an.”

³⁷ Sota ira too to, inbaga sha ey, “Towen dogad Apo?”

Jet simongbat si Jesus ja kowan to ey, “No toway kad-an ni bangkay ni etey, si-kato ngoy kesa-nopan ira ni kawang.”

18

In-arig nen Jesus sota kowis ja enshiy kaasi to

¹ Si Jesus, waray inkowan ton arig son si-kara say eg ira medismayen manshewat son Apo

Shiyos, no diket manshewát ira son si-kato ni olay. Iyay sotan na arig:

² “Wara konoy kowis shi sakey ya ili ja endedamsis tos Apo Shiyos, tan kasta met sota kaikowan ni kait ton too.

³ Jet wára ngoy ebalon bii nodtan na ili, ja kanayon na kaondaw son si-kato ja mengshaw ni kaasi, ja kowan to ey, ‘Apo, ibediwimak ka ta iman i kowan to ey memidiw ni kokowak.’

⁴ Nem ebayag malen timpo, eg sinintil niyay ya kowis i shawat nonta biin ebaló. Nem idi emasig sota bii ni shawat to ni tolong, kowan nonta kowis shorog so ni bakdang to ey, ‘Angken bilang ey endedamsis kos Apo Shiyos tan totoo,

⁵ ibaliwán kos iyay say ibi-jag ton ondaw ali ni olay, say eg towak ma notengen.’ ”

⁶ Jet si Apo Jesus, intoloy to ey, “Nemnem jo iyay ya inpasing niyay ya kowis. Enshiy kaasi to, nem ibaliwán to ja biin emasig ni shawat to ni kaasi.

⁷ Jet si Apo Shiyos, mas pay todongan toy too ton memasig ja mengshaw son si-kato ni inakew tan dinadabi. Say kowan jo emo, eg to itenengan shagos aya i shawat jo?

⁸ Say kowan ko son si-kayo, si Apo Shiyos, aliston mengibediw so ni too to; isonga eg kayo koma medisismaya. Enshiy showashowa may-pangkep son Apo Shiyos, nem si-kayo mangon too, piga emoy memati pay laeng son si-kak ingkatod i-olik mowan ali?”

In-arig nen Jesus sota showen nanshawát son Apo Shiyos

⁹ In-arigan nen Jesus ira sota toon kowan sha ey si-kara i sigoradon mapteng mangoy aramid sha, jet kowan sha ey sota eshom, ayshi konoy kenkenshat sha. Jet kowan nen Jesus ey,

¹⁰ “Waray showen too ja nan-inshas ja dimaw shi Timplo ja manshewat son Apo Shiyos. Sota sakey, Parisiyo; sota sakey, para singil ni bowis.

¹¹ Dimayat sota Parisiyo jet kowan to shorog shi bakdang to ni shawat to ey, ‘Salamat Apo Shiyos, tep aliwen inges ko iya para singil ni bowis ja enshiy kenkenshat to. Salamat tep aliwen mapidiwak, aliwen malokdoko-ak, aliwen mabii-ak, ja inges toy aramid ni eshom.

¹² Naka ngidinay meminshowa ni makadom-ingko ja naka ibiyang i pangan, tan emin na naka epita, naka idaton pay i ikasampolo son si-kam.’ Kowan nonta Parisiyo ni shawat to.

¹³ Nem sota para singil ni bowis, dimayat shi naybetaw, ja embaing pay ya ontangkak shi dangit. Toka pay panpagpaga i pagew to ni toka panbebawi, jet kowan to ni shawat to ey, ‘Apo Shiyos, kaasi-imak ta eshakil i basol ko.’ ”

¹⁴ Jet intoloy nen Jesus ey, “Ikowan ko son si-kayo, sajay ya para singil ni bowis, si-katoy kinosto-an nen Apo Shiyos asan ka-akad shi baley to; nem sota Parisiyo, eg to kinosto-an. Sota toon mengingeto ni bakdang to shorog, si-kato et ngo mowan i maybeba; jet sota toon toka ibaba shorog i bakdang to, si-katoy mayshedjaw.” Kowan nen Jesus.

Inpalobos nen Jesus ja ondaw ira di sota a-anak son si-kato

15 Sota eshom iren too, indaw shay angken nga-nga son Jesus, ta kowan sha ey say pishaten ton bindisiyonan ira. Nem idi inon-an ira nonta too nen Jesus iyay, inseg-ang sha ira sota engidaw ali nonta a-anak.

16 Nem si Jesus, tina-wal to sota ira a-anak ja ondaw ali son si-kato jet kowan to so nonta ira too to ey, “Baybay-iyo ira di sota a-anak ja ondaw ali son si-kak; eg jo iparit. Tep inges iren jay ya a-anak bengat ja ekombaba i mayda-kam shi pantoshayan nen Apo Shiyos.

17 Podno iya ikowan ko son si-kayo. No eg kayo mengewat ni pantoshayan nen Apo Shiyos ja inges toy kepengewat ni a-anak, eg kayo mayda-kam ja onsekep shi pantoshayan nen Apo Shiyos.” Kowan nen Jesus.

Si Jesus tan sota baknang

18 Waray pangolo ni Hodiyo; inbag-an tos Jesus ja kowan to ey, “Maistoro, mapteng ken too. Ikowan mo ga no ngarantoy dag-en ko say mewad-anak ni biyag ja enshiy to engintegan.”

19 Simongbat si Jesus ja kowan to ey, “Ngantoy mosoka ikowani so ey maptengak? Abos nen Apo Shiyos ja mapteng.

20 Nem no maypangkep nonta biyag ja enshiy to engintegan ja inkowan mo, amtam sota ira bilin nen Apo Shiyos: ‘kareka memii ono mek-ileki, kareka memono, kareka mengibot, aliwen mo ba-ngaten ja man-a-sel ni aliwen kosto; tan shayaw mos inam tan si amam.’ ”

²¹ Kowan nonta too ey, “Nontan pay laeng nga-nga-ak ingkato niman, inonod kon emin itan na bilin nen Apo Shiyos.”

²² Idi intenengan nen Jesus iyay, kowan to ey, “Wara pay laeng i sakey ya kolang mo. Ilekong ira sota kokowam et sota dako to, iweshis mo so nonta ira nankebiteg. No sajay i pesing mo, say kawad-an ni kabaknang mo ma, naytalo shi dangit. Jet no meksheng nga sotan i pesing mo, kay-eshom ka di so ira niya took!”

²³ Nem idi intenengan nonta too iyay ya inkowan nen Jesus, ensakit ta pasiya i nemnem to, tep toka tepi-a i kabaknang ton pasiya.

²⁴ Inningning nen Jesus iyay ya too et kowan to ey, “Edigat ja onsekep i baknang shi pantoshayan nen Apo Shiyos!”

²⁵ Sota animal ja kowan sha ey camel, no kas-anoy kalikat to ja on-osok shi ebong ni shakom, mas edigidigat pay ya onsekep i babaknang shi pantoshayan nen Apo Shiyos!”

²⁶ Sota totoon engitneng niyay ya kowan nen Jesus, kowan sha ey, “No kasta, enshi ngarod i maysedakan?”

²⁷ Nem simongbat si Jesus ja kowan to ey, “Agpayson eg kabaalan ni toon mengisedakan ni bakdang to shorong, nem sota eg mebedinan ni toon dag-en, mebedin na dag-en nen Apo Shiyos.”

²⁸ Kowan nen Pedro ey, “Karam ngo dibdibkan ey si-kami, indekjas min emin i kokowa mi nonta nanbalinan min toom.”

²⁹ Jet si Jesus, kowan to son si-kara ey, “Podno iya ikowan ko son si-kayo. No sipay engilekjas

ni baley to, asewa to, a-aki to, annak to, ono sota maka-anak son si-kato, maypangkep ni pantoshayan nen Apo Shiyos,

³⁰ ebadbadeg ga pasiyay ewaten to niman na kawasha tod ja dobong, tan no man-onod alin akew, kon-oren to pay i biyag ja enshiy to engintegan.”

Dinem-at mowan nen Jesus i mepesamak ali son si-kato

³¹ Inpata-nil nen Jesus ira sota sampolo tan showa ja apostol to et a-abos sha ma. Jet kowan to son si-kara ey, “Itnengi jo iya ikowan ko son si-kayo. Ondaw kito shi Jerusalem et emin sota insolat ira nonta para padto nen Apo Shiyos nonta bayag da maypangkep nonta kowan sha ey Anak ni Too, metongpal son si-kak.

³² Tep may-ewatak so nonta ira aliwen kait tayon Hodiyos. Sengsengkiten sha-ak, bebaingan sha-ak, toptopsha-an sha-ak.

³³ Sepsepaten sha-ak pay, asan sha-ak bono-a. Nem no maykatdon akew, manbiyagak mowan.”

³⁴ Nem sota ira too to, eg sha inewatan iyay, ta nay-emot i olog nontan na inkowan nen Jesus son si-kara. Eg sha amta nem ngantoy olog nonta inkowan nen Jesus.

Inpan-asas nen Jesus sota toon ekorab ja i-Jiriko

³⁵ Idi nay-esop ma si Jesus shi Jiriko, wara ngoy toon ekorab ja timongaw nodta naykilig ni kalsara, ja emankekkekshaw.

³⁶ Idi intenengan ton wáray eshakil la toon eman-ekad shi kalsara, inbaga to, ja kowan to ey, “Ngaran ira niyay?”

³⁷ Kowan sha son si-kato ey, “Si Jesus ja i-Nasarit, ondabas alid jay.”

³⁸ Idi intenengan to iyay, kimeljaw ja kowan to ey, “Jesus! Kaasimak, si-kam ma mengibengon son Ari David nonta bayag da!”

³⁹ Sota toon epangdo ey si Jesus, inseg-ang sha sota ekorab, ja kowan sha son si-kato ey on-eket. Nem mina-ma to et ja inkedsang toy keljaw to, ja kowan to mowan ey, “Kaasi-imak, si-kam ma mengibengon son Ari David nonta bayag da!”

⁴⁰ Kimi-neng si Jesus et kowan to ey, “Shawat jo did jay.” Jet idi nay-esop ma sota ekorab, inbag-an to,

⁴¹ “Ngarantoy piyan mon itolong ko son si-kam?”

Kowan nonta ekorab ey, “Apo, pan-asas mowak, say man-esasak mowan.”

⁴² Kowan nen Jesus son si-kato ey, “Mebedin na man-esas ka ma. Sota pamatim son si-kak, si-katoy kabol la pan-esasan mo.”

⁴³ Jet nontan, nan-asas shagos, jet nay-eshom ma son Jesus. Jet idi inon-an ira nonta eshakil la totoo, inshayaw sha ngos Apo Shiyos.

19

Binisita nen Jesus si Sakio ja para singil ni bowis

¹ Nanshalan shi Jesus shi Jiriko.

² Waray baknang nodtan na siyodad ja apo ira nonta para singil ni bowis; say ngaran to, si Sakio.

³ Piyan ton asen nem sipa si Jesus, nem sina-dinan ira nonta eshakil la totoo, ta si Sakio, entikey ya too.

⁴ Isonga say inpasing to, nanbetik ja epangdo nodta shalan ey say sota ira totoo, jet kimalab shi kiyew wa kowan sha ey sycamore, say asen tos Jesus nem manshedan ali nodtan.

⁵ Idi pintek nen Jesus sota kadnan nen Sakio, tinangkak to jet kowan to ey, "Sakio, kano-im, japas ka di! Ta mesepol la ondawak shi baley mo, taka bisita-en niman."

⁶ Kinano-an nen Sakio ja jimapas et eman-imdeng nga engolop son Jesus shi baley to.

⁷ Nem emin ira sota toon engasas son Jesus ni indaw tod baley nen Sakio, ireka onwanadegweg ja kowan sha ey, "Ngantoy dawán tod man aya? Dimaw wa en memisita nima toon enshiy kenkenshat to!"

⁸ Nem say kowan nen Sakio son Jesus, kowan to ey, "Apo, ninemnem koy pesing ko niman! I-akan koy kagashowa ni kokowak shi nankebiteg, tan no sipa ira sota inda-karan ko ni singil ni bowis, bayshan ko ira ni memin-epat."

⁹ Kowan nen Jesus so nen Sakio ey, "Say kaysedakan, simabi niman shiyay ya pamilja, ta saja inpasing mo, si-katoy ka-asan to ey si-kam ket agpayson anak shaka nen Abraham.

¹⁰ Si-kak sota kowan ni para padto nonta bayag da ey Anak ni Too, jet say kabol la inbetkagan

towak so nen Apo Shiyos, say mengewísak nonta ira toon emantoshong shi keshosa-an sha say maysedakan ngo ira.”

In-arig nan Jesus sota baknang ja inwáris toy pilak to so nonta ira baga-en to

¹¹ Nonta wáres Jesus shi Jiriko ja nay-esop shi Jerusalem, kowan ira nonta karakdan na totoon emengitneng son si-kato ey no onmotok si Jesus shi Jerusalem, mayshoki ma sota pantoshayan nen Apo Shiyos.

Nem say kowan to son si-kara, eg nin metongpal sota namnama sha. In-arigan to ira, ja kowan to ey,

¹² “Waray baknang; ninemnem to ey ondaw shi arawín ili, ja shiman i ewatan to so ni kina-ari to, asan ka-oli din on-akad, ja si-kato may mantoshay.

¹³ Idi shanshanin ondaw, inpa-odop to ira sota sampolon baga-en to ja pinispis to, jet inwárisan to ira ni sandedasos sa pilak ja ibiyakira ingkatod on-oli ali.

¹⁴ Nem sota ira totoo nodtan na dogad ja edapo-an to, eg sha koston si-katoy mengitoshay koma son si-kara; isonga engibetkag ira ni en manriri nodta kowan to ey dawán to ja ewatan to so ni kina-ari to, ja kowan sha ey, ‘Eg mi koston si-katoy mengitoshay son si-kami.’

¹⁵ Nem inpan-ari sha met laeng. Nay-olin imakad jet idi mimotok, inpa-odop ton shagos sota baga-en ton inwárisan to ni pilak, say asen to nem pigay kinanansiya shen inbiyaki-an.

16 Sota pilmiro, dimaw alin nanparang et kowan to ey, 'Apo, sota sandasos sa inpiyal mo son si-kak, nanbalin ni sandibo.'

17 Kowan nonta ari ey, 'Siya, mapteng i dingkam; mapteng ken baga-en ko. Kaka mepiyal la mengimanshal ni otik ka banag, isonga niman, panbedin taken mengitoshay ni sampolon siyodad.'

18 Sota maykadwen baga-en to, dimaw ngo alin nanparang et kowan to ey, 'Apo, sota inpiyal mo son si-kak ka sandasos, nanbalin ni dimen dasos.'

19 Kowan nonta ari ey, 'Manbedin ka ngon mengitoshay ni dimen siyodad.'

20 Nem sota sakey, nanparang ngo ali, jet kowan to ey, 'Apo, iyay sota sandasos sa inpiyal mo son si-kak. Dinibotan ko ni panjo et insingpet kon intalok.

21 Entakotak son si-kam tep palado ken too. Moka pan-al-a pay i aliwen kokowam, tan angken sota aliwen molam, moka pan-epita.'

22 Kowan nonta ari ni songbat to ey, 'Si-kam, eg ka mepiyal la baga-en ko! Sota inkowan mo, si-katoy kaybetayan ni keshosam! Amtam gayam ey palado-ak ka too, amtam ey naka pan-epitay angken aliwen molak, amtam ey naka pan-al-ay aliwen kokowak.

23 Apay ngarod nga intalom i pilak ko? Angken koma, no inbebangkom, say niman alin inmotok ko, waray ewaten kon patang to!'

24 Jet kowan nonta ari so nonta ira too ton wara nodtan ey, 'Alejo ima pilak ka wara son si-kato et i-kan jo so nima baga-en kon sandiboy

insapolan to!’

²⁵ Nem kowan sha ey, ‘Apo, wára met i sandibon pilak son si-kato.’

²⁶ Kowan nonta ari ey, ‘Ikowan ko son si-kayo, sota ira wá-wá-sha-anan, may-aknan pay. Nem sota ootik-anan, angken sota oltimon wára son si-kato, ma-da pay.

²⁷ Jet niman, shosa-en ko ngo sota totoon simopngil son si-kak ja kowan sha ey eg sha koston si-kak i ari sha. Alejo did jay ira et bono jo ira! Asen koy kebonora.’ ”

²⁸ Sajay i arig ga inkowan nen Jesus son si-kara, asan ka-edaw shi Jerusalem, ja epangdo ey say si-kara.

Edadsakan i totoo nonta mimotok si Jesus shi Jerusalem

²⁹ Idi nay-esop ma shi Jesus shima dogad ja kowan sha ey Bitpag tan Bitania, ja osshong ni shontog ga kowan sha ey Olibas, engibetkag ni showen too ton mepangdo.

³⁰ Jet say inbilin to son si-kara, kowan to ey, “Daw kayod ma dogad ja naysongbob et no onmotok kayo, waray asen jon kilaw ni animal la donkey, ja nayspagod. Sajay ya kilaw, eg pay laeng ekabkabajo-an. Okasiyo et alejo did jay.

³¹ No waray mengibeka son si-kayo no ngantoy joka pan-okasi so, ikowan jo ey, ‘Si Apo Jesus, mesepol to.’ ”

³² Jet siya, dimaw ira sota shadwá et simbira sota donkey ja inkowan nen Jesus son si-kara.

³³ Idi shaka pan-okasi sota kilaw, kowan ira nonta makakokowa ey, “Ngantoy joka pan-okasi so nita kilaw?”

³⁴ Kowan sha ey, “Si Apo Jesus, mesepol to.”

³⁵ Jet indara sota kilaw et indaw sha son Jesus. Jet sota ta-kep ni baro sha, in-ap-ap sha nodta beneg ni kilaw et inatngan shes Jesus sa mankebayo.

³⁶ Dima-jat si Jesus et sota ira totoo, in-ap-ap sha ngoy baro sha nodta kalsaren panshalnan ali nen Jesus.

³⁷ Idi nay-esop ma si Jesus shi Jerusalem, nodta kalsaren onshalong shi shontog ga kowan sha ey Olibas, sota ira eshakil la too to, ireka man-imdeng nga pasiya, jet nan-iyaman ira son Apo Shiyos maypangkep nonta kaskashaaw wa milagron dingdingka nen Jesus ja inon-an sha. Inkedsang shay keljaw sha,

³⁸ ja kowan sha ey, “Bindisiyonan koma nen Apo Shiyos iya arin inbetkag to di. Si-katoy en ali mengi-kan ni talna ja edapo son Apo Shiyos! Shayaw son Apo Shiyos ja Kangeto-an!”

³⁹ Nem sota ira eshom ma Parisiyo ja naydaok nodta eshakil la totoo, kowan sha son Jesus ey, “Maistoro, selkag mo ira ta toom! Angsan i shayaw sha!”

⁴⁰ Simongbat si Jesus ja kowan to ey, “Mesepol la waray manshedjaw niman. No on-eket ira ja too, maysa-dat i baton onkeljaw ja manshedjaw!”

⁴¹ Nay-esop ma shi Jerusalem si Jesus jet idi osshongan to, innangis toy toka pengisekit so ni totood man, ja kowan to ey,

⁴² “Si-kayon tood Jerusalem, amtayo komay kasapolan jo say may-aknan kayo ni talna! Nem ayshi met, eg mebedin na amta-an jo!

⁴³ Wara aliy timpon pandikat jo. Sota ira kabakal jo, diktoben shakejo ni mebedjag jet enshiy delgotan jo.

⁴⁴ Sheshalen shen oltimoy siyodad jon Jerusalem, tan angken si-kayo ngon too ja wared jay. Angken sakey ya bato, eg sha bay-an na on-onong shi sigod ja nay-amagan to. Emin iyay, mepesamak son si-kayo tep eg jo indasin iya timpon kowan nen Apo Shiyos ja kaysedakan jo!”

Shinagshag nen Jesus ira sota emandeko nodta Timplo

⁴⁵ Idi mimotok ma si Jesus, simekep shi Timplo et shinagshag ton inpabo-day ira sota emandeko nodtan.

⁴⁶ Kowan to son si-kara ey, “Say kowan ni esel nen Apo Shiyos ja naysolat nonta bayag da, kowan to ey sajay ya baley nen Apo Shiyos, pankekshawan ni totoo son si-kato. Nem inpanbalin jo et ni singa amotan ni tolisan!”

⁴⁷ Si Jesus, nantoro ni inakew shi Timplo. Nem sota ira apo ni papashi, mamaistoro ni dinteg ni Hodiyo, tan sota eshom iren pangolo ni Hodiyo, piyan shen pasiya ja bono-en si Jesus.

⁴⁸ Nem enshiy shaka nemnemen pesing sha, tep eshakel i totoon na-awis, ja pipiyan shen mantetneng ni emin na ikowan nen Jesus.

20

Sinongbatan nen Jesus ira sota eg makakosto ni dingdingka tod Jerusalem

¹ Idi sakey ya akew, si Jesus, emantosho shi Timplo, tan emengikowan ni mapteng nga shamag ja toka itodtoro ni olay so nonta ira totoo. Jet nontan, sota apo ni papashi, mamaistoro ni dinteg ni Hodiynos, tan sota ira eshom ma pangolo ni Hodiynos, dimaw ngo ira di.

² Jet kowan sha son Jesus ey, “Sipay engikowan ey dag-en mo ira ta moka dagdag-a shiya Jerusalem? Sipay engibetkag son si-kam?”

³⁻⁴ Simongbat si Jesus ja kowan to ey, “Ibag-an takejo ngo nin. Ikowan jo son si-kak nem sipay engibetkag so nen Juan ja en memonjag nontan — nemnem to ngo shorog, ono si Apo Shiyos?”

⁵ Nem sota ira pangolo ni Hodiynos, nantatabtabal ira ja kowan sha ey, “No ikowan tayo ey si Apo Shiyos, mesampolo kito tep ikowan to ey, ‘No kasta, apay nga eg jo ngarod pinati si Juan?’

⁶ Nem no isongbat tayo ey nemnem ngo nen Juan, saja ira eshakel la too, batoy pemonora son si-katejo, ta shaka pati-a ey si Juan, podnon inbetkag ali nen Apo Shiyos.”

⁷ Jet say songbat sha so nen Jesus, kowan sha ey, “Tawey, eg mi amta no sipay engibetkag so nen Juan ja emonjag.”

⁸ Jet kowan ngo ma nen Jesus son si-kara ey, “Angken ngon si-kak, ekak ikowan son si-kayo no sipay engibetkag son si-kak ja mandeka niya naka dagdag-a niman.”

In-arig nen Jesus sota makedsel la inpangajowan ni makabo-day

⁹ Si Jesus, in-arigan to sota ira totoo, ja kowan to ey, “Waray toon nanmola ni obas shi embanaw wa gardin to. Inpa-ajowan to so ni eshom et dimaw ma shi arawin ili.

¹⁰ Idi simabi sota timpon pekibingay to nonta obas, engibetkag ni baga-en ton en mengeda nonta bingay to so nonta ira engajowan. Nem sota engajowan, sinepseptat sha sota baga-en na inbetkag nonta makakokowa, tan inpa-odiren enshiy sha in-akan.

¹¹ Sota makabo-day, engibetkag mowan ni eshom ma baga-en to, nem inges to met laeng nga sinepseptat nonta engajowan nonta gardin, tan binebaingan sha pay. Inpa-odiren enshiy sha in-akan.

¹² Engibetkag sota makabo-day ni baga-en to nonta maykepintedo, nem iso met laeng nga sinokat sha, asan shaka shagshaga.

¹³ Anongosto ma ey sota makabo-day, kowan to ey, ‘Ngarantoy pesing ko aya? Ensemek ko iya anak ko, nem ibetkag ko ga, tep mebedin emon ibaingan sha.’

¹⁴ Nem idi inon-an ira nonta engajowan sota mismon anak nonta makabo-day, nantatabtabal ira ja kowan sha ey, ‘Sajay sota anak nonta makakokowa niya gardin na tayoka pan-obda-i. Bono-en tayo et say saja bo-day ya tawid to koma, kokowa-en tayo ma.’

¹⁵ Inkoyod sha nga agpayso sota anak nonta makabo-day nontan et inbo-day sha nodta alad et binonora.” Kowan nen Jesus ni arig to.

Jet nontan ma, kowan nen Jesus ey, “Nganto emoy pesing nonta makakokowa nontan na bo-day so nonta ira toon inpangajowan to?”

¹⁶ Simpri ondaw ali et bono-en to ira jay ya too ngo, jet ipiyal to sota bo-day so ni eshom ma mengajowan so.”

Nem sota totoon in-arigan nen Jesus, idi in-tenengan sha iyay, kowan sha ey, “Enshi! Eg dag-en nen Apo Shiyos itan!”

¹⁷ Nem si Jesus, inningning to ira asan toka ibeka ey, “No kowan jo ey eg dag-en nen Apo Shiyos itan, ngarantoy joka pengi-odog ngarod nonta naysolat nonta bayag da, ja kowan to ey, ‘Sota baton binedaw ira nonta para amag ni baley, ja kowan sha ey enshiy silbi to, si-kato et ngo mowan gayam i epateg ga bato so ni emin?’

¹⁸ Jet angken sipen too ja maysokbab nodtan na bato, mekosot; tan no sipay tedteshan to, memisit.”

¹⁹ Edawag ey sota mamaistoro ni dinteg ni Hodiyo tan sota ira apo ni papashi, si-karay naytorongan nonta arig ga kowan nen Jesus. Isonga kowan sha ey seskelen sha si Jesus nontan na oras, nem entakot sha ira sota totoo.

Pineshas shen saolen si Jesus maypangkep nonta bayad ni bowis

²⁰ Piyan shen timpo-an na seskelen, isonga engibetkag ira ni toon meniim son si-kato ja kowan sha ey, “Daw kayo, ja singa podnoy jo ibaga son si-kato. Balang nem waray ikowan ton kabol la pengidawan tayo son gobinarol.”

²¹ Jet sota emeni-siim son Jesus, kowan sha ey, “Maistoro, amta mi ey podno sota moka ikokowan tan moka itoro. Amta mi pay ey enshiy moka pabori, angken ngantoy katoo to, tan say moka itoro ni olay, sota podnon piyan nen Apo Shiyos ja dag-en ni totoo.

²² Jet ikowan mo ga no maypeshit shi dinteg tayon Hodiyo i panbedjad tayo ni bowis so ni gobirnod Roma, ono enshi.”

²³ Nem si Jesus, amta to ey olbod sha iyay, isonga kowan to son si-kara ey,

²⁴ “Ipa-sasimak ni salepi. Sipay makadopa niya naymalked ja pilak? Tan sipay makangaran niya naysolat?”

Simongbat ira ja kowan sha ey, “Sota ari shi Roma.”

²⁵ Jet kowan ma nen Jesus son si-kara ey, “No kasta, sota pilak ja joka osala, edapod gobirno ni Roma, isonga mesepol met laeng nga pa-odiyo son si-kara. Sota kowan ni gobirno ey may-ekan son si-kara, mesepol la maytongpal, jet sota kowan ngo nen Apo Shiyos ey may-ekan son si-kato, mesepol ngon mepati.”

²⁶ Piyan shen waray pankamali-an tod sango-an ira nonta karakdan, nem enshi. Ireka messhaaw nonta songbat to, jet inbi-jag sha may bagabaga son si-kato.

Pineshas sha mowan si Jesus maypangkep nonta panbiyag mowan ira nonta nanketey

²⁷ Waray Hodiyo iren kowan sha ey Sadosiyo, ja say pamatira, kowan sha ey eg kono manbiyag

mowan i nanketey. Dimaw ngo ira di son Jesus jet sha inbag-an ja kowan sha ey,

²⁸ “Maistoro, say insolat nen Moises nonta bayag da ja dinteg tayon Hodiyo, kowan to ey no sota dakin engasewa ket metey ja enshiy potot to nodta asewa to, sota agi nontan na dakin etey, si-katoy mengelbat nonta istay asewa to say balang nem waray enaken sha. Jet sota anak sha, maybidang ey singa potot nonta etey den agi to.

²⁹ Iyay i piyan min ibaga. Nontan da kono, waray piton san-a-aki, jet sota pangodowan, engasewa; nem etey ya enshiy to inpotot.

³⁰ Jet sota maykadwen agi to, inelbat to sota asewa nonta agi ton etey, nem etey mowan sota daki.

³¹ Kasta met sota maykatdon dakin agi sha, si-kato ngoy engelbat mowan, nem iso met laeng nga etey mowan ja enshiy to inpotot nodta bii. Jet emin ira jay ya piton san-a-aki ja nansasa-dat ja engasewa nontan na bii, etey ira ja enshiy sha inpotot.

³² Jet shi ka-onoran, etey kono ngo sota bii.

³³ Sajay i piyan min ibaga son si-kam, ta no bilang ey onsabi ali sota timpon pan-ongal ira ni nanketey, sipa emoy koston maka-asewa ali so nontan na bii? Ta nan-i-inelbat met ira sota piton san-a-aki ja engasewa son si-kato.”

³⁴ Simongbat si Jesus ja kowan to ey, “Sota daleki tan bibii shiya dobong, ireka emengesawa.

³⁵ Nem sota totoon ikari nen Apo Shiyos ja pan-ongal to, ja man-iyen ali shi dangit, eg ira mengesawa nontan alin timpo.

³⁶ Eg ira ma metey shiman, tep inges shay

anghil nen Apo Shiyos. Annak ira nen Apo Shiyos tep nan-ongal ira.

³⁷ Nem sigosho eg jo pati-en ey manbiyag mowan i nanketey. Angken si Moises nonta bayag da, toka penekneki ey say toon etey, manbiyag mowan. Nonta bayag da, insolat toy mismon intenengan to ja esel nen Apo Shiyos ja edapo nodta emanshedang nga kadasan, ja kowan to ey, ‘Si-kak si Apo Shiyos ja Shiyos shi Abraham, Isaac, tan si Jacob.’

³⁸ Piyan ton a-selen ngarod ey angken etey mangon ebayag i bakdang shi Abraham, kowan nen Apo Shiyos ey mabiday ired sango-an to. Ta no enshi koma, istay eg to inkowan ey si-katoy Shiyos sha. Emin na too — angken sota ira nanketey — kaibilang nen Apo Shiyos ey wára pay laeng ired biyag.”

³⁹ Sota eshom ma maistoro ni dinteg ni Hodiyo, kowan sha ma ni abos ey, “Mapteng itan na insongbat mo, Maistoro.”

⁴⁰ Jet polos malen eg sha intoled ja nansalodsod mowan son si-kato.

⁴¹ Kowan nen Jesus son si-kara ey, “Apay ngarod nga kowan sha ey sota inkari nen Apo Shiyos ey ibetkag to din mengisedakan ket medepo bengat shi poli nen Ari David nonta bayag da?

⁴² Ta angken si Ari David shorog, inkowan tod dibsho ni Salmo ey,

‘Si Apo Shiyos, inkowan to so nonta pangolok ey ontongaw si-kato shi apit ni kanawan to,

⁴³ ingkatod enshiy mebedin nonta kabakal to, ja wára ma ired shalokap ni shapan to.'

⁴⁴ Jet no kowan nen Ari David ey pangolo to sota mengisedakan, toway inpasing to ja kowan sha ey poli ali nen Ari David?"

⁴⁵ Idi maramen emantetneng ira sota eshakel la totoo son si-kato, kowan nen Jesus so nonta ira too to ey,

⁴⁶ "Tanshaaniyo ira ja mamaistoro ni dinteg ta baka ma-edinan kayo. Pipiyan shen manbesho ni nankedayag ni sha panpasiyal, tan pipiyan sha pay ya rispito-en ni totoo ira ja semsemano-an shima malkaro ja karakdan ni too, tan shima sa-nopan, pipiyan sha pay ja ontongaw shima naysaganen tongawan say mebigbig ira, tan agdalo no timpo ni piyasta, sotan i shaka pesing.

⁴⁷ Manpa-otang ira mango nonta bibiin nanke-balo jet no enshiy ibayad sha, piditen shen angken sota baley sha i ibayad sha. Jet no ondaw ired sa-nopan, say shaka pesing nga mena-din ni kakedsel sha, shaka ishokey i shawat sha son Apo Shiyos, say ikowan ni too ey maronong ira. Nem amta nen Apo Shiyos et ebadbadeg i penosa to son si-kara!"

21

Epateg sota in-akan ni ebalon bii

¹ Nonta wára shi Jesus shi Timplo, inon-an to ira sota toon babaknang ja en engi-kas ni pilak sha nodta kakon ja kay-ini ni alos shi Timplo.

² Jet wára ngoy sakey ya ebalon biin ebiteg ja en engi-kas ni showen sintimos.

³ Jet kowan nen Jesus so nonta ira too to ey, “Ikowan ko son si-kayo, sajay ya biin ebalo, ja ebiteg ga pasiya, epatpateg sota in-akan ton alos to nem say sota eshom.

⁴ Ta sota ira eshom, sobda ni pilak sha i sha in-akan, nem sajay ya biin ebiteg, in-akan ton emin i oltimon wára son si-kato — angken sota istay panbiyag to koma.”

Indawag nen Jesus sota maypangkep ni pantepos ni dobong

⁵ Sota ira eshom ma too to, ireka emantatabtabal pangkep nonta Timplo, ja kowan sha ey, “Mapteng nga pasiya i boya ni Timplo. Angken sota ira bato, mapteng i inkay-amag to, tan kasta met sota nay-amag nodtan ja in-akan ni too nontan da.”

Nem si Jesus, kowan to son si-kara ey,

⁶ “Sajay ya Timplon joka pan-ishemang niman, wára aliy timpon kesheshal to. Angken sakey so ira nima baton mapteng i inkay-amag to, enshiy en mebay-an shima nay-amagan to; mesheshal la emin.”

⁷ Jet inbaga sha ey, “Apo, pigan ali ita kowan mo? Jet nganto pay i amta-an mi so no shanshanin mepesamak itan?”

⁸ Simongbat si Jesus ja kowan to son si-kara ey, “Nemnemnemen jo koma iyay. Karekayo pa-olbod so ni angken sipa, ta eshakil aliy toon mengosal ni ngaran ko, ja kowan sha ey si-kara si Cristo, ono kowan sha ey shanshaniy pantepos ni dobong. Nem karejo patpati-en.

⁹ No wáray kobat tan kolo ja shemagen jo, karekayo onkel-ew. Tep kenshat ta mepesamak

ira jay, nem aliwén sotan i ka-amta-an to ey shanshani may pantepos ni dobong.” Kowan nen Jesus.

¹⁰ Jet intoloy ton kowan to pay ey, “Angken ili tan ili, mankokobat ira, tan angken pay sota ka-ili-ilin intorayan ni a-ashi, mankokobat ngo ira.

¹¹ Wara pay ali i nankekedsang nga jegjeg, tan epalado aliy bitil tan manpansekit i totoo shi kedogadogad. Waray katetakot ta asen jon mepesamak shi naykayang, jet saja eshom ma mepesamak, waray isinjas to di.

¹² “Nem pedigaten shakejo nin ni totoo. Seskelen shakejo et i-ilaw shakejod baley ya kesa-nopi ni Hodiyo jet bistigalen shakejod man, jet ibalod shakejo pay. Jet ikoyod shakejo pay shi sango-an nonta ira ari, tan sango-an nonta ira gobinarol, ta too takejo.

¹³ Sotan i waya jon mengiringan na mengikowan son si-kara ni maypangkep son si-kak.

¹⁴ Karejo nemnemen ja mengisekana shagos ni isongbat jo son si-kara,

¹⁵ tep si-kak met laeng i mengi-kan son si-kayo ni koston isongbat jo tan daing jon man-a-sel. Isonga sota makakontra son si-kayo, enshi son si-kara i makabaal ja mengebak son si-kayo; mesampolo et ira.

¹⁶ Sota ira a-akiyo, partido jo, kajem jo, tan angken pay sota ira maka-anak son si-kayo, si-kara met laeng i mengibaag son si-kayo so nonta ira makakontra son si-kayo say seskelen shakejo, jet sota eshom son si-kayo, bono-en sha.

17 Sota joka pematì son si-kak, si-katoy kabol la okesan shakejo so ni karakdan na too.

18-19 Nem anosìyo, ta sota anos joy kaysedakan jo. Sigoradon eg kayo mepokaw ingkatod ingka.

20 “No asen jon pandiktoba ni solsharo i Jerusalem, amtayo ma ey kenshat ta sheshalen sha i Jerusalem.

21 No mepesamak iyay, say pesing koma nonta ira wáred Jodia ket onbetik ira et ja manbakwit shi shonshontog. Sota ira wáred siyodad ni Jerusalem, manbakwit ngo ira, tan sota ira toon wára nodta aliwén sakop ni Jerusalem, eg sha koma nemnemen ja ondaw shiman.

22 Ta sajay alin akew, si-katoy ketongpal ni emin na insolat ni para padto nen Apo Shiyos nonta bayag da, ja inpadtoren timpo ja penosa nen Apo Shiyos.

23 Sajay alin mepesamak, kakaasi ira din pasiya sota bibiin malokon, tan sota bibiin waray anak shen emenoso, tep digat ta pasiya i on-motok alid jay ya dogad! Si-kato aliy epaladon keshosa ni Hodiyo, ja totoo shiyay ya dogad.

24 Say eshom son si-kara, bono-en ni kabakal sha ni kampilan, tan sota ira ebay-an, al-en sha iren maybedod shi emin na ka-ili-ili. Jet sota toon aliwén Hodiyo, si-karay onkatin so ni Jerusalem, ingkatod kepospos ni timpon inkesh-eng nen Apo Shiyos ja penosara so ni Israel.

25 “Waray katetakot ja mepesamak nima sekit, nima bolan, tan sama talaw ira. Shiya dobong, emin na tood ka-ili-ili, onkel-ew ira; messhaaw iren pasiya tep makedsang i bongog ni baybay, tan kakembaleg i shadoyon to.

²⁶ Onkapoy iray totoo ni takot sha ni shaka pansessesked no ngarantoy mepesamak shiya dobong, tep angken sota naykayang, mebediwan i itsora to.

²⁷ Sajay nin i mepesamak, asan edaw ali sota Anak ni Too. Mismon asen sha-ak ni totoo ja ma-odopan ali ni kolpot, tan asen sha pay i itsora ni bakdang kon emenenilin pasiya, tan asen sha ngo sota podnon panakabalin ko.

²⁸ Isonga no asen jon emankepasemak iyay ya inkowan ko, pan-imdeng kayo! Tangkak jo, tep shanshanin maywékas i digat jo.” Kowan nen Jesus iyay ya emin.

²⁹ Jet in-arigan to ira, ja kowan to ey, “Nemnem jo kari sota kadasan na kowan sha ey higos, tan angken pay sama ira eshom ma kait ton kadasan.

³⁰ Shiya kad-an tayo, no asen jon emansimit i bolong to, amtayo ma ey shanshani sota timpo ni petang.

³¹ Say olog niyay, no asen jon meshoki-an na emanketongpal ira ja inkowan ko la, amtayo ma ey shanshani may pantoshayan nen Apo Shiyos.

³² Podno iyay ya ikowan ko son si-kayo. Saja ira too niman, eg ira nin metey, no diket sa-kopen shen emin ira jay ya mepesamak ali.

³³ Sama naykayang tan saja dobong, mebedin na ma-enshi, nem saja esel la inkowan ko, kenshat ta metongpal, ja eg ma-enshi.”

³⁴⁻³⁵ Jet si Jesus, binanshaanan to ma ira, ja kowan to ey, “Pantanshaan kayo. Karekayo mesiwat ni paspasiyal tan inom ni adak, ono mesiwat ni nemnemnem jo nem ngarantoy pesing jon manbiyag. Baka ondibag kayo ni

imotok ko di, tep mebiglen pasiya, ja inges toy kebkas ni katig. Messhaaw wa emin i totoon wared ja dobong.

³⁶ Isonga say kowan ko son si-kayo, mesepol la esagana kayo ni olay. Panshawate kayo son Apo Shiyos ni kedsang, say idasat jo iyay alin mepesamak, say manpeshang kayo ni anongosto son si-kak ja kowan sha ey Anak ni Too.” Kowan nen Jesus.

³⁷⁻³⁸ Si Jesus, no ka-akawan, kanayon na eman-tosho shi Timplo, tep kaonbowas iray totoon en mantetneng son si-kato. Jet no mama-shem mala, kaon-oli ni olay shi shontog ga kowan sha ey Olibas, jet shiman i pandebi-an to.

22

Bimaki si Judas ta ekitodag so nodta makakontra son Jesus

¹ Shanshani nontan sota timpo ni piyasta ni Hodiyo ja kowan sha ey Paskowa.

² Sota apo ira ni papashi ni Hodiyo tan mamaistoro ni dinteg ni Hodiyo, piyan shen pasiya ja bono-en si Jesus, nem entakot ira nonta totoon eshakel ja na-awis son si-kato. Isonga ireka mengenap nontan ni pesing shen memono son si-kato.

³ Si Satanas, sinairo tos Judas Iskariote ja sakey so nonta ira sampolo tan showen apostol nen Jesus.

⁴ Si Judas, dimaw ja en ekitbal so nonta ira apo ni papashi tan kowadja ni Timplo no ngarantoy pesing ton mengitoshon ni kawad-an nen Jesus say seskelen sha.

⁵ Jet ireka man-imdeng, tan shaka pan-akni ni pilak ja dagbo to.

⁶ Jet si Judas, ekitodag ey itoro to son si-karay kad-an nen Jesus nem saman na enshiy eshakil la totoo, say enshi komay kolo. Jet manshoki nontan, wára ni olay shi nemnem nen Judas Iskariote no toway pesing ton mengibaag so nen Jesus son si-kara.

Sota ka-onoran na pekipengan nen Jesus so nonta ira apostol to

⁷ Shimanon sota akew wa shaka pengan ni tinapay ya enshiy daok ton para debag tan shaka pemalti ni kalniron sid-an sha nem Paskowa.

⁸ Jet nontan, si Jesus, inbetkag tos Pedro nen Juan, ja kowan to ey, “Daw kayo, jo isekana i penganan tayo nem ma-shem tep Paskowa ma.”

⁹ Kowan sha ey, “Toway dawán min en pengisekana-an ni penganan tayo?”

¹⁰ Kowan nen Jesus ey, “Itnengiyon pasiya iyay. No onsabi kayod Jerusalem, wáray dakin aspolen jo ja emasan ni salaw ja na-inan ni shanom. Onod jo nodta baley ya seskepan to,

¹¹ jet ikowan jo iyay so nonta makabaley: ‘Kowan ali nen Maistoro ey towa konoy kowad-ton penganan to tan si-kamin too to niman na ma-shem, tep Paskowa?’

¹² Jet ipa-sas to son si-kayo i embanaw wa kowadto nodta naykayang, ja wára nodtan na emin i mesepol tayo. Si-katoy pengisekana-an jo ni kenen tayo nem ma-shem.” Kowan nen Jesus.

¹³ Dimaw ira sota shadwá shi Jerusalem et siya, kosto noman na nay-agpayso sota kowan

nen Jesus son si-kara. Jet insaganared man sota kenen sha nontan na ma-shem.

¹⁴ Idi mama-shem mala, si Jesus tan sota sampolo tan showen apostol to, dimaw iren mengan nodtan. Timongaw ira,

¹⁵ jet si Jesus, kowan to son si-kara ey, “Piyon kon pasiya ja mekipengan nin son si-kayo niman na Paskowa, asan naka mandikat!

¹⁶ Ikowan ko iyay son si-kayo. Sajay i ka-onoran na Paskowa ja pekipenganan ko. Enshi ma nin ingkatod metongpal i podnon olog ni Paskowa shi pantoshayan nen Apo Shiyos.”

¹⁷ Inda nen Jesus sota tasa et nan-iyaman son Apo Shiyos, asan kowan to ey, “Iya, ko-ko-tik jon inomen iyay.

¹⁸ Ikowan ko iyay son si-kayo. Sajay i ka-onoran na penguinom ko ni shanom ni obas, jet ekak nin menginom ingkatod metongpal aliy pantoshayan nen Apo Shiyos.”

¹⁹ Inda to sota tinapay et nan-iyaman son Apo Shiyos, asan toka showashowa-a. Jet in-akan to nodta ira apostol to, ja kowan to ey, “Sajay i bakdang kon itolok kon bono-en sha; si-katoy kaysedakan jon took. Si-kayo, itodtoday jon mandilikob ja menowashowa ni tinapay, ja si-katoy penguineman jo son si-kak.”

²⁰ Jet idi naksheng iren engan, inda to sota tasa jet kowan to ey, “Manshoki ma niman, badoy pesing nen Apo Shiyos ja mengisedakan ni totoo, jet saja inomen jon wared tasa, si-katoy pengiroki to, ta sajay i shalak ka on-ayos ali nem meteyak. Sajay i on-ayos say maysedakan kayo.”

²¹ Jet intoloy ton kowan to ey, “Nem niman, wáren ekilikob son si-katejo sota mengibaag son si-kak so nonta ira makakontra son si-kak!

²² Si-kak sota kowan ni para padto nonta bayag da ey Anak ni Too, jet sigod ja inkesheng nen Apo Shiyos ey mesepol la meteyak. Nem kaasi met laeng sotan na toon mengibaag son si-kak, ta meshosen pasiya!”

²³ Idi inkowan nen Jesus iyay, sota ira apostol to, nanbibinaga ira nem sipa son si-kara i ondaga so nonta kowan nen Jesus.

²⁴ Nansosongbat pay ira nem sipa aliy ibilang nen Jesus ey kangeto-an.

²⁵ Jet kowan nen Jesus son si-kara ey, “Say ogadi ira nonta mantoshay shima kompormin ili, tan sota eshom ma toon nankengatoy saad sha, shaka ipakat i saad sha ni shaka pengitoshay met laeng so ni sinekohan sha.

²⁶ Nem no si-kayo, aliwén inges nontan i pesing jo so ni sakey tan sakey son si-kayo. Sota pangolon kangeto-an son si-kayo, si-kato komay singa orishiyen ja ekombaben man-obda ni pansigshan ni kait to.

²⁷ Nemnem jo kari iyay. Sipay engatngato — sota timongaw ja emengan, ono sota emengi-kan ni kenen to? Simpri sota toon timongaw wa emengan. Nem angken apo jowak, naka man-obda ni olay ni pansigshan jo.

²⁸ “Angken eshakil i digat ko, mapiyan kayon on-ono-onod son si-kak.

²⁹ Si Apo Shiyos ja Amak, inkesheng to ey si-kak i mantoshay ni ka-onoran alin akew, jet si-kak ngoy mengigsheng ey mekitoshay kayo ali.

³⁰ Mekiladsak kayo son si-kak ni pantoshay ko, tan ontongaw kayo pay ja mengigsheng ni panbenagan ni emin na Hodiyo ja poli nonta sampolo tan showa ja annak nen Israel.” Kowan nen Jesus.

³¹ Jet waray inkowan to son Pedro ey, “Simon, Simon, iyay i ikowan ko son si-kam. Si Satanas, waray parang to ey pandikat shakejo, balang kono nem ma-adilaw kayo, say mansisi-jan kayon singa tineg-ap ni emenaap.

³² Mebedin na ma-adilaw ka Simon, ni sankat-atan, nem inshawat ko son Apo Shiyos ey eg mekolpin onkapoy i pamatim. Jet no may-odi mowan i pamatim son si-kak, si-kam ngoy pekedsang so ni kait mo.”

³³ Simongbat si Pedro ja kowan to ey, “Apo, eg mebedin! Angken ibalod sha-ak, angken bono-en sha-ak, esagana-ak ja kadwa-en taka ni olay!”

³⁴ Kowan nen Jesus ey, “Ikowan ko iyay son si-kam Pedro: niman na dabi, isaot mowak ni memintedo ja ikowan mo ey eg mowak am-amta, asan waray ontekok ja kawitan.”

³⁵ Jet kowan nen Jesus son si-karen emin ey, “Nonta inbetkag takejon enshiy jo inta-jon na pilak ono bayong ono sapatos, waray kolang ja kasapolan jo nontan?”

Simongbat ira ja kowan sha ey, “Enshi, waren emin.”

³⁶⁻³⁷ Kowan ma nen Jesus ey, “Eg kayo nankolang nontan tep ensemble sha-ak nodta dinawan jo, isonga in-aknan shakejo. Nem niman, apil ma. Ta say nemnem ira ni totoo son si-kak niman, kowan sha ey sakeyak kono ngon

enshiy kenkenshat to. Ta mesepol la metongpal son si-kak sota padto nonta bayag da ja kowan to ey, 'Maybidang ey sakey ya bimasol.' Isonga manshoki ma niman, no sipa son si-kayo i waray pilak to ono bayong to, ita-jon to koma. Tan no sipa son si-kayo i enshiy kampilan to, idako to komay baro to et menongkal ni sakey."

³⁸ Jet kowan nonta ira apostol to ey, "Apo, asas mo! Iyay i showen kampilan!"

Kowan nen Jesus ey, "Kosto ma, enog."

Nanshawat si Jesus shi shontog ga kowan sha ey Olibas

³⁹ Kanajon na kaondaw si Jesus shima shontog ga kowan sha ey Olibas jet idi bimo-day ira nodta baley ya enganan sha, inodop to ira sota apostol to et dimaw ira nodtan na shontog.

⁴⁰ Idi mimotok ira nodta dogad ja kanajon na toka panshewati, kowan to son si-kara ey, "Panshawat kayo son Apo Shiyos ni kedsang say eg shakejo ebaken ali ni digat ja onsabi son si-kayo."

⁴¹ Idi inkowan to iyay, bintawan to ira ni ootik et nantalimokod ja nanshawat son Apo Shiyos,

⁴² ja kowan to ey, "Ama, no mebedin koma, eg mo ipalobos iyay ya pandikat ko di. Nem say kowan ko, sota piyan mo, si-katoy metongpal, aliwen sota kostok."

⁴³ Waray anghil ja edapod dangit jet to tinodongan si Jesus say onkedsang.

⁴⁴ Emandikat si Jesus sa pasiya, isonga mas pay ya nanshawat ta pasiya son Apo Shiyos. Naydi-di-ngetan ja singa shalay toka pantedited.

⁴⁵ Idi imekwás ni toka panshéwat, dimaw et to inon-an sota ira too to, jet simbi to iren na-ogip. Nabdey ira ni nemnemnem sha ni shaka pandeshingit.

⁴⁶ Jet kowan to son si-kara ey, “Ngantoy? Na-ogip kayo? Bangon kayo, jet panshawát kayo son Apo Shiyos say eg shakejo ebaken ali ni digat ja onsabi son si-kayo.”

Si Jesus, inshel ma nonta ira makakontra son si-kato

⁴⁷ Maramen eman-a-sel si Jesus ey onmotok aliy eshakel la totoo. Si Judas Iskariote, ja sakey so nonta ira sampolo tan showa ja apostol nen Jesus, si-katoy engibalnay so ira nonta eshakel la totoo. Insopan nen Judas si Jesus, ja kowan to ey to ongo-an.

⁴⁸ Nem kowan nen Jesus son Judas ey, “Ongo gayam i pengitoshom so nen si-kak so nita ira makakontra son si-kak? Amtam met ey si-kak sota kowan ni padto nonta bayag da ey Anak ni Too!”

⁴⁹ Idi inamta-an nonta eshom ma too nen Jesus i mepesamak ali, kowan sha son Jesus ey, “Apo, palobosim kamin mengibediw son si-kam! Iyay ngoy kumpulan mi!”

⁵⁰ Jet sota sakey so nonta ira too nen Jesus, kinimpas toy kanawan na tangida nonta sakey ya baga-en ni kangeto-an na pari.

⁵¹ Nem imesel si Jesus ey, “Kosto, enog!” Jet in-oli nen Jesus sota tangida nonta too et nay-olin mimapteng ma sota tangida.

⁵² Kowan ma nen Jesus so nonta ira apo ni papashi tan kowadja ni Timplo, tan sota eshom

iren pangolo ni Hodiyo ja en mengshel son si-kato ey, "Apay nga nan-etak kayo di tan waray peg-as jo? Apay tolistan i kowan jo ey a-shelen jod jay?"

⁵³ Inakew met ja wara-ak shima Timplo, ket apay nga eg jowak inshel nontan? Nem niman na kalebi-an met kitdi i timpoyo, tep si-katoy pan-obda nen Satanas!"

Indibak nen Pedro ey am-amta to si Jesus

⁵⁴ Singkel shes Jesus et indaw sha led baley ni kangeto-an na pari. Jet si Pedro, tinned to ira nem bimetaw.

⁵⁵ Waray emenangshang nodta bo-dayan, jet nay-eshom ngos Pedro.

⁵⁶ Nem idi on-an nonta sakey ya biin baga-en ni kangeto-an na pari si Pedro, inningning toy dopa ton esilwan nonta apoy et kowan to ey, "Angken si iyay met, kait nonta inshel sha."

⁵⁷ Nem nandibak si Pedro, ja kowan to ey, "Keba-ba-ngata niyay ya bii! Apay am-amtak sotan na kowan mo!"

⁵⁸ Enshiy bayag to, wara mowan i daki ja engimaton son Pedro et kowan to ey, "Si-kam met i sakey ya too nontan na too."

Nem kowan nen Pedro ey, "Moka ba-ba-ngatay esel! Apil, aliwen si-kak!"

⁵⁹ Idi epalabas i sakey ya oras, wara mowan i sakey ya toon emengipidit ja shinoyshoy to pay si Pedro, ja kowan to ey, "Ayshiy showashowa! Kenshat ta si-katoy sakey ya kait to did Galilia, tep si-katoy kait ton i-Galilia!"

⁶⁰ Simongbat si Pedro ja kowan to ey, “Enshiy amtak nita moka pan-ikowan!”

Jet idi maramen eman-a-sel pay laeng si Pedro, timekok i kawitan.

⁶¹ Jet nontan wimingi si Jesus et inshemang tos Pedro. Jet ninemnem ma nen Pedro sota inkowan nen Jesus ey, “Isaot mowak ni memintedo, ja kowan mo ey eg mowak am-amta, jet no meksheng, wára ngoy ontekok ja kawitan.”

⁶² Jet si Pedro, dimaw shima powisha ja epaladoy nangis to tep naydaw-an.

Si Jesus, binistigal ira nonta makakontra son si-kato

⁶³⁻⁶⁴ Sota ira emanbantay so nen Jesus, shaka sengsengkita: inopopan shay mateto, asan shaka shengshengpela, jet kowan sha ey, “Sipay enengpel son si-kam? Tiga, ipadtom ka!”

⁶⁵ Tan eshakil pay i inkowan shen ngaaw son si-kato.

⁶⁶ Idi ewa-wa, esa-nop sota ira pangolo ni Hodiyo, pati sota ira apo ni papashi, tan sota ira mamaistoro ni dinteg ni Hodiyo. Jet insekep shes Jesus et insango sha son si-kara met laeng. Jet inbag-an sha, ja kowan sha ey,

⁶⁷ “Ipodnom no agpayson si-kam sota inkari nen Apo Shiyos nonta bayag da ey ibetkag to alin mengisedakan!”

Nem simongbat si Jesus ja kowan to ey, “No ikowan ko, eg jo met laeng pati-en.

⁶⁸ Jet no ibag-an takejo ngo, eg jowak met songbatan.

⁶⁹ Nem iyay i ikowan ko son si-kayo. Si-kak sota inpadora nonta bayag da ey Anak ni Too et

shanshani men mekitongawak son Apo Shiyos ja Manakabalin, ja nak ngo mantoshay.”

⁷⁰ Jet kowan sha ma ey, “No kasta ngarod, kowan mo ey si-kam i Anak nen Apo Shiyos?”

Simongbat si Jesus ja kowan to ey, “Sota inkowan jo, si-kato.”

⁷¹ Kowan sha ma ey, “Eg mesepol la wára pay i sistigo! Intenengan tayon mismoy kowan to!”

23

Binistigal nen Gobinarol Pilato si Jesus

¹ Jet emin sota ira esa-nop pa toray, intolod shes Jesus shi kad-an nen Gobinarol Pilato,

² jet insodsod sha son Pilato sota kowan sha ey basol nen Jesus, ja kowan sha ey, “Sinokalan mi iyay ya too, ja toka pan-ewisen emin i too mi ey angken eg ira manbedjad ni bowis so ni gobirnoyod Roma, tan kowan to pay ey si-kato sota arin inbetkag ali nen Apo Shiyos ja mengisedakan kono son si-kamin Hodiyo.”

³ Inbag-an nen Pilato si Jesus ja kowan to ey, “Jet si-kam sota ari ni Hodiyo?”

Simongbat si Jesus ja kowan to ey, “Sota inkowan mo, si-kato.”

⁴ Jet kowan nen Pilato so ira nonta apo ni papashi tan sota kait shen eshakel ey, “Enshi met i sinepolan kon ngaaw wa aramid niyay ya too.”

⁵ Nem ema-ma et ja shaka pan-ipilit, ja kowan sha ey, “Si-katoy emengi-kan ni kolo, manipod shi Galilia tan intiron Jodia ingkato did jay!”

⁶ Idi itenengan nen Pilato iyay, inbaga to nem agpayson i-Galilia si Jesus.

⁷ Jet idi inamta-an to ey edapos Jesus shi Galilia ja sakop ni intorayan nen Hirodis, inpaitolod to son Hirodis, tep naytompong ngon wared Jerusalem nontan na akew si Hirodis.

⁸ Si Hirodis, eman-imdeng nga pasiya ni in-oney to son Jesus, ta ebayag ga shinemag toy maypangkep son si-kato, jet piyan ton pasiya ja asen, balang nem waray dag-en ngo nen Jesus ja milagro.

⁹ Jet eshakil i salodsod nen Hirodis son si-kato, nem eg sinongsongbatan nen Jesus.

¹⁰ Jet sota apo ira ni papashi tan sota mamais-toro ni dinteg ni Hodiyo, kimedasang iren shaka panpebesolis Jesus.

¹¹ Angken si Hirodis tan sota ira solsharo to, sinengsengkit sha si Jesus, ja dingkaren emin i piyan sha son si-kato. Jet say inpasing sha pay ni dedamsis sha, binesho-an sha ni mapteng nga singa baro ni ari, asan shaka pa-odi so nen Pilato.

¹² Jet nontan na akew, nankajem si Hirodis nen Pilato ey istay ya kabakal ira da nontan.

¹³ Idi mimotok ira shi kad-an nen Pilato, sina-nop to iray apo ni papashi, tan sota eshom iren toray ni ili, tan sota karakdan na totoo,

¹⁴ jet kowan to son si-kara ey, “Saja toon in-ilaw jo did jay, ja kowan jo ey pan-ewisay totoon eg memati ni bilin min i-Roma, binistigal ko shi sango-an jo et enshi met i emesokalin kowan jo ey ngaaw wa aramid to.

¹⁵ Angken si Hirodis, enshiy to sinokalan na basol to, isonga inpa-odi to di son si-kami. Edawag ey enshiy basol niyay ya toon to kebono-an.

16 Pesepdat ko bengat et maybodos ma.”
Kowan nen Pilato.

17 (Inkowan to ey ibolos to, ta no sinshon piyasta ni Paskowa, wáren kenshat i sakey ya pirison ibolos to so nonta ira totoo.)

18 Nem emin ira sota eshakil la totoo, eg sha kosto. Shaka pan-ikeljaw ey, “Enshi! Bono jo iyay ya too! Ibodos jo dis Barabas son si-kami!”

19 (Saja si Barabas, naybalod ni dinodokon dingka ton maykontra shi gobirno, tan bimono pay.)

20 Si Pilato, piyan ton istay si Jesus komay maybodos, isonga inbag-an to mowan i totoo no piyan sha.

21 Nem shaka et pan-ikeljaw ey, “Paidansam et shi koros! Paidansam et shi koros!”

22 Jet kowan nen Pilato ni maykepintedo ey, “Ngantoy? Ngaran ni dingka ton ngaaw aya? Enshi met i sinepolan kon basol ton kebono-an to. Pesepdat ko bengat et maybodos ma.”

23 Nem ema-ma-ma et ja pilmiy keljaw ni totoo ja kowan sha ey, “Paidansam shi koros!”

Anongosto ma ey engabak i kelkeljaw nonta totoon eshakil:

24 si Pilato, inkowan to ey metongpal sota kowan sha.

25 Inbolos tos Barabas ja naybalod may-pangkep ni dinodokon dingka ton maykontra shi gobirno tan sota inpamono to. Tan in-awat tos Jesus so nonta totoo say dag-en shay pipiyan shen dag-en son si-kato.

Indansara si Jesus shi koros

²⁶ Indara si Jesus et idi ireka man-ekad ja ondaw nodta kaydansa-an tod koros, inaspol sha sota toon si Simon i ngaran to, ja i-Sirini. Istay ondaw koma shi siyodad, nem inpasakbat sha et son si-kato sota koros, ja in-onod to son Jesus ni shaka pan-ekad.

²⁷ Jet eshakil iray totoon nay-olop son Jesus, tan waray eshom ma bibiin ekidaw ja epaladoy shaka pannengis ni daringit sha son si-kato.

²⁸ Winingi nen Jesus ira et kowan to ey, “Si-kayon bibiid Jerusalem, karejowak nengisan. Nangisi jo et i bakdang jo shorog tan sota ira annak jo!

²⁹ Ta iyay aliy timpon pandikat ni totoo. Sotan alin timpo ja onsabi, ikowan ni totoo ey magesat iray bibiin enshiy annak sha, ja enshiy sha inpanoso.

³⁰ Sotan alin timpo, manseskang i totoo, ja ikowan sha ey, ‘Si-kam ma shontog, karalshal ka di et ta-boki jokami!’

³¹ Ta no medeka iyay shi embasen kiyew, ngantoy pesingan sha so ni emag-an? No sajay i dag-en sha son si-kak ka enshiy basol to, ngaranto emo ali ngoy mepesamak son si-kayo tan sota ira annak jo?” Kowan nen Jesus.

³² Waray showen too ja inpaki-olop sha son Jesus ja sha pekibitay son si-kato, ta makedsel iren showa.

³³ Idi mimotok ired ma dogad ja kowan sha ey Toktok, indansara mes Jesus, tan sota showen makedsel, shi sanseskey ya koros. Sota sakey, wara nodta apit ni kanawan nen Jesus, tan sota sakey, wared apit ni kanigid to ngo.

³⁴ Kowan nen Jesus son Apo Shiyos ey, “Ama, pakawanim ira ja nandaga niya ngaaw son si-kak, ta eg sha amtay shaka pandag-a.”

Sota ira engilansa son Jesus, nanbobonot ira no sipay ontompong so nonta baro nen Jesus, asan shaka panbibingayi.

³⁵ Sota ira totoo, imalekey iren shaka panboja-a si Jesus ja naykoros. Jet sota ira toray ni Hodiyo, shaka sengsengkita, ja kowan sha ey, “Insalakan to konoy eshom; tiga nem isalakan to ngoy bakdang to shorog! Kabedinan to no podnon si-kato sota shinotokan nen Apo Shiyos ja inbetkag to din mengisedakan!”

³⁶⁻³⁷ Angken sota ira solsharo ja kowadja nodtan, shaka sengsengkita, ja kowan sha ey, “Isedakan moy bakdang mo no agpayson si-kam i ari ni Hodiyo!” Jet shaka i-ang-angit ja i-aknan ni adak.

³⁸ Tan waray naysolat nodta koros to shi petek ni toktok to ja kowan to ey, “Sajay sota ari ni Hodiyo.”

³⁹ Sota sakey ya naykoros shi askang nen Jesus ja makedsel, ngaaw met laeng i inkokowan to son Jesus, ja kowan to ey, “Aliwen si-kam aya sota inbetkag ali nen Apo Shiyos ja mengisedakan? Isedakan mo shorog i bakdang mo — tan angken si-kami!”

⁴⁰ Nem sota sakey ya naykoros, inseg-ang to sota kadwa to ey, “Enshiy takot mo ni Shiyos? Kitejoka manketey ya tedo,

⁴¹ nem kanebengan ta mangon mengikesho ni dingdingka ten ngaaw; si-kato, enshiy basol to!”

⁴² Jet kowan niyay son Jesus ey, “Jesus, nem-nem mowak nem manbedin ken ari!”

⁴³ Kowan ngo nen Jesus son si-kato ey, “Podno iya ikowan ko son si-kam: niman na akew, mayda-kam ken mandadsak son si-kak shi dangit.”

Etey si Jesus

⁴⁴ Idi nonta alas dosi ni ka-akawan, nanbolinget nodtan na dogad ingkato nonta alas tris ni mama-shem, tep kolpin esa-dinan i sekit.

⁴⁵ Jet sota masshel la kortina ja naysa-din nodta Kapatkan na kowadto shima naydaem ni Timplo, epi-kat ja nanshowa.

⁴⁶ Jet si Jesus, inkeljaw ton kowan to son Apo Shiyos ey, “Ama, ipiyal ko son si-kam i ispiritok!”
Inkowan to iyay asan ma ma-bosi.

⁴⁷ Sota kapitan ni solsharo, inon-an ton emin iya epasemak et nanshayaw son Apo Shiyos ja kowan to ey, “Agpayso gayam ma maronong iyay ya too!”

⁴⁸ Sotan ira totoon dimaw ali ja nanboya ni inkatey nen Jesus, idi inon-an shen emin i epasemak, imakad iren shaka panpagpagpagay pagew sha ni shaka pandeshingit.

⁴⁹ Nem emin ira sota maka-amten mismo son Jesus, pati sota ira bibiin nay-olop son si-kato alid Galilia, ebay-an ira nodta naybabetaw, ta piyan shen on-an pay i mepesamak ali.

Indiyang sha si Jesus

⁵⁰⁻⁵¹ Waray toon nanngaran ni Jose ja edapod ili ni Jodia ja kowan sha ey Arimatia. Mapteng i ogadi niyay ya too, tan si-katoy sakey ya

emansesked ni isabi ali ni pantoshayan nen Apo Shiyos. Kaishayaw ni totoo ey mapteng iyay ya too. Si-kato pay i sakey so nonta ira toray ni Hodiyo, nem eg to inonod i kowan nonta kait ton toray, ja dingdingkara son Jesus.

⁵² Dimaw si iya Jose so nen Pilato ja to kinshaw i bakdang nen Jesus.

⁵³ Jet idi impas nen Jose sota bakdang nen Jesus nodta koros, dinibotan to ni empotin dopot jet in-ilaw to nodta baton diniyangan sha ja eg pay laeng na-osal, jet shiman i indiyangan to so.

⁵⁴ Shanshani men mama-shem nontan, ja si-katoy panshoki ni akew wa panngidin ni Hodiyo.

⁵⁵ Sota ira bibiin nay-olop son Jesus alid Galilia, timened ira so nen Jose et inon-an shay nay-diyangan ni bakdang nen Jesus tan sota itsora ni inkaysepa to.

⁵⁶ Jet imakad ma ira ja ira mansekana ni emanseng-ew wa dana ja kowan sha ey ipoyok sha nodta bakdang nen Jesus. Idi ewa-wa, nan-inana ira tep si-katoy akew wa ngilin ni Hodiyo.

24

Nan-ongal si Jesus

¹ Idi agsapen pasiya ni Domingko ja maykatdon akew, dimaw ira sota bibii nodta naydiyangan ni bakdang nen Jesus, jet engita-jon ira nonta insaganaren emanseng-ew wa dana.

² Jet idi mimotok ira, inon-an shen epolig ja ima-adaw sota baton ebadeg ja istay naydekeb nodta diyang nga naydiyangan nen Jesus.

³ Simekep ira nodta diyang, nem enshiy sha simbin bakdang nen Apo Jesus.

⁴ Jet idi ireka manmodimodi bengat nodtan, ebiglen nanpa-sas i showen anghil ja singa too i itsora sha nem emeneniliy baro sha.

⁵ Sota ira bibii, injokmos shay dopara shi bo-day ta etakot iren pasiya. Nem kowan nonta showen anghil son si-kara ey, "Apay nga joka pan-enaped ja kad-an ni etey i toon mabiday?"

⁶ Enshi led jay, nan-ongal da! Nemnem jo kari: inkowan to met nonta wára kayo pay laeng shi Galilia; kowan to nontan ey,

⁷ 'Si-kak sota kowan ira nonta para padto nonta bayag da ey Anak ni Too, nem mesepol la may-ewatak ma so nonta ira toon nankekedsel et bono-en sha-ak ja maydansa shi koros. Nem no maykatdon akew, man-ongalak met laeng.' "

⁸ Ninemnem ma ira nonta bibii sota inkowan nen Jesus nontan da.

⁹ Indekjas sha sota diyang et nay-oli ired Jerusalem ja sha inkowan so nonta ira sawal ni sakey ya apostol nen Jesus tan so nonta eshom i emin na epasemak shi diyang.

¹⁰ (Say ngaran ira nonta bibiin en engikowan so nonta ira apostol nen Jesus, sajay: si Maria Magdalena, si Joana, tan si Maria ja ina nen Santiago, tan wára pay i eshom ma kait sha.)

¹¹ Nem sota sodsod ira ni bibii, kowan nonta apostol ey notnotnot sha bengat et eg sha pinati.

¹² Nem si Pedro, dimayat et bintik to lay diyang nga naydiyangan nen Jesus, jet idi niningil to, sota naydibot shi bakdang nen Jesus bengat i wára. Jet nay-olin imakad ja toka nemnemnema ja emin sota epasemak.

Nanpa-sas si Jesus so nonta showen too shi shalan

¹³ Nontan met laeng nga akew, waray showen too nen Jesus ja eman-ekad ja ondaw ired ma kowan sha ey Imaos. Sampolo tan showen kilomitro i kabtaw tod Jerusalem.

¹⁴ Shaka pantabtabala i emin na epasemak nontan den akew.

¹⁵ Jet nonta maramen ireka mantabtabal, ime-sop si Jesus et nay-olop son si-kara.

¹⁶ Inon-an sha nem eg sha inimatonan.

¹⁷ Imesel si Jesus ja kowan to ey, “Ngaran ni joka pantabtabala aya ni joka pan-ekad?”

Kimi-neng sota shadwa et ma-sas shi dopara ey enshiy imdeng sha.

¹⁸ Jet sota sakey, ja nanngaran ni Kliopas, kowan to ey, “Wara ka gayam shi Jerusalem niman ey eg mo amtay epasemak da nonta sajay den edabas sa akew?”

¹⁹ Jet inbag-an ira nen Jesus ja kowan sha ey, “Ngarantoy epasemak?”

Simongbat ira ey, “Waray toon inbetkag ali nen Apo Shiyos: si Jesus i ngaran to ja i-Nasarit. Emin na totoo, kowan sha ey enshiy maka-inges son si-kato ni toka itoro tan toka dagdag-a. Angken si Apo Shiyos, inges to emo ngoy kowan to pangkep son si-kato.

²⁰ Nem sota ira apo ni papashi tayo, tan sota ira eshom ma toray ni ili, in-awat sha so nonta ira toon i-Roma say mebono koma et binonora ja indansara shi koros.

²¹ Si-kato komay namnama min mengisedakan ni Israel, nem binonora met. Jet maykatdon akew to niman.

²² Nem iyay pay i badon shamag: wára konoy kait min bibii ja bimowas den dimaw nodta naydiyangan ni bakdang nen Jesus,

²³ jet eg sha kono simbiy bakdang to. Nay-oli kono ira di et kowan sha ey inon-an shay anghil ja engikowan son si-kara ey nanbiyag mowan si Jesus.

²⁴ Jet sota eshom ma kait mi, dimaw ira ngo ja sha inon-an, jet agpayso noman i inkowan nonta bibii. Nem eg sha inon-an si Jesus.”

²⁵ Kowan nen Jesus son si-kara ey, “Apay nganto et ngoy eg jo so pati-an na shagos ni emin na inkowan ni para padto nonta bayag da?

²⁶ Say inpadtora, mesepol la da-kaman nonta ibetkag nen Apo Shiyos ja mengisedakan i digat ja inges nonta inkowan jo, asan ma mayshayaw shi dangit.”

²⁷ Jet si Jesus, in-olog ton emin son si-kara sota naysolat nonta bayag da maypangkep son si-kato, manshoki shi dibsho ira nen Moises tan emin na insolat ni para padto nen Apo Shiyos nonta bayag da.

²⁸ Idi imesop ira ma nodta dogad ja dawán nonta showa, si Jesus, istay emankaisi-jan ja singa wára pay i dawán to.

²⁹ Nem inpeked sha ja kowan sha ey, “Ka-okip ked jay, ta mama-shem malen emankedabi ma.”

Jet inonod toy kowan sha.

³⁰ Ekisengo si Jesus son si-kara shi damisaan, jet nontan, say inpasing to, inda to sota tinapay et nan-iyaman son Apo Shiyos et pinet-ing to, asan toka i-wat son si-kara.

³¹ Jet idi pinet-ing to sota tinapay, binigbig sha ma ey si-kato gayam si Jesus! Nem nan-omas shi sango-an sha.

³² Kowan shen showa ey, “Aliwá aya ja singa wáray dinekna ten singa apoy shi poso ta nonta tokitaka pantabtabala shi shalan, tan nonta toka pengi-odog ni naypadto nontan da?”

³³ Inedisto-an shen nay-oli shi Jerusalem et simbira sota sawal ni sakey ya apostol nen Jesus ja esa-nop, tan wára pay i eshom.

³⁴ Jet idi onsekep ira, kowan nonta esa-nop pa too son si-kara ey, “Agpayso gayam ma nanbiyag si Apo Jesus! Nanpa-sas son Simon!”

³⁵ Jet insodsod ngo nonta showa i emin na epasemak nonta inkay-olop nen Jesus son si-kara shi shalan, tan kowan sha ey, “Jet inimatonan min pasiya nonta pinet-ing to sota tinapay!”

Nanpa-sas ma si Jesus son si-kara

³⁶ Idi maramen shaka pan-isodsod i epasemak son si-kara, ngaran ni wára gayam si Jesus shi nankawa-an sha! Kowan to son si-kara ey, “Talna i mewesha son si-kayo!”

³⁷ Etakot iren pasiya ta say wáred nemnem sha, kowan sha ey banig i inon-an sha.

38 Nem kowan nen Jesus son si-kara ey, “Apay nga kayoka manshanag, ja itan pay i showashowa ni nemnem jo?”

39 On-iyo iya takday ko tan sedik. Eg jo aya idasin ey si-kak? Pirat jowak say pati-en jo ey aliwén banigak. Ta say banig, enshiy daman to tan pokel to, nem si-kak, wára.”

40 Idi inkowan to iyay, inpa-oney to son si-karay takday to tan sedi to.

41 Jet na-imdengan ira, nem singa eg sha pay laeng pati-en ey agpayson si-kato. Eg ira pay mepnek, isonga inbaga nen Jesus ey, “Waray mebedin na mekan shiyay?”

42 Jet in-aknan sha ni ootik ka edoton piskaw ja sid-an to.

43 Inda to et kinan to say on-an sha.

44 Jet kowan to son si-kara ey, “Say inkowan ko nonta wára-ak pay laeng son si-kayo, emin sota naysolat ja maypangkep son si-kak nonta bayag da shi bilin nen Moises tan shi solat ira nonta para padto, tan shi dibsho pay ni Salmo, mesepol la metongpal.”

45 Jet dinewagan toy nemnem sha say ewatan shen emin i inpaisolat nen Apo Shiyos nonta bayag da.

46 Jet kowan to son si-kara ey, “Say insolat nonta ira para padto nen Apo Shiyos nonta bayag da, kowan sha ey sota ibetkag ali nen Apo Shiyos ja mengisedakan, mesepol la da-kaman toy digat asan matey, nem no maykatdon akew, manbiyag mowan.

47-48 Tan say inpadtora pay, kowan sha ey maytosho shi emin na ka-ili-ilin sakop niya

dobong ey mesepol la manbebawi komay too ni basol sha say pekawanan ira nen Apo Shiyos. Inpadora pay ey say mengitosho, si-kayon mengi-edagey son si-kak, jet ishogi jo konod Jerusalem. Si-kayoy ondaga so niyay tep mismon inon-an jo iya epasemak son si-kak niman na timpo.

⁴⁹ Jet iyay pay: ibetkag ko sota Ispirito Santo nen Apo Shiyos ja Amak ja inkari ton pan-iyant to son si-kayo. Nem panseked kayo nin shiya Jerusalem ingkatod ewaten jo sota panakabalin nonta Ispirito Santo ja edapod dangit.” Kowan nen Jesus.

Dimaw si Jesus shi dangit

⁵⁰ Inbalnay to ira ingkatod ma dogad ja nay-esop shi Bitania. Jet inkayang toy takday to ja binindisiyonan to ira.

⁵¹ Jet idi maramen toka panbindisiyoni ira, indekjas to iren kimayang mala shi dangit.

⁵² Jet nantalimokod ira sota apostol ja nan-shayaw son si-kato, asan ireka oli maled Jerusalem ma epaladoy imdeng sha.

⁵³ Jet kanajon ma ired Timplo ja emanshedjaw tan eman-iyaman son Apo Shiyos.

clvi

**Dibshon Mengi-kan Ni Pansigshan
Ibaloi: Dibshon Mengi-kan Ni Pansigshan (New
Testament)**

copyright © 1978 Wycliffe Bible Translators, Inc.

Language: Ibaloi

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 2 May 2025 from source files
dated 3 May 2025

6f85e932-8eee-5911-b890-a31a1da75d8c